

Tuhun Nyoo Tsa Tyaa Ra Lucas

Nu quitsaha jacotó ra Lucas tuhun ra Cristo tsi ra Teófilo

¹ Cuaha ñi nyivi nducu ñi cuhva tyaa ñi nuu tutu tandihi tsa cuvi nu yucú ndi ihya. Tyaa ñi cuhva

² nacatyí tuhun nyivi tsihin yo, ñi tsa nyehe tan cahan tuhun ra Jesús nda quivi jihna ñi.

³ Tan yuhu tucu tsa yaha cahvi yu tan nducu tuhun vaha yu tandihi tsa cuvi nda nu quitsaha. Yacan cuenda cuñi yu tyaa yu tuhun ihya tsa cuenda un, yooho Teófilo, nda nu quitsaha tan nda nu ndihi.

⁴ Tyin tacan tan coto un tyin nditsa tsa jacuaha nyivi tsi un.

Nu jacoto iin ángel tsi ra Zacarías ama cua cacu ra Juan, ra cua jacoondutya tsi nyivi

⁵ Quivi tsa cuvi ra Herodes rey tani cahnu cuenda Judea, tsicoo iin ra cuvi jutu, nañi ra Zacarías. Tan yihí ra cuenda ra cuvi jutu naha ra tsa nañi Abías. Tan ñasihi ra nañi ña Elisabet. Tata ra Aarón, ra cuvi jutu tahañ tsanaha, cuvi ña.

⁶ Tan nduve maa cuatyí ñi nuu Nyoo. Tyin vaha xaan tyaá yahvi ñi tuhun cahán Nyoo Jutu yo. Tan yoñi maa cuvi tyaa cuatyí tsi ñi.

⁷ Tan nduve maa sehe ñi tsicoo. Tyin ña Elisabet, ña cuvi coo sehe ña. Tan tsa tsahnu xaan nduvi taahan ñi.

⁸ Iin quiv̄i taahán tsi tandih̄i ra jutu tsa cutahan tsihin ra Zacarías, tsa jaha tyiñu ra naha tyiñu Nyoo.

⁹ Tan cuhva iyó maa ra cuv̄i jutu naha ra, tava ra naha suerte, ndáa ra cua tahan tsi quih̄vi tsitsi vehe ñuhu Jutu Nyoo, tyin cahmi ra cutu. Quiv̄i can tahan tsi tsi ra Zacarías.

¹⁰ Tan cuaha nyiv̄i yucú ityi tsata vehe ñuhu tsicán tahvi ñi tsi Nyoo, tsitsi tsa tsahmí ra cutu can.

¹¹ Tan tsitsi tsa ndi nyíi ra ican tan quituv̄i iin ángel Jutu Nyoo nu nyíi ra. Tan nyaá nyityi ángel can ityi xiin cuaha nu nyaá altar nu tsahmí ra cutu.

¹² Tan tsa nyehe ra Zacarías tsi ángel ican, iyo xaan cuñi ra. Tan nayuhv̄i xaan ra.

¹³ Tan ángel ican catyí ra tsihin ra:

—Zacarías, ña nayuhvi un. Tyin Nyoo tsiñi ra tsa cahan un tsihin ra. Tan cua coo iin sehe ña Elisabet ñasiñi un. Tan cua cunañi ra Juan.

¹⁴ Siñi xaan cua cuñi un. Tan cuaha xaan nyiv̄i cua cusii ndih̄i iñi quiv̄i cua cacu ra.

¹⁵ Tyin sehe un, cahnu xaan cua cuv̄i ra nuu Nyoo Jutu yo. Ña cua coho ra vinu tan ndi nyixi. Tan ñihi xaan cua quih̄i Tatyí Ii Nyoo tsi ra tsa ndi cumañi ca cacu ra tan tandih̄i tyembu tsa cua coo ra.

¹⁶ Tan cuaha xaan nyiv̄i Israel cua cunycun ñi tsi Jutu yo Nyoo jaha ra.

¹⁷ Juv̄in ra cua cahun ityi nuu Jutu Mañi yo. Tan cua coo tunyee iñi Nyoo tsi ra. Tan cua quih̄i xaan Tatyí Ii Nyoo tsi ra. Tyin cua cuv̄i ra tumaa ra Elías, ra cuv̄i ndusu yuhu Nyoo tahan tsanaha. Tan cua cuhva cuenda ra nácaa coo vaha nyiv̄i iyó sehe

tsihin sehe ñi. Tan cua janaha ra tsi nyiví caquiñi, na tyaa yahvi ñi tuhun caahán Nyoo. Tacan cua janduvaha ra tsi nyiví tan cua cuatu vaha ñi tsi Nyoo —catyí ángel tsihin ra Zacarías.

¹⁸ Tan tsicá tuhun ra Zacarías tsi ángel can, tan catyí ra:

—¿Nacaa tan coto yu tyin nditsa tsa cua coo sehe ñasihi yu? Tyin yuhu tsa tsahnu xaan yu. Tan tacan tucu ñasihi yu —catyí ra.

¹⁹ Tan ángel can nacahan ra tan catyí ra:

—Yuhu Gabriel nañi yu. Tan tsicá yu tyiñu Nyoo. Maa ra tava tyiñu tsi yu tyin jacoto yu tyiñu ihya tsi un tan jacoto yu tuhun vaha ihya tsi un.

²⁰ Tan vityin cua nduñhi un. Tyin ña tsinú iñi un tsa caahán yu tsihin un. Tan ña cua cuví cahan un nda cuanda tsa yaha cacu sehe ñasihi un. Tan nda quiví cundaa tandihi tsa cahan yu tsihin un —catyí ángel ican tsihin ra.

²¹ Tan nyiví tsa ndatú tsi ra Zacarías ityi tsata vehe ñuhu, iyo xaan cuñi ñi tyin cucuee xaan ra tsitsi vehe ñuhu can.

²² Tan cuhva tsa quitá ra Zacarías, ña cuví maa cahan ra tsihin ñi. Tan tuví iñi ñi tyin iyó tsa nyehe ra tsitsi vehe ñuhu can. Tacan tan quitsaha caahán ra tsihin ñi tsihin ndaha ra. Tyin ña cuví cahan ra.

²³ Tan quiví ndihí tyiñu jahá ra Zacarías vehe ñuhu can, tan cuanuhú ra yuvehe ra.

²⁴ Tsa yaha quiví can tan tsicuhun sehe ñasihi ra, ña Elisabet. Tan ña quitá maa ña tsata vehe tsa tandihi tsa uhun yoo. Tan tsicá iñi ña:

²⁵ “Tyehen javaha Jutu Mañi yu tsihin yu, tyin tacan tan ña cahan nyaa ca nyiví tsi yu”, cuñi ña tsicá iñi ña.

Nu jacoto_o iin ángel tsi ña María tyin cua cacu ra Jesús

²⁶ Tsa quita_a iñu yoo tsa ñuhú sehe ña Elisabet, tan jacuhun Nyoo tsi ra ángel Gabriel ñuu Nazaret tsa canyí Galilea.

²⁷ Tyin cahan ra tsihin iin ñaha yoco tsa nañí María. Tan tsa nya_a maa tsa cua tindaha ña tsihin ra nañí José, ra cuví tata ra rey David.

²⁸ Tan quihv_i ángel ican nu iyó ña María. Tan catyí ra tsihin ña:

—Nacumi tsi un, María. Ñihí un tumañi iñi nuu Nyoo. Maa ra iyó tsihin un. Tan nasocó xaan ca ra tsi un tan ñavin ca tandih_i ca ñaha —catyí ángel ican tsihin ña.

²⁹ Tan tsa tsiñ_i ña tsa cahan ra, iyo xaan cuñí ña tsa cahan ra. Tan tsic_a iñi ña: “¿Nacuenda tacan caahán ra ihya nacumi tsi yo?” tsicá iñi ña.

³⁰ Tan catyí ángel ican:

—Ña nayuhvi un, María, tyin ñihí un tumañi iñi Nyoo.

³¹ Vityin cua cuhun sehe un. Tan cua cunañi ra Jesús.

³² Cahnu xaan ra cua cuvi ra. Tan Sehe Nyoo cahnu cua cuvi ra. Tan cua cuvi ra rey jaha Nyoo Jutu yo, tumaa cuvi_i ra David, tsi tsaahnu ra.

³³ Tyin cua cundaca ñaha ra tsi nyivi Israel tandih_i maa tyembu. Tan ña cua ndih_i maa tsa cundaca ñaha ra —catyí ángel can tsihin ña.

³⁴ Tacan tan tsic_a tuhun ña María tsi ángel, tan catyí ña:

—¿Nacaa cua cuvi can? Tyin yuhu, ñaha ca coo yii yu.

³⁵ Tan naca_han ángel tan catyí ra:

—Maa Tatyí Ii Nyoo cua quítsi síquí un. Tan tunyee íñi Nyoo, ra nyaá gloria, cua quítsi tan cua casi tsi síquí un tumaa iin vico. Yacan cuenda Ra Ii tsa cua cacu cua cunañi ra Sehe Nyoo.

³⁶ Tacan tucu ña Elisabet ña tsatsin un cua cacu iin sehe ña vasu tsa tsahnu ña. Tan catyí nyívi tyin ñaha can ña cuví coo sehe ña. Maa tyin vityin tsa ñuhú sehe ña. Tsa íñu yoo tsa ñuhú sehe ña.

³⁷ Tyin Nyoo nduve tsa ña cuví jaha ra —catyí ángel tshin ña.

³⁸ Tan catyí ña María:

—Yuhu cuví yu musu Jutu Mañi yo. Na javaha maa ra cuhva catyí un —catyí ña.

Tacan tan cuahán ángel can.

Nu cuahán ña María cuanyehé ña nu nyíi ña Elisabet

³⁹ Tan iin quívi can, numi ñi cuahán ña María iin ñuu tsa canyíi Judea nu maa ñi maa yucu iyó.

⁴⁰ Tan quíhví ña tsitsi vehe ra Zacarías. Tan nacuhva ña nacumi tsi ña Elisabet.

⁴¹ Tan tsa tsiñi ña Elisabet tsa cahán ña María, tan natuñu sehe ña tsitsi ña. Tan ñihi nyaá Tatyí Ii Nyoo tshin ña.

⁴² Tan ñihi xaan nacahán ña, tan catyí ña:

—Nyoo nasocó xaan ra tsi un, María, tan ñavin ca tandíhi ca ñiñaha. Tan nasoco ra tsi sehe un.

⁴³ ¿Tan yóo cuví yuhu? Tyin quítsi síhi Jutu Mañi yu quítsi nyehe ña nu nyaá yu.

⁴⁴ Cuhva tsa tsiñi yu tsa cahán un, tan natuñu sehe yu tsitsi yu. Tyin síi xaan cuñí ra.

⁴⁵ Tan síi xaan cuñí tucu maa añima un tyin tsinú íñi un. Tyin cua cuvi cuhva tsa cahán Nyoo tshin un —catyí ña Elisabet.

- 46 Tan catyí ña María:
—Jacahnú yu tsi Nyoo tsihin tandihí ańima yu.
- 47 Tan sii xaan cuńí ańima yu tsihin Nyoo ra jacacú tsi yu.
- 48 Tyin cuví yuhu iin ñaha ndaahvi tan Nyoo nyehe ndaahvi ra tsi yu.
Tan vityin tandihí quiví cua cahan nyiví tyin cahnu xaan tumańi ińi ñihí yu.
- 49 Tyin Nyoo, cahnu xaan cuví ra. Tan cahnu tsa javahá ra tsihin yu.
Tan ii xaan siví ra.
- 50 Tan ndaahvi cuńí ra tsihin tandihí nyiví tsa cua coo tan tyaa yahvi ñi tsi ra.
- 51 Cahnu xaan tsa javahá ra tsihin tunyee ińi tsa iyó tsi ra.
Jatsiyo ra tsi nyiví tsa cahnu xaan tsicá ińi ñi.
- 52 Quinyaa ra tunyee ińi iyó tsi nu cuví rey.
Tan cua janducahnu ra tsi nyiví ndaahvi.
- 53 Tсахá Nyoo tsa vaha tsi nyiví cuńí coto tsa vaha.
Tan nyiví cuca tsa cuńí tyin nduve tsa tsińi ñuhu tsi ñi, tsihin ndaha ndi ñi, jacuhún ra tsi ñi.
- 54 Jatyinyeé ra tsi nyiví Israel tsa cuví ñi musu ra.
Tan ña naá ińi ra tsi ñi. Nyehé ndaahvi ra tsi ñi.
- 55 Tumaа cuhva catyí Nyoo tsihin ra Abraham, tsi tsaahnu yo, tan tsihin sehe ra, tacan ñi javahá maa Nyoo —catyí ña María.
- 56 Tan ña María ndoo ña tsihin ña Elisabet uńi yoo. Tan tsa yahá uńi yoo can tan cuanuhu ña nda yuvehe ña.

Quiví cacu ra Juan, ra tsa jacoondutyá tsi nyiví

- 57 Tsa tsaá quiví tsa cacu sehe ña Elisabet, jacacu ña iin rayi.

58 Tan nyiví vehe ña tsihin nyiví tsa iyó yatyin ñi yuvehe ña, sī xaan cuñí ñi. Tacan tucu maa ña. Tyin vaha xaan tsa javah̄a Nyoo tsihin ña.

59 Tan tsa quit̄a una quiví tsa cacu ra, tan tyāa ra naha tuñi Nyoo tsi ra tumaa cuhva iyó maa ñi. Tan cuñí ra naha tsa cunañi ra Zacarías tumaa nañí maa jutu ra.

60 Maa tyin sihi ra catyí ña:

—Ña cuví. Tyin Juan cua cunañi ra.

61 Tan catyí ra naha:

—¿Nacuenda jacunañí un Juan tsi ra? Tan yoñi nyiví ndo nañí tacan —catyí ra naha.

62 Tan quitsah̄a tsicá tuhun ra naha tsihin ndaha ra naha tsi jutu ra. Tyin coto ra naha náa sivi cuñí ra tsa cunañi ra.

63 Tan tsic̄an jutu ra iin vitu, tan nuu vitu ican tyāa ra: “Juan cua cunañi ra”, tyāa ra.

Tan tandih̄i maa ra ican naha ra iyo xaan cuñí ra naha tsa tacan.

64 Juvín ñi maa hora can nacah̄an ra Zacarías. Tan quitsah̄a jacahnú ra tsi Nyoo.

65 Tan tandih̄i maa nyiví iyó yatyin yuvehe ñi, iyo xaan cuñí ñi cuví. Tan tandih̄i maa nyiví tsa iyó yucu iyó Judea ican nacatyí tuhun tahan ñi tsa cuví can.

66 Tan tandih̄i maa nyiví tsa tsit̄o can, tsicá iñi ñi, tan tsicá tuhun tahan ñi tsi ñi:

—¿Yóo ra cua cuví ra lee ihya? —catyí ñi.

Tyin nditsa, Nyoo nasocó xaan ra tsi ra.

Nu jacahn̄u ra Zacarías tsi Nyoo

67 Ra Zacarías jutu ra Juan, ñihi nyaá Tatyí Ii Nyoo tsihin ra. Tan tsah̄a cuenda ra tsa caah̄an Nyoo tsihin ra, tan catyí ra:

68 —Cahnu xaan ra cuví Jutu yo Nyoo cuenda yo nyívi Israel.

Tyin quítsi ra nu yucú yo, tsa cuví yo nyívi maa ra.
Tan jacacú ra tsi yo.

69 Tan tsaha ra iin ra tsa cahnu xaan cuví tsi yo, ra
cua jacacu tsi yo.

Tata ra David, ra tsa cuví musu Nyoo cuvi ra.

70 Tacan cua javaha ra, catyí Nyoo tahañ tsanaha,
quívi cahañ ra cuví ndusu yuhu ra, tan catyí
ra naha tyehen:

71 Cua jacacu Nyoo tsi yo ndaha nu xaan iñi tsi yo,
tan nuu tandihi nu tsa ndasi cuñí nyehe tsi
yo.

72 Tan cua cundaahvi iñi ra nyehe ra tsi nyívi yo tsa
tsicoo tahañ tsanaha.

Tan cua nducuhun iñi ra tsa cahañ ra tsihin ñi
tahañ tsanaha.

73 Cahañ maa Nyoo tsihin ra Abraham, tsii
tsaahnu yo,

74 tan catyí ra tyin cua jacacu ra tsi yo ndaha nu
xaan iñi tsi yo.

Tyin ña cua nayuhvi ca yo jacahnu yo tsi ra.

75 Tan maa ra cua janaha ra cuhva coo yo.

Tan vaha cua coo yo nuu ra tan coo yo maa ñi tsa
cuenda maa ra tandihi quívi tsa cua coo yo
ñayívi —catyí ra Zacarías.

76 Tan catyí ra Zacarías tsihin lee can:

—Sehe luhlu yu, yooho cua cuvi un ndusu yuhu
Nyoo, ra nyaá gloria.

Tyin cuhun un ityi nuu Jutu Mañi yo. Tan cua
cahan un tuhun ra tsihin nyívi tyin tsa cuñí
quítsi ra.

77 Tan cua jacoto un tsi nyivi tyin cua jaha Nyoo tucahnu iñi tsi ñi.

Tacan tan cacu añima ñi.

78 Tyin Jutu yo Nyoo cuñi ra tsi yo. Tan cundaahví xaan iñi ra tsi yo.

Tan cua jaquitsi ra iin ra jatyinyee tsi yo. Tan cuvi ra tumaa ñuhū ñicanyii.

79 Tyin cua janaha ra ñuhū nditsin nu iyó nyivi nu naa, nu ndatú tuhun tsihi tsi ñi.

Cua janaha ra ityi ra tsi yo, ityi vaha —catyi ra Zacarías.

80 Tan ra luhlu can cua cuahnu ca ra. Ñihi xaan tsicoo tunyee iñi tsi ra tsihin Tatyí Ii Nyoo. Tan tsicoo ra iin tsiqui ndiínda cuando quivi tsa nacoto nyivi Israel tsi ra.

2

Quivi cacu ra Jesús

(Mt. 1.18-25)

1 Quivi ican tsicoo iin ra ndacá ñaha, ra cuví rey cahnu, nañi ra Augusto. Tava tyiñu ra tsi ra nyisó tyiñu naha ra na tyaa ra naha sivi tandihi nyivi tanií cahnu ñuu ñayivi.

2 Ihya cuvi tsa jihna ñi tsinyaa sivi nyivi. Tan ra Cirenio cuví ra ra ndacá ñaha tandihi ñuu nu cuví Siria.

3 Tan tandihi nyivi cuanuhu ñi ñuu ñi, tyin cua ndaca ñi sivi ñi.

4 Yacan quee ra José ñuu Nazaret tsa canyíí Galilea. Tan cuahán ra ñuu Belén tsa canyíí Judea, nu cacu ra rey David, tyin tata ra David cuví ra.

5 Cuahán ra cuandacá ra sivi ra tsihin ña María, tan tsa nyaá maa tsa cua tindaha ñi. Tan ñuhú sehe ña.

6 Tan tsa ndi yucú ca ñi ñuu Belén ican tan quitsaha cuuhví tsitsi ña tyin tsa cua cacu sehe ña.

7 Tan ican cacu sehe nuu ña. Tan cava nuu ña jahma tsi ra. Tan nacaquín ña tsi ra tsitsi iin canuva nu tsatsí quití itya. Tyin ña ñihí ñi iin vehe coo ñi.

Cuhva cahān ángel tsihin ra jahá cuenda mbee

8 Yatyin ñi ñuu Belén can yucú ra jahá cuenda mbee tsa tsacuaa.

9 Tan sana iñi ra naha quituví iin ángel Nyoo. Tan jandunditsin Jutu yo Nyoo tanií cahnu nu yucú ra naha. Tan nayuhví xaan ra naha.

10 —Ña nayuhví ndo —catyí ángel can—. Tyin vatsí cahan yu iin tsa vaha xaan tsihin ndo. Sii xaan cua cuñí tandihí cuii maa nyiví tsa cuenda tsi.

11 Vityin nda ñuu ra David cacu iin ra cua jacacu tsi nyiví. Cuví ra Cristo, ra cuví Jutu Mañi yo.

12 Tan tsihin cuhva ihya cua nacoto ndo tsi ra: cua nañihi ndo tsi ra lee ican, cavá nuu ra jahma tan canyí ra tsitsi iin canuva nu tsatsí quití —catyí ángel can tsihin ra jahá cuenda mbee can.

13 Tan juvin ñi cuhva ican quituví cuaha xaan ángel tsihin ángel can, tan jacahnú xaan ra naha tsi Nyoo, tan catyí ra naha:

14 Cahnu xaan cuví Nyoo, ra nyaá gloria.

Tan nu ñuhu ñayiví, na coo tsa vaha añima nyiví tsa ñihí tumañi iñi Nyoo, catyí ra ángel naha ra.

15 Tacan tan tsa cuanuhú ángel ican nda gloria. Tan catyí iin tan inga ra jahá cuenda mbee can naha ra:

—Cohon ndo Belén. Cunyehe yo náa cuví. Tyin maa Jutu yo Nyoo jacotó tsi yo —catyí ra naha.

16 Tacan tan numi xaan cuahán ra naha, tan nañihí ra naha tsi ra lee can tsihin ña María tan tsihin ra José. Tan canyíí ra lee can tsitsi iin canuva nu tsatsí quiiti itya.

17 Tan cuhva tsa nyehe ra naha tsi ra, quitsaha natuhún ra naha tandihí tuhun cahan ángel tsihin ra naha tsa cuenda lee ican tsihin ñi.

18 Tan tandihí nyivi tsa tsiñi tuhun caahán ra naha, iyo xaan cuñí ñi.

19 Maa tyin ña María naquihin cuenda ña tuhun ican tsitsi añima ña, tan tandihí tuhun ican tsicá iñi ña.

20 Tan cuanuhu ra jahá cuenda mbee ican naha ra. Tan jacahnú xaan ra naha tsi Nyoo tsa cuenda tandihí tsa nyehe ra naha tan tsa tsiñi ra naha. Tyin cunda cuhva tsa catyi ángel ican tsihin ra naha.

Nu tyaa cuenda ñi tsi ra Jesús ndaha Nyoo tsitsi vehe ñuhu cahnu

21 Tsa ndu uná quivi ra Jesús, tan tyaa ñi tuñi Nyoo tsi ra tyin tacan catyi tuhun tsahnu maa ñi. Tan jacunañi ñi Jesús tsi ra. Juvín ñi maa sivi tsa catyi ángel tsihin ña María quivi tsa ndi cumañi ca cahun ra Jesús tsitsi ña.

22 Tan tsa yaha quivi cuhva catyi ley Nyoo tsa tyaa ra Moisés tsa cuenda tsa nduvaha ña nuu Nyoo tsa cacu sehe ña; tacan tan cuahán ñi tsihin ra lee nda ñuu Jerusalén, tyin tyaa cuenda ñi tsi ra ndaha Nyoo.

23 Tacan ñi javaha ñi tyin catyi ley Nyoo tyin: “Tandihí sehe nuu ñi tsa cuví rayii, cua tyaa cuenda ñi tsi ra ndaha Jutu yo Nyoo”, catyi ley ican.

24 Tan tsahan ñi tsijamañi ñi uvi taahan quití, tyin tacan catyí maa ley Jutu yo Nyoo, nu catyí tsi tyehen: “Cuhva ndo uvi taahan curuu a uvi taahan paloma”, catyí ley can.

25 Tan quivi can iyó iin ra ñuu Jerusalén nañi ra Simeón. Iin ra cuiti xaan cuví ra, tan jacahnú ra tsi Nyoo. Ndatú ra nda cacu ra cua jacacu tsi ra tsihin tandihi ca nyivi ñuu Israel ican. Tan nyaá Tatyí Ii Nyoo tsihin ra Simeón.

26 Tan jacoto Tatyí Ii tsi ra tyin ña cúu naha ra tsa ndi cumañi ca nyehe ra tsi ra Cristo, ra cua jaquitsi Jutu yo Nyoo.

27 Tan Tatyí Ii jacuhun ra tsi ra Simeón can nda vehe ñuhu. Tan juvin ñi cuhva can tsaá jutu ra tan sihi ra Jesús tsihin maa ra nu cuví vehe ñuhu cahnu can, tyin javaha ñi cuhva catyí maa ley.

28 Tan cuhva tsa tsaá ñi nu nyaá ra Simeón tan quihin ra Simeón tsi ra Jesús. Tan tyihí jucun ndaha ra tsi ra. Tacan tan quitsaha jacahnú ra tsi Nyoo, tan catyí ra:

29 —Jutu Mañi yu, vityin tsa cundaa cuhva tsa catyí maa un tsihin yu, tsa cuví yu musu un, cuví jaña ndaha un tsi yu vityin, tan na cúu yu tsihin tsa vaha.

30 Tyin tsa nyehe tsihin nuu yu tsi ra cua jacacu tsi ndi.

31 Tsa iyó ra ihya ityi nuu tandihi nyivi.

32 Tan cua cuví ra ñuhu tsa cua jandunditsin añaima nyivi tsa ñavin nyivi Israel cuví.

Tan cahnu ca cua jaha ra tsi nyivi Israel, tsa cuví ndi nyivi cuenda maa un —catyí ra Simeón.

33 Tan ra José tsihin sihi ra Jesús, iyo xaan cuñi ñi tsa tsiñi ñi tsa cahan ra Simeón tsa cuenda lee ican.

³⁴ Tacan tan tsican tahvi ra Simeón tsa cuenda ñi. Tan catyí ra tsihin ña María sihi ra Jesús:

—Nyehē tsi lee ihya. Cuaha xaan nyivi Israel ñuu Nyoo cua tsinu iñi tsi ra quivi coto ñi tuhun ra, tan cua cacu ñi. Maa tyin cuaha ñi ña cua tsinu iñi ñi tsi ra. Nyoo tsaha ra tsi ra tan cuví ra tumaa seña tsa cuenda yo.

³⁵ Tacan tan coto tandihi yo náa tsicá iñi nyivi tun tsinú iñi ñi o ña tsinú iñi ñi tsi ra. Maa tyin tsa cuenda yooho, María, tsehe cuví tumaa iin mityi xaan tsa cua yaha añaima un —catyí ra Simeón tsihin ña.

³⁶ Tan ican, tsitsi vehe ñuhu cahnu can, nyií tucu iin ñaha tsa cuví ndusu yuhu Nyoo. Nañí ña Ana, tan sehe ra Fanuel, iin ra cuvi tata ra Aser, cuví tsi ña. Tan tsa tsahnu xaan ña. Tan nda luhlu ña tan tindaha ña, maa tyin utsa cuiya ñi tsicoo ña tsihin yi ña tan tsihi ra.

³⁷ Tan vityin tsa cumi xico cumi cuiya ña. Tan ña quitá maa ña tsitsi vehe ñuhu cahnu can, tyin nduvi tan ñiñu jacahnú ña tsi Nyoo, tan tsicán tahvi ña tan iyó nyitya ña.

³⁸ Tan juvin ñi tsa ndi nyií ca ra José tan ña María tsihin lee ican, tan tsaá ña Ana nu yucú ñi. Tan quitsaha nacuhvá ña tyahvi nyoo tsi Nyoo. Tan cahan ña tuhun ra Jesús tsihin tandihi nyivi tsa yucú ican, nyivi tsa ndatú tsa cacu ñuu Jerusalén.

Nu cuanuhu ñi nda ñuu Nazaret

³⁹ Tacan tan tsa yaha tsa javaha ñi tandihi maa tsa taahán tsi javaha ñi cuhva catyí ley Jutu yo Nyoo, tan cuanuhu ñi nda ñuu Nazaret tsa canyií Galilea nu cuví ñuu maa ñi.

⁴⁰ Tan ra luhlu Jesús vatsí cuahnu ca ra. Tan cua ndunyee ca ra, tan tsihin tsa tsiñi tuñi tsi maa ra. Tan Nyoo nasocó xaan ra tsi ra.

Nu cah̄an ra luhlu Jesús tsihin ra maestro cuenda ley vehe ñuhu naha ra

⁴¹ Ra José tsihin sihi ra Jesús tuhvá ñi tsicá vico pascua nda ñuu Jerusalén ndih̄i ñi cuiya.

⁴² Tan tsa quit̄a tsa utsi uvi cuiya ra Jesús, tan tsah̄an tandih̄i ñi nda ñuu Jerusalén, cuhva tuhun tsa iyó maa ñi.

⁴³ Tan quiv̄i ndih̄i vico, tan vatsí nuhu ñi, maa tyin ra luhlu Jesús ndoo ra ñuu Jerusalén can. Tan ña jah̄a jutu ra tan sihi ra cuenda.

⁴⁴ Tsicá iñi maa ñi tyin vatsí maa ra tyañu tandih̄i nyiv̄i ican. Tan ndih̄i iin quiv̄i tsicá ityi ñi. Tacan tan quitsah̄a nanducú ñi tsi ra tyañu nyiv̄i nacotó tsi ñi.

⁴⁵ Maa tyin ña nañih̄i ñi tsi ra. Tacan tan cuahán ñi nda ñuu Jerusalén inga tsaha cuananducú ñi tsi ra.

⁴⁶ Tan tsa yah̄a uñi quiv̄i tan nañih̄i ñi tsi ra tsitsi vehe ñuhu cah̄nu ican. Nyaá ra tyañu ra cuv̄i maestro cuenda ley vehe ñuhu naha ra. Tyaá soho ra tuhun caahán ra naha. Tan tsicá tuhun ra tsi ra naha.

⁴⁷ Tan tandih̄i nyiv̄i tsiñí tsa caahán ra, iyo xaan cuñi ñi tsihin tsa tsiñi tuñi tsa iyó tsi ra, tan tsihin tsa nacatyí tuhun ra.

⁴⁸ Cuhva tsa nyehē jutu ra tan sihi ra tsi ra, iyo xaan cuñi ñi, tan sihi ra catyí ña tsihin ra:

—Sehe luhlu yu. ¿Nacuvi tyin javah̄a un tyehen? Jutu un tan yuhu tuñú xaan cuñi ndi tan nanducú xaan ndi tsi un —catyí ña.

49 Tacan tan catyí ra Jesús:

—¿Nacuenda nanducú ndo tsi yu? ¿A ña tsitó ndo tyin ñiñi ca cuñí tsi nyehé yu tyiñu Jutu yu? —catyí ra.

50 Maa tyin ña cutuñi iñi ñi tsa caahán ra tsihin ñi.

51 Tacan tan cuanuhu ra tsihin ñi nda ñuu Nazaret. Tan vaha javahá ra tyin tyaá yahvi ra tsi ñi. Tan sihi ra naquihin vaha ña tandihi tuhun ihya tsitsi añima ña.

52 Tan ra Jesús cua cuahnu ca ra tan tsaá ca tsa tsiñi tuñi jiñi ra. Tan si xaan cuñí Nyoo tsihin ra, tacan tucu nyivi, si xaan cuñí ñi tsihin ra.

3

Nu cahan ra Juan, ra jacoondutya tsi nyivi, tuhun Nyoo nuu tsiqui
(Mt. 3.1-12; Mr. 1.1-8; Jn. 1.19-28)

1 Tsa quitá tsahun cuiya tsa cuví ra Tiberio rey cahnu, tan ra Poncio Pilato ndacá ñaha Judea. Tan ra Herodes ndacá ñaha ra Galilea. Tan yañi ra, ra Felipe ndacá ñaha ra Iturea tsihin Traconite. Tan ra Lisantias ndacá ñaha ra Abilinia quivi can.

2 Tan ra Anás tsihin ra Caifás cuví ra naha jutu tsaahnu tsa cuví ityi nuu. Quivi can cahan Nyoo tsihin ra Juan sehe ra Zacarías iin nu tsiqui.

3 Tan ra Juan tsicá nuu ra tandihi ñuu tsa cayucú yatyin ñi yutya cahnu Jordán, caahán ra tuhun Nyoo tsihin nyivi. Tan catyí ra tsihin ñi tyin na ndu uvi iñi ñi cuatyí ñi tan coondutya ñi. Tacan tan Nyoo cua jaha ra tucahnu iñi cuatyí ñi, catyí ra.

⁴Tumaa caahán tuhun tsa nyaá nu libru tsa tyaa ra Isaías, ra cuví ndusu yuhu Nyoo tahán tsanaha. Tan catyí ra:

Cua tyaa soho yo ndusu ra nu caná tsaa ra nu tsiqui tan catyí ra:

“Nuña ndo iin ityi cui^{ti} tan natyiso vaha ndo tsi ndo tyin tsa vatsi Jutu Mañi yo.

⁵Tumaa tsa tahví ndo yucu tan jandutú ndo xahva cunu, jandoó ndo ityi yacua, tan janduvahá ndo nu quiñi.

⁶Tacan tan tandihí nyíviⁱ cua nyehe ñi tsi ra tsa cua jaquitsi Nyoo tyin jacacu ra tsi yo.”

Tacan tan cahan ra Juan tsihin nyívi.

⁷Tan tsa cuahán nyíviⁱ tsa cuñí ñi jacoondutya ra tsi ñi, tan catyí ra tsihin ñi:

—¡Nyooho cuví ndo tumaa tata coo! ¿A cuñí ndo tyin tsihin tsa coondutya ñi ndo tan ña cua tatsi tuñi ca Nyoo tsi ndo? Ña cuví.

⁸Yacan nasama ndo cuhva iyó ndo, na nyehe yo tyin tsa ndu uví iñi ndo cuatyí ndo nuu Nyoo. Tan ña nduyaa ndo cahan ndo tyin nyíviⁱ tata ra Abraham cuví ndo. Tyin cuanda tsihin yuu ihya, Nyoo cuví jananduvi ra iin nyíviⁱ ra Abraham.

⁹Tsa ndatú yatsa Nyoo tsi tandihí ndo tyin cuví ndo tumaa yutun tsa ña tsahá tsiti vaha, cua tyahnya tun tan cua cayu tun, tacan cua javaha Nyoo tsihin ndo —catyí ra Juan.

¹⁰Tacan tan nducú tuhun ñi tsi ra tan catyí ñi:

—¿Tan nácaa javaha ndí? —catyí ñi.

¹¹Tacan tan nacahan ra Juan:

—Ra tsa iyó uvi taahan jahma, taahán tsi cuhva ra intuhun tsi tsi ra tsa nduve jahma. Tan ra tsa

iyó tsa catsi, taahán tsi cuhva ra luxu catsi ra tsa nduve tsa catsi —catyí ra.

¹² Tan tsaá tucu ra tsa tavá xuhun cuenda ra ndacá ñaha nda ñuu Roma, tsa cuñí ra naha coondutya ra naha. Tan nducú tuhun ra naha tsi ra Juan:

—Maestro, ¿nácaa javaha tucu nyuhu? —catyí ra naha.

¹³ Tan catyí ra Juan tsihin ra naha:

—Cuhva catyí ley ñi tava ndo xuhun. Tan ña jandaa ca ndo yahvi.

¹⁴ Tacan tan tsicá tuhun tucu andaru naha ra tsi ra:

—Tan nyuhu tucu, ¿nácaa javaha ndi? —catyí ra naha.

Tan nacañan ra Juan tan catyí ra:

—Ña quinyaa ca ndo tsa tsii nyivi. Tan ña jayuhvi ca ndo tsi ñi. Ña tyaa ndo cuatyí tsi ñi tatun nduve cuatyí ñi. Tan ndoo ndo vaha tsihin yahvi ndo —catyí ra Juan.

¹⁵ Tan quivi can tandihi nyivi ndatú ñi tsi ra Cristo. Tan tsicá iñi ñi tun juvin ra Juan cuví Cristo.

¹⁶ Maa tyin ra Juan catyí ra tsihin tandihi ñi:

—Tsa nditsa tyin jacoondutyá yu tsi ndo tsihin ndutya. Maa tyin vatsí inga ra tsa cahnu ca cuví, tan iyó ca tunyee iñi Nyoo tsi ra tan ñavin ca yuhu. Yacan cuenda ña taahán tsi tsi yu ndi tsa cuvi yu musu ra tan ndatsi yu ñi nditsan ra. Tan ra ican cua jacoondutya ra tsi ndo tsihin Tatyí Ii Nyoo, tan tsihin ñuhū ihñi.

¹⁷ Tan ra ican ndahá ra pala tyin cua jandava ra trigu. Cua natava sñn ra trigu vaha tan cua naquihvi vaha tsi jaha ra. Tan cua cahmi ra tsahan

t_{sa} q_{uita} t_{sihin} t_{rigu} c_{an} t_{sihin} ñ_{uh} t_{sa} ñ_a c_{ua} n_{dahva} m_{aa} —c_{at}yí r_a J_{uan} t_{sihin} ñ_i.

¹⁸ T_{an} t_{acan} c_{ahan} r_a J_{uan} t_{sihin} n_yi_vi c_{an}. T_{an} n_{áa} n_di_hi c_a m_{aa} c_{uhva} c_{ahan} r_a t_{an} j_{acot} r_a t_{si} ñ_i n_{áca}a t_{sa} c_{ua} q_{uitsi} S_{ehe} N_{yoo}.

¹⁹ T_{acan} t_{ucu} ñ_i n_{duxa}an r_a J_{uan} t_{si} r_a H_{erodes}, r_a n_{dacá} ñ_{aha} G_{alilea}, t_{sa} c_{uenda} t_{sa} n_{aq}u_{ih}in r_a t_{si} ñ_a H_{erodías}, ñ_{as}i_hi r_a F_{elipe}, y_añ_i r_a, t_{sihin} t_{sa} c_{uenda} n_{áa} n_di_hi t_{sa} ñ_a v_{aha} j_{avahá} r_a.

²⁰ M_{aa} t_{yn} ñ_a t_{ya}a y_{ahvi} m_{aa} r_a H_{erodes} t_{uhun} c_{ahan} r_a J_{uan}. N_u n_di_hi t_{uhun} t_{inyi} r_a t_{si} r_a J_{uan} t_{sitsi} v_{ehe} c_{aa}.

*Nu jacoonduty_a r_a J_{uan} t_{si} r_a J_{esucristo}
(Mt. 3.13-17; Mr. 1.9-11)*

²¹ T_{sa} n_di c_{umañi} c_a c_{uhun} r_a J_{uan} v_{ehe} c_{aa} t_{an} j_{acoonduty_a} r_a t_{si} t_{and}i_hi n_yi_vi. T_{an} j_{acoonduty_a} n_di_hi r_a t_{si} r_a J_{esús}. T_{sa} y_{ah}a t_{sicoonduty_a} r_a, t_{sic}an t_{ahvi} r_a t_{si} N_{yoo}, t_{acan} t_{an} n_{uñ}a a_{nd}i_vi.

²² T_{an} n_u T_{aty}i l_i N_{yoo} s_iq_{ui} r_a t_{umaa} i_{in} p_{aloma}. T_{an} c_{ahan} i_{in} n_dusu i_{ty}i s_iq_{ui} a_{nd}i_vi, t_{an} c_{at}yí t_{si} t_{yeh}en:

—Y_{oo}h_o c_uví S_{ehe} y_u, t_{an} c_{uñ}i x_{aan} y_u t_{si} u_n. T_{an} s_i x_{aan} c_{uñ}i y_u n_{yehé} y_u t_{si} u_n —c_{at}yí n_dusu i_{can} t_{sihin} r_a.

*Cuhva q_{uitsi} t_{ata} r_a J_{esucristo}
(Mt. 1.1-17)*

²³ T_{an} t_{sa} i_{yó} m_{aa} t_{an} o_{co} u_{tsi} c_{uiya} r_a J_{esús} t_{an} q_{uitsah}a j_{ahá} t_{yiñ}u r_a t_{yiñ}u N_{yoo}. T_{an} t_{and}i_hi n_yi_vi c_{uñ}i m_{aa} ñ_i t_{yn} s_{ehe} r_a J_{osé} c_uví t_{si} r_a. T_{an} r_a J_{osé}, s_{ehe} r_a E_{lí} c_uví t_{si} r_a.

²⁴ T_{an} r_a E_{lí}, s_{ehe} r_a M_{atat} c_uví t_{si} r_a. T_{an} r_a M_{atat}, s_{ehe} r_a L_{eví} c_uví t_{si} r_a. T_{an} r_a L_{eví}, s_{ehe}

ra Melqui cuv̄i tsi ra. Tan ra Melqui, sehe ra Jana cuv̄i tsi ra. Tan ra Jana, sehe ra José cuv̄i tsi ra.

²⁵ Tan ra José, sehe ra Matatías cuv̄i tsi ra. Tan ra Matatías, sehe ra Amós cuv̄i tsi ra. Tan ra Amós, sehe ra Nahum cuv̄i tsi ra. Tan ra Nahum, sehe ra Esli cuv̄i tsi ra. Tan ra Esli, sehe ra Nagai cuv̄i tsi ra.

²⁶ Tan ra Nagai, sehe ra Maat cuv̄i tsi ra. Tan ra Maat, sehe ra Matatías cuv̄i tsi ra. Tan ra Matatías, sehe ra Semei cuv̄i tsi ra. Tan ra Semei, sehe ra José cuv̄i tsi ra. Tan ra José, sehe ra Judá cuv̄i tsi ra.

²⁷ Tan ra Judá, sehe ra Joana cuv̄i tsi ra. Tan ra Joana, sehe ra Resa cuv̄i tsi ra. Tan ra Resa, sehe ra Zorobabel cuv̄i tsi ra. Tan ra Zorobabel, sehe ra Salatiel cuv̄i tsi ra. Tan ra Salatiel, sehe ra Neri cuv̄i tsi ra.

²⁸ Tan ra Neri, sehe ra Melqui cuv̄i tsi ra. Tan ra Melqui, sehe ra Adi cuv̄i tsi ra. Tan ra Adi, sehe ra Cosam cuv̄i tsi ra. Tan ra Cosam, sehe ra Elmodam cuv̄i tsi ra. Tan ra Elmodam, sehe ra Er cuv̄i tsi ra.

²⁹ Tan ra Er, sehe ra Josué cuv̄i tsi ra. Tan ra Josué, sehe ra Eliezer cuv̄i tsi ra. Tan ra Eliezer, sehe ra Jorim cuv̄i tsi ra. Tan ra Jorim, sehe ra Matat cuv̄i tsi ra.

³⁰ Tan ra Matat, sehe ra Leví cuv̄i tsi ra. Tan ra Leví, sehe ra Simeón cuv̄i tsi ra. Tan ra Simeón, sehe ra Judá cuv̄i tsi ra. Tan ra Judá, sehe ra José cuv̄i tsi ra. Tan ra José, sehe ra Jonán cuv̄i tsi ra. Tan ra Jonán, sehe ra Eliaquim cuv̄i tsi ra.

³¹ Tan ra Eliaquim, sehe ra Melea cuv̄i tsi ra. Tan ra Melea, sehe ra Mainán cuv̄i tsi ra. Tan ra Mainán, sehe ra Matata cuv̄i tsi ra. Tan ra Matata, sehe ra Natán cuv̄i tsi ra.

³² Tan ra Natán, sehe ra David cuv̄i tsi ra. Tan ra David, sehe ra Isaí cuv̄i tsi ra. Tan ra Isaí, sehe ra Obed cuv̄i tsi ra. Tan ra Obed, sehe ra Booz cuv̄i tsi ra. Tan ra Booz, sehe ra Salmón cuv̄i tsi ra. Tan ra Salmón, sehe ra Naasón cuv̄i tsi ra.

³³ Tan ra Naasón, sehe ra Aminadab cuv̄i tsi ra. Tan ra Aminadab, sehe ra Aram cuv̄i tsi ra. Tan ra Aram, sehe ra Esrom cuv̄i tsi ra. Tan Esrom, sehe ra Fares cuv̄i tsi ra. Tan ra Fares, sehe ra Judá cuv̄i tsi ra.

³⁴ Tan ra Judá, sehe ra Jacob cuv̄i tsi ra. Tan ra Jacob, sehe ra Isaac cuv̄i tsi ra. Tan ra Isaac, sehe ra Abraham cuv̄i tsi ra. Tan ra Abraham, sehe ra Taré cuv̄i tsi ra. Tan ra Taré, sehe ra Nacor cuv̄i tsi ra.

³⁵ Tan ra Nacor, sehe ra Serug cuv̄i tsi ra. Tan ra Serug, sehe ra Ragau cuv̄i tsi ra. Tan ra Ragau, sehe ra Peleg cuv̄i tsi ra. Tan ra Peleg, sehe ra Heber cuv̄i tsi ra. Tan ra Heber, sehe ra Sala cuv̄i tsi ra.

³⁶ Tan ra Sala, sehe ra Cainán cuv̄i tsi ra. Tan ra Cainán, sehe ra Arfaxad cuv̄i tsi ra. Tan ra Arfaxad, sehe ra Sem cuv̄i tsi ra. Tan ra Sem, sehe ra Noé cuv̄i tsi ra. Tan ra Noé, sehe ra Lamec cuv̄i tsi ra.

³⁷ Tan ra Lamec, sehe ra Matusalén cuv̄i tsi ra. Tan ra Matusalén, sehe ra Enoc cuv̄i tsi ra. Tan ra Enoc, sehe ra Jared cuv̄i tsi ra. Tan ra Jared, sehe ra Mahalaleel cuv̄i tsi ra. Tan ra Mahalaleel, sehe ra Cainán cuv̄i tsi ra.

³⁸ Tan ra Cainán, sehe ra Enós cuv̄i tsi ra. Tan ra Enós, sehe ra Set cuv̄i tsi ra. Tan ra Set, sehe ra Adán cuv̄i tsi ra. Tan ra Adán, sehe Nyoo cuv̄i tsi ra.

4

*Nu nducú cuhva nu ña vaha tsi ra Jesús
(Mt. 4.1-11; Mr. 1.12-13)*

¹ Tan ñihi nyaá Tatyí Ii Nyoo tsihin ra Jesús tsa yaha tsicoondutya ra, quita ra yutya Jordán tan cuanuhu ra. Tan quihín Tatyí Ii Nyoo tsi ra, tan tsahan ra iin nu cuví nu tsiquí

² nu tsinyijí ra uvi xico nduvi. Tan ña tsatsí maa ra tandíhi quiví ican. Yaha can tan quítsí tsa tsisocó ra. Tan nducú cuhva nu ña vaha tsi ra.

³ Tan catyí nu tsihin ra:

—Tatun juvin Sehe Nyoo cuví tsi un, çahan tsihin yuu ihya, na nanduvi tsi paan catsi un.

⁴ Tan ra Jesús nacahan ra tan catyí ra:

—Tuhun Nyoo tsa nyaá nu tutu, catyí tsi tyin ña maa ñi tsihin tsa catsi nyívi coonyito ñi, tyin coonyito ñi tsihin tandíhi tuhun caahán Nyoo —catyí ra Jesús tsihin nu ña vaha.

⁵ Tacan tan quihín nu ña vaha tsi ra Jesús, cuahán ra iin jiñi yucu sucun. Tan iin yaha ñi janaha nu tandíhi tsa cuca nu ndacá ñaha nu ñuu ñayívi ihya tsi ra Jesús.

⁶ Tan catyí nu tsihin ra:

—Cuhva yu tandíhi tsa nyehé un tun cuñí un tyin maa Nyoo tsaha tsa cundaca ñaha yu tandíhi can, tan ndáa ra cuñí yu cuhva yu can, cuví tsi ra.

⁷ Tatun yooho tan cuiñi tsiti un nuu yu ihya tan jachnu un tsi yu, tandíhi can cua cuhva yu tsi un —catyí nu ña vaha tsihin ra.

⁸ Tan nacahan ra Jesús, tan catyí ra:

—Jatsiyo nyaha tsi un nuu yu, cuihna. Tyin nu tutu Nyoo catyí: “Jachnu tsi intuhun ñi maa Jutu

Nyoo. Tan tyiñu intuhun ñi maa ra taahán tsi javaha un.”

⁹ Tacan tan quihin nu ña vaha tsi ra Jesús inga tsaha. Tan cuahán nu tsihin ra nda ñuu Jerusalén. Tan jandaá nu tsi ra iin nu sucun xaan nda jiñi vehe ñuhu cahnu. Tan catyí nu tsihin ra:

—Tatun Sehe Nyoo cuví tsi un, ndava nu nyaá un ihya nda cuanda nu ñuhu.

¹⁰ Tyin catyí tsi nu tutu Nyoo tyin:
Nyoo cua tava tyiñu ra tsi ángel ra tan jaha cuenda ra naha tsi un.

¹¹ Cua janahndi ra naha tsi un. Tan ña cua nañi tsaha un nu yuu.

¹² Tacan tan nacañan ra Jesús tan catyí ra:

—Tan juvin ñi catyí tuhun Nyoo: “Ña nducu cuhva xaan un tsi Nyoo un” —catyí ra Jesús.

¹³ Tan tsa ndihí nducu cuhva nu ña vaha tsi ra Jesús, tacan tan nacoq nuu nu tsi ra.

Nu quitsaha caahán ra Jesús tuhun Nyoo tsihin nyivi

(Mt. 4.12-17; Mr. 1.14-15)

¹⁴ Tan tsa yaha tsa nducu cuhva nu ña vaha tsi ra Jesús tan cuanuhú ra nda Galilea tsihin tsa tsitú tunyee ñi Tatyí li Nyoo tsi ra. Tan tsitó nyivi tuhun ra ñi cahnu Galilea can.

¹⁵ Tan jacuahá ra tsi nyivi nu cuví vehe ñuhu tandihí ñi ñuu. Tan tandihí ñi jacahnú ñi tsi ra.

Tsa tsaq nyico ra Jesús ñuu Nazaret nu tsahnú ra
(Mt. 13.53-58; Mr. 6.1-6)

¹⁶ Tacan tan tsaq nyico ra Jesús ñuu Nazaret nu tsahnú ra. Tan iin quivi quitatú nyivi, quihvi ra

tsitsi vehe ñuhu, tumaa tsa tuhvá maa ra tsicá. Tan nduvita ra cua cahvi ra tuhun Nyoo.

17 Tan tsaha ra naha iin libru tsa tyaa ra Isaías ra cuvī ndusu yuhu Nyoo. Tan kuhva tsa nuña ra, nañihī ra iin nu catyí tsi:

18 Iyó Tatyí Ii Nyoo tsihin yu, tyin maa Nyoo tava tyiñu tsi yu

cahan yu tuhun ra tsihin nyivi ndaahvi.

Tan janduvaha yu tsi nyivi tsa uhvi añima.

Tan maa ra tava tyiñu tsi yu tyin jacoto yu tsi nyivi yihí ndaha nu ña vaha, tyin tsa cua quita nuña ñi tan maa ra cua jacacu tsi ñi.

Tan cua jananyehe yu tsi nyivi cuaa.

Tan cua nacoo nuña yu tsi nyivi tsa iyó tundoho.

19 Tan jacoto yu tsi nyivi tyin tsa quita quivi tsa nyaá Nyoo tumañi ñi tsihin ñi.

20 Tacan tan ndihī cahvi ra tan nacasi ra nuu libru can. Tan nacuhva ra tsi iin ra tsa jatinyeé tsihin tyiñu vehe ñuhu can. Tan tsinyaá ra Jesús. Tacan tan tandihī nyivi tsa nyecú ican, ndoo ñi tsa nyehé ñi tsi ra.

21 Tacan tan catyí ra tsihin ñi:

—Vityin quivi ihya tsa cundaá kuhva catyí tuhun Nyoo tsa cahvi yu tsiñi ndo —catyí ra Jesús tsihin ñi.

22 Tan tandihī nyivi tsa nyecú can, vaha xaan cahan ñi tuhun ra. Tan iyo xaan cuñi ñi tsihin tandihī tsa vaha tsa cahan ra. Tacan tan quitsaha tsicá tuhun tahan ñi:

—¿A ñavin ra ihya cuví sehe ra José?

23 Tan nacaahan ra Jesús:

—Tsa nditsa tyin tyehen tsicá ñi ndo nyehé ndo tsi yu: “Yooho ra janduvahá tsi nyivi, janduvaha

jihna tsi maa un.” Tan cuñí tucu ndo catyí ndo: “Tandihí tsa javaha un ñuu Capernaum tsitó ndi, javaha ndihí tucu can ñuu maa un ihya.”

²⁴ Tan cahan ra Jesús inga tsaha, tan catyí ra:

—Tsa nditsa tyin ndi intuhun ra cuví ndusu yuhu Nyoo, tan ña tsinú iñi nyivi ñuu ra naha tsi ra naha.

²⁵ Tan tsa nditsa tyin cuaha xaan ñi ndaahvi tsa tsihi yí tsicoo Israel ihya quivi tsa tava Nyoo tyiñu tsi ra Elías, ra cuví ndusu yuhu ra, tan ra ícan cuví iin ra Israel ihya tsica ra cahan ra tuhun Nyoo. Tan quivi can ña cuun maa savi uñi cuiya sasava. Tan tsicoo tama cahnu xaan.

²⁶ Tan ñavin tsa cuenda ndi intuhun maa ñi Israel ihya tava Nyoo tyiñu tsi ra Elías cuahán ra. Maa tyin tsahan ra jatyinyee ra tsi iin ñaha ndaahvi tsihi yí tsa tsicoo ñuu Sarepta tsa canyí Sidón.

²⁷ Tacan tucu quivi tsica inga ra cuví ndusu yuhu Nyoo cuenda nyivi Israel, ra Eliseo. Cuaha xaan ra cuuhví tsihin cuehe tyaahyú tsicoo Israel ihya, tan ndi intuhun ra naha tan ña nduvaha ra naha. Nduvaha intuhun ñi ra Naamán ra quee ñuu Siria —catyí ra Jesús.

²⁸ Tsa yaha tsiñi ñi tandihí tuhun can, tandihí nyivi tsa yucú tsitsi vehe ñuhu can xaan xaan cuñí ñi cuví.

²⁹ Tan nduvita ñi. Tan tava ñi tsi ra Jesús nda jiñi yucu sucun nda yuhu ñuu, tsa cuñi ñi janacava ñi tsi ra ícan.

³⁰ Maa tyin ra Jesús yaha ra tyañu ñi tan cuahán ra.

*Nu quitá tatyí ña vaha tsa yihí tsi iin rayi#
(Mr. 1.21-28)*

³¹ Tan cuahán ra Jesús ñuu Capernaum tsa canyí Galilea. Tan jacuahá ra tsi nyivi tsitsi vehe ñuhu tandihí sauru, quivi tuhvá nyivi quitatú.

³² Tan iyo xaan cuñí ñi tsihin tsa cahan ra. Tyin ñihi xaan cahan ra tumaa tuhvá ra cumí tyiñu caahán.

³³ Tan iin quivi nyii ra Jesús vehe ñuhu tan iin ra yihí tatyí ña vaha catyí ra caná tsaa ra jahá tatyí ña vaha can:

³⁴ —Yooho Jesús, ra ñuu Nazaret, jaña tsi ndi. ¿Náa nducú un tyihí un tsi un tsihin ndi? ¿A vatsí un vatsí janaa un tsi ndi? Yuhu nacotó vaha yu tsi un. Yooho cuví Sehe Ii Nyoo.

³⁵ Tacan tan nduxaan ra Jesús tsi tatyí ña vaha tsa yihí tsi ra can tan catyí ra:

—Taxin ñi coo yooho. Quita tsi ra ihya —catyí ra Jesús tsihin nu.

Tacan tan nyehé ñi nyivi nduva ra can nu ñuhu jahá tatyí ña vaha can, tan nduve ca náa javaha nu tsi ra can. Tan quitá nu cuahán nu.

³⁶ Tandihí nyivi tsa nyehe can, iyo xaan cuñí ñi tan yuuhví ñi cuvi. Tan quitsaha tsicá tuhun tahan ñi:

—¿Náa tuhun cuví tsa caahán ra ihya? Tyin nda cuanda tsihin tatyí ña vaha tan ñihi caahán ra, tan quitá tatyí ña vaha ican —catyí ñi.

³⁷ Tacan tan tandihí ñi ityi quitá natuhun nyivi tuhun ra Jesús.

*Nu janduvaha ra Jesús tsi ña tyiso ra Simón Pedro
(Mt. 8.14-15; Mr. 1.29-31)*

³⁸ Tacan tan quitā ra Jesús tsitsi vehe ñuhu can. Tan cuahán ra vehe ra Simón. Tan nu tsaā ra can, canyíí ña tyiso ra Simón cuuhví ña tan ñihi xaan yihí cahñi tsi ña. Tacan tan caahán ndaahvi ñi tsihin ra na janduvaha ra tsi ña.

³⁹ Tacan tan natuhvā ra nu canyíí ña tan nacañi nuu ra jiñi ra tan cahan ra tsihin cahñi can na quita tsi. Tacan tan quitā cahñi can iin yaha ñi, tan nduvitā ña can, quitsahā nanducú ña tsa catsi ra Jesús.

*Nu cuaha xaan nyivi cuuhví janduvahā ra Jesús
(Mt. 8.16-17; Mr. 1.32-34)*

⁴⁰ Tan tsa tyiso ñicanyii, tandihi nyivi tsa iyó ñi cuuhví vehe ñi tsihin siin siin nuu cuehe, quitsi ndaca ñi tsi ñi can tsi ra Jesús. Tan tyiso ndaha ra jiñi intuhun intuhun ñi cuuhví can tan janduvahā ra tsi ñi.

⁴¹ Tan cuaha xaan nyivi quitā tatyí ña vaha tan canā tsaa nahnu, tan catyí nahnu:

—Yooho cuví Sehe Nyoo.

Maa tyin ra Jesús nduxaan ra tsi nahnu tan ña tsahā ra tsa cahan nahnu, tyin tsitó nahnu tyin juvin ra cuví Cristo.

*Nu tsicā ra Jesús cahan ra tuhun Nyoo tandihi
ñuu cayucú Galilea
(Mr. 1.35-39)*

⁴² Tsa tuvi inga quivi, tan quee ra Jesús ñuu can. Tan cuahán ra iin nu taxin caá. Tan nyivi nanducú ñi tsi ra. Tan tsaā ñi nda nu nyíí ra ican. Tan cuñí ñi tsa ña cuhun ca ra.

⁴³ Tacan tan catyí ra Jesús tsihin ñi:

—Ndi cuñí ca tsi jacoto yu tsi nyívi tandihí ca ñuu nácaa tan quíhví Nyoo añaíma ñi tan cundaca ñaha ra tsi ñi. Tyin yacan cuenda vatsí yu nu ñuhu ñayívi ihya.

⁴⁴ Tan tacan ñi tsicá ra Jesús caahán ra tuhun Nyoo vehe ñuhu tandihí ñi ñuu tsa cayucú Galilea.

5

Nu tsaḡa ra Jesús ndatu tsa cuaha xaan tyaca ñihí ra naha

(Mt 4.18-22; Mr. 1.16-20)

¹ Iin quívi nyaá ra Jesús yuhu miñi nu cuví Genesaret. Tan tsaḡ cuaha xaan nyívi, tyin cuñí ñi tyaa soho ñi tuhun Nyoo. Tan tíhin xaan nyíi ra Jesús tyañu ñi.

² Tan nyeḡe ra uvi taahan yutun ndoo yatyin ñi yuhu miñi ican. Yoñi yucú tsitsi yutun ndoo can tyin tsa quitḡa ra tíin tyaca. Tan nacatyá ra naha traya.

³ Tacan tan quíhví ra Jesús tsitsi iin yutun ndoo tsa cuví tsii ra Simón. Tan catyí ra Jesús tsihin ra Simón tyin na jacuhun ra can nda mahñu miñi. Tacan tan tsinyaḡa ra Jesús tsitsi yutun ndoo can. Tan quitsaḡa caahán ra tsihin nyívi.

⁴ Cuhva tsa ndihí caḡan ra tsihin ñi, tan catyí ra tsihin ra Simón:

—Jacuhun yutun ndoo nda nu cunu ca. Tan jacuhun traya tyin tacan tan tíin ndo tyaca.

⁵ Tan nacaḡan ra Simón tan catyí ra:

—Maestro, tsa jaḡa tyiñu xaan ndi ñiñu maa tan ndi intuhun maa tyaca ña ñihí ndi. Maa tyin tatun maa un catyí, cua jacuhun nyíco ndi traya.

⁶ Cuhva tsa jacuhun nyico ra naha traya ra, tan cuaha xaan tyaca ñihí ra naha. Ndihi maa traya can quitsahá tyaahnyá tsihin tsa vee tyaca can.

⁷ Tacan tan jandahá ra naha tsi ra tsa yucú inga yutun ndoo tyin quitsi ra naha cutahan ra naha tsihin ra naha. Tacan tan tsaá ra can naha ra. Tan jacutu ra naha nduvi taahan yutun ndoo can tsihin tyaca. Tan cuñi nyee yutun ndoo ra naha tsihin tsa tsitú tyaca.

⁸ Tsa nyehe ra Simón Pedro tsa cuvi tacan, tan tsicuiñi tsiti ra nuu ra Jesús, tan catyí ra tsihin ra:

—Jatsiyo tsi un nuu yu, Jutu Mañi yu, tyin yuhu ra iyó cuatyí cuví yu —catyí ra Simón.

⁹ Tyin ra Simón tsihin tandihí ra yucú tsihin ra, nayuhvi xaan ra naha tsa cuenda tsa cuaha xaan tyaca ñihí ra naha.

¹⁰ Tacan tucu ra cutahán tsihin ra Simón: ra Jacobo tan ra Juan, sehe ra Zebedeo, nayuhvi xaan ra naha. Tan ra Jesús catyí ra tsihin ra Simón:

—Ña nayuhvi un, tyin vityin tan nda nu cuahán ca tsi ityi nuu, tumaa tsa tñin ndo tyaca ihya, tacan cua ñihi un nyivi cua cuvi nyivi Nyoo, tan cua tava un tsi ñi nu caquiñi, na quihvi ñi cuenda Nyoo —catyí ra Jesús tsihin ra Simón.

¹¹ Tacan tan tava ra naha yutun ndoo can nda nu ñuhu ityi. Tan nacoq ra naha tandihí tsa iyó tsi ra naha. Tan cuahán ra naha tsihin ra Jesús.

Nu janduvahá ra Jesús tsi iin ra ndohó cuehe tyaahyú

(Mt 8.1-4; Mr. 1.40-45)

¹² Iin quivi nyii ra Jesús iin ñuu nu iyó iin ra ndohó cuehe tyaahyú. Tan tsa nyehe ra tsi ra Jesús,

tan tsicuiñi tsiti ra nuu ra. Tan nacañi nuu ra jiñi ra nda nu ñuhu. Tan caahán ndaahvi ra tsihin ra Jesús, tan catyí ra:

—Jutu Mañi yu, tun yooho tan cuñi un, cuví janduvaha un tsi yu —catyí ra.

¹³ Tacan tan tyiso ndaha ra Jesús jiñi ra cuuhví can, tan catyí ra:

—Cuñi yu janduvaha yu tsi un. Cua nduvaha un vityin —catyí ra Jesús tsihin ra cuuhví can.

Tan iin yaha ñi nduvaha ra.

¹⁴ Tacan tan catyí ra Jesús tsihin ra:

—Coto catyi tuhun un tsihin nyivi. Intuhun ñi tsa cua cahan yu tsihin un, cuaahan nu nyaá ra cuví jutu. Tan janaha tsi un tsi ra. Tan cuhva tsa taahán tsi jamañi un tumaa tsa caahán ley tsa tyaa ra Moisés, tan cua cuvi tsi iin tsandaa tsi ra jutu can tan tsi nyivi tyin tsa nduvaha un —catyí ra Jesús tsihin ra.

¹⁵ Vasu ndi maa tsa ña cuñi ra Jesús tsa coto nyivi, ñihi ca quitá tuhun ra. Tan cuaha xaan nyivi ndu iin tyin cuñi ñi tyaa soho ñi tsa caahán ra tan janduvaha ra tsi ñi.

¹⁶ Maa tyin ra Jesús, jatsiyó, jatsiyó ñi ra tsi ra nu iyó nyivi. Tan cuahán ra nu taxin caá, cua ndacan tahvi ra tsi Nyoo Jutu ra.

Nu janduvaha ra Jesús tsi iin ra xii

(Mt. 9.1-8; Mr. 2.1-12)

¹⁷ Iin quivi jacuahá ra Jesús tsi nyivi. Tan yucú juhva ra fariseo, ra tyaa yahvi xaan ley Nyoo tsa tyaa ra Moisés tsanaha. Tan yucú tucu juhva ra maestro cuenda ley vehe ñuhu ican. Quita ra naha ñuu Jerusalén, tan inga ñuu nyihi tan# cahnu

Galilea tan Judea. Tan iyó xaan tunyee iñi Nyoo tsi ra Jesús tsa janduvaha ra tsi nyivi cuuhví.

¹⁸ Tacan tan tsaꝯ ra naha tan nyisó ra naha iin ra cuuhví tsihin cuehe xii nu tsito. Tan cuñí ra naha quihví ra naha tsitsi vehe tan caquin ra naha tsi ra cuuhví can nu nyii ra Jesús.

¹⁹ Maa tyin ña ñihí ra naha nu quihví ra naha tyin tuvi xaan nyivi. Tacan tan ndaꝯ ra naha ityi jiñi vehe. Tan jatsiyó ra naha tyiyo. Tacan tan januu ra naha tsi ra cuuhví can nuu nyii ra Jesús tyañu nu tuvi nyivi can.

²⁰ Tan nyehe ra Jesús tyin tsinú xaan iñi ra naha tsi ra. Tan catyí ra tsihin ra cuuhví can:

—Tsa tsicoꝯ tucahnu iñi tsi un, tsa cuenda cuatyí un —catyí ra Jesús tsihin ra can.

²¹ Tacan tan ra maestro cuenda ley vehe ñuhu tsihin ra cuví fariseo, quitsaha tsicá iñi ra naha: “¿Yóo ra cuví ra ihya? Tsicoꝯ cuatyí ra nuu Nyoo tsa cuenda tsa caahán ra. Tyin catyí ra tyin tsa tsicoꝯ tucahnu iñi tsi ra can, tan intuhun ñi maa Nyoo cuví jaha tucahnu iñi tsi yo”, cuñí ra naha tsicá iñi ra naha.

²² Maa tyin ra Jesús tsitó ra tsa tsicá iñi ra naha. Tan catyí ra tsihin ra naha:

—¿Nacuenda tsicá iñi ndo tacan?

²³ ¿Náa tsa yí ca catyí yo? ¿A yí ca tyi yo: “Cuatyí un tsa yaha ndatsi”, a yí ca catyí yo tsihin iin nyivi xii: “Nduvita tan çaça un”?

²⁴ Maa tyin vityin cua janaha yu tsi ndo tyin yuhu Rayí tsa quee nda gloria iyó ndatu tsi yu tsa jahá yu tucahnu iñi tsi ndo —catyí ra Jesús.

Tsa yaha cahan ra tacan, tan catyí ra tsihin ra cuuhví can:

—Nduvita. Naquihin tsito un tan cuanuhu yuvehe un.

²⁵ Tan nduvita ra can, tan naquihin ra tsito ra. Tan cuanuhu ra yuvehe ra, juvin ñi jacahnú ra tsi Nyoo.

²⁶ Tandihí nyivi iyo xaan cuñí ñi. Tan yuuhví xaan ñi. Tan jacahnú ñi tsi Nyoo, tan catyí ñi:

—Vityin nditsa nyehé yo tsa iyo xaan —catyí ñi.

Nu cana ra Jesús tsi ra Leví

(Mt. 9.9-13; Mr. 2.13-17)

²⁷ Yahá can tan quitá ra Jesús vehe can. Tan nanyehé ra tsi iin ra tsa tavá xuhun cuenda ra ndacá ñaha iyó nda ñuu Roma. Tan nañí ra Leví. Tan nyaá ra nu tyahví nyivi. Tan catyí ra Jesús tsihin ra:

—Cohon tsihin yu —catyí ra.

²⁸ Tacan tan nduvita ra Leví. Tan nacoó ra tandihí tsa iyó tsi ra. Tan cuahán ra tsihin ra Jesús.

²⁹ Tacan tan javaha ra Leví iin vico cahnu vehe ra cuenda ra Jesús. Tan cuaha xaan ra tavá xuhun cuenda ra ndacá ñaha nyecú ra naha nu mesa. Tan nyecú tucu inga nyivi.

³⁰ Tan ra fariseo naha ra tsihin ra cuví maestro cuenda ley vehe ñuhu naha ra, quitsahá caahán nyaa ra naha tsi ra tsicá tsihin ra Jesús:

—¿Nacuvi tsatsí ndo tan tsihí ndo tsihin ra tavá xuhun naha ra tan tsihin ra iyó cuatyí naha ra? —catyí ra naha.

³¹ Tan ra Jesús nacahan ra, tan catyí ra:

—Ña tsiñí ñuhu doctor tsi ra tsa vaha maa. Ra cuuhví, cuví ra tsiñí ñuhu doctor.

³² Yuhu ña vatsí yu jatyinyee yu tsi nyivi tsa tsicá ñi tyin vaha ñi, vatsí yu jatyinyee yu tsi nyivi tsitó

tyin iyó cuatyí ñi, tan cuví nasama ñi cuhva iyó ñi
—catyí ra Jesús tsihin ra naha.

*Nu janaha ra Jesús tyin tatun tsa cuahán ra cua
coo nyitya nyivi nyicún tsi ra
(Mt. 9.14-15; Mr. 2.18-20)*

³³ Tacan tan tsicá tuhun ra naha tsi ra Jesús, tan
catyí ra naha:

—Ra tsicá tsihin ra Juan tsicoó nyitya ra naha,
tan ña tsatsí ra naha tan nanducú ra naha tsi Nyoo,
tan tacan tucu ra cuví fariseo naha ra. Maa tyin
ra tsicá tsihin yooho, ndihi quivi tsatsí ra naha tan
tsihí ra naha. ¿Nacuvi? —catyí ra naha.

³⁴ Tan nacahan ra Jesús, tan catyí ra:

—¿A cuví coonyitya nyivi yucú vico tindaha jaha
ndo tatun nyii ra tsa cua tindaha tsihin ñi? Ña cuvi.
[Tyin sii cuñí ñi, tan cuñí ñi catsi ñi.]

³⁵ Maa tyin cua quita quivi tsa cua jatsiyo ra
tindaha ican tsi ra nu yucú ñi. Tacan tan cua
coonyitya ñi.

*Nu jacuahá ra Jesús tyin ña nacatsí tahan tuhun
tsahnu tsa iyó nyivi tsihin tuhun tsa tsa jacuahá ra
(Mt. 9.16-17; Mr. 2.21-22)*

³⁶ Tacan tan cahan tucu ra Jesús iin cuhva tsihin
nyivi, tan catyí ra:

—Yoñi tsaahnyá iin jahma tsa, tan naquicú ñi
tsihin jahma tuuhu. Tyin tatun javaha ñi tacan,
nandiyi jahma tsa can. Tan ña ndoo vaha tsi
tsihin jahma tuuhu can.

³⁷ Tan tacan tucu, ña cuví tyihi nyivi vinu tsa
tsitsi ñi tsaahnu. Tyin cua tyahnya ñi can tsihin
vinu tsa can. Tan cua tivi vinu can tan tivi ndihi
tucu ñi tsaahnu can.

³⁸ Yacan cuenda taahán tsi tyihi yo vinu tsa tsitsi ñi tsa. Tyin tacan tan nduvi taahan tsi tan cua jaha cuenda tahan tsi itsi.

³⁹ Tan yoñi tsihi vinu tsahnu, tan cuñi ñi coho ñi vinu tsa. Tyin catyí ñi, vaha ca vinu tsahnu. [Vinu tsahnu can cuñi tsi catyí tyin cuví tsi cuhva iyó maa ñi.]

6

Nu tuhún ra tsicá tsihin ra Jesús yoco itya trigu quivi quitatú nyivi

(Mt. 12.1-8; Mr. 2.23-28)

¹ Iin quivi quitatú nyivi, yahá ra Jesús mahñu tsa tatsi nyivi. Tan ra tsicá tsihin ra tuhún ra naha yoco trigu. Tan jocon ra naha can tsihin ndaha ra naha. Tan tsatsi ra naha tsi can.

² Tacan tan catyí ra fariseo naha ra tsihin ra naha:

—¿Nacuenda javahá ndo iin tyiñu tsa ña taahán tsi javaha yo quivi quitatú yo?

³ Tan nacahan ra Jesús, tan catyí ra:

—¿A ñaha ca cahvi ndo nu tsahá cuenda tsi tsa javahá ra David tan ra cutahán tsihin ra quivi tsa tsisoco ra naha?

⁴ Quihvi ra tsitsi vehe Nyoo. Tan quihin ra paan tsa tyiso nyivi nuu altar Nyoo. Tan tsatsi ra. Tan tsahá ndihi ra tsi ra tsa cutahán tsihin ra. Tan maa ñi maa ra cuví jutu naha ra taahán tsi catsi paan can —catyí ra Jesús.

⁵ Tacan tan catyí ra Jesús:

—Rayi tsa quee nda gloria iyó ndatu tsi ra tsa cahan ra tsihin intuhun intuhun ndo náa taahán tsi javaha ndo quivi quitatú yo —catyí ra.

*Nu janduvaha ra Jesús tsi iin ra na ityi ndaha
(Mt. 12.9-14; Mr. 3.1-6)*

⁶ Inga qui_{iv}i quitatú nyi_{iv}i qui_{ihv}i ra Jesús tsitsi vehe ñuhu. Tan quitsaha jacuahá ra tsi nyi_{iv}i. Tan nyehe ra tsi iin ra tsa na ityi ndaha cuaha.

⁷ Tan ra cuví maestro cuenda ley vehe ñuhu naha ra tsihin ra cuví fariseo naha ra, nducú cuhva ra naha tsi ra Jesús, tatun janduvaha ra tsi ra cuuhví ican qui_{iv}i quitatú nyi_{iv}i, tyin tacan tan cuvi tyaa ra naha cuatyí tsi ra Jesús.

⁸ Maa tyin ra Jesús tsitó ra tsa tsicá iñi ra naha. Tan catyí ra tsihin ra na ityi ndaha can:

—Nduvita. Cunya nyityi mahñu ra naha ihya.

Tacan tan ra na ityi ndaha can nduvita ra. Tan tsinya nyityi ra mahñu ra naha.

⁹ Tacan tan catyí ra Jesús tsihin ra nyecú ican naha ra:

—Cua nducu tuhun yu iin cuhva tsi ndo. ¿Náa taahán tsi javaha yo qui_{iv}i quitatú yo? ¿A taahán tsi javaha yo tsa vaha, a tsa ña vaha? ¿A taahán tsi jacacu yo tsi nyi_{iv}i, o cahñi ndihí yo tsi ñi?

¹⁰ Tacan tan ra Jesús nyehé ra intuhun intuhun ra naha. Yaha can tan catyí ra tsihin ra tsa na ityi ndaha can:

—Cañihi ndaha un.

Tacan tan ra na ityi ndaha ican cañihí ra ndaha ra. Tan nduvaha ndaha ra.

¹¹ Maa tyin ra yucú ican naha ra, cuxaan ra naha. Tan quitsaha tsicá tuhun tahan ra naha tsi ra naha:

—¿Nacaa javaha yo tan cuvi casi yo nu caahán ra Jesús ihya? —catyí ra naha.

*Nu nacatsi ra Jesús tsa utsi uvi taahan ra cua
caca tyiñu ra*

(Mt. 10.1-4; Mr. 3.13-19)

¹² Qui_{vi} ican ndaa ra Jesús iin yucu. Tan ñiñu maa tsican tahvi ra tsi Nyoo.

¹³ Tan tsa tuvi, cana ra tsi tandi_{hi} ra nyicún tsi ra. Tan nacatsi ra utsi uvi taahan ra naha. Tan jacunañi ra tsi ra naha apóstol, tan cuñi tsi catyi tsi “ra tsa tava tyiñu Nyoo”.

¹⁴ Tan ihya nyaá si_{vi} tandi_{hi} tsa utsi uvi ra naha: ra Simón, ra tsa jacunañi ra Cristo “Pedro”; tan yañi ra, ra Andrés; tan ra Jacobo; ra Juan; ra Felipe; ra Bartolomé;

¹⁵ ra Mateo; ra Tomás; ra Jacobo, sehe ra Alfeo; tan ra Simón ra nyanaá cuvi ra cuenda partido tsa cuñi cahun cuatyí siqui ñuu Roma tsa ndacá ñaha tsi ñi;

¹⁶ tan ra Judas, yañi ra Jacobo; tan ra Judas Iscariote, ra tsa xico tsi ra Jesús.

Nu jacuahā ra Jesús tsi nyivi cuaha

(Mt. 4.23-25)

¹⁷ Tacan tan nuu ra Jesús yucu ican tsihin tsa utsi uvi ra naha. Tan ndu i_{in} nyi_{vi} tsa nyicún tsi ra tsaha yucu can. Tan tsaā cuaha tucu nyi_{vi} quee ñuu Jerusalén tsihin tandi_{hi} ca ñuu cayucú Judea, tsihin tucu nyi_{vi} quee ityi yuhu ndutya ñuhu tsa cayucú yatyin ñi ñuu Tiro tsihin ñuu Sidón. Tan tsaā ñi tyin tyaa soho ñi tuhun caahán ra Jesús. Tan tandi_{hi} nyi_{vi} cuuhvi cuñi ñi tsa janduvaha ra tsi ñi.

¹⁸ Tan tandi_{hi} nyi_{vi} tsa yi_{hi} tatyí ña vaha janduvahā ra tsi ñi.

¹⁹ Tan tandihí ñi cuñí ñi t̄in ñi tsi ra, tyin janduvaha ra tsi ñi tsihin tunyee iñi tsa iyó tsi ra.

Tsehe caḡan ra Jesús tsihin nyivi tsa naquih̄in ndaahvi ra
(Mt. 5.1-12)

²⁰ Tacan tan nanyehe ra Jesús tsi ra tsicá tsihin ra. Tan catyí ra tsihin ra naha:

—Tandihí nyooḡo tsa ndaahvi, siḡ xaan cua cuñi ndo, tyin taahán tsi cundaca ñaha Nyoo tsi ndo.

²¹ Tandihí nyooḡo tsa tsisocó vityin, siḡ xaan cua cuñi ndo. Tyin coo quivi ña cua cusoco ca maa ndo. Tan tandihí nyooḡo tsa tsacú tsa cuihya cuñi ndo, siḡ xaan cua cuñi ndo tyin ña cua coo ca ndo tucuihya iñi. Tan cua vacu naaha xaan ndo tsihin tsa siḡ cuñi ndo.

²² Cusiḡ iñi ndo, quivi ndasi cuñi nyivi nyehe ñi tsi ndo, quivi tava ñi tsi ndo nu iyó ñi, quivi nduxaan ñi tsi ndo, quivi catyi ñi tyin nyivi ña vaha cuví ndo tyin tsinú iñi ndo tsi maa yu tsa cuví yu Rayiḡ quee nda gloria.

²³ Siḡ cuñi ndo quivi can tyin tacan tucu javaha nyivi ñi taḡan tsanaha. Cuxaan ñi tsi ra cuví ndusu yuhu Nyoo. Nḡava ndo tsihin tsa siḡ cuñi ndo. Tyin cahnu xaan ndatu cua ñihi ndo nda gloria.

Tsehe caḡan ra Jesús tsihin nyivi ña tsinú iñi tsi ra

²⁴ Maa tyin ndahvi nyooḡo, ñi cuca. Tyin vityin siḡ xaan cuñi ndo tsihin tandihí tsa cuca ndo. Maa tyin cua coo quivi maa ñi maa tundoḡo cua nyehe ndo. Tyin nduve tsa cua ñihi ndo nu nyaá Nyoo.

²⁵ Tan ndahvi nyooḡo tsa cuñi maa ndo tyin nduve tsa cumañi tsi ndo tsa vityin, tyin coo quivi cua cusoco ndo. Nyooḡo tsa siḡ cuñi vityin, ndahvi

nyooho, tyin coo quiví cua coo ndo tucuiihya iñi. Tan cua vacu xaan ndo.

²⁶ Tan ndahvi nyooho tsa vaha caahán nyiví tuhun ndo. Tyin tacan caa tucu nyiví tsicoo tsanaha, vaha xaan cahan ñi tuhun ra tsa cahan tsa ña nditsa tsihin ñi.

Cuñi ndo tsi nyiví xaan iñi tsi ndo

(Mt. 5.38-48; 7.12)

²⁷ Tandihí nyooho tsa tsiñí tsa caahán yu, catyí yu tsihin ndo tyin: Cuñi ndo tsi nyiví xaan iñi tsi ndo. Javaha ndo tsa vaha tsihin nyiví tsa ndasi cuñí nyehe tsi ndo.

²⁸ Cahan ndo tsa vaha tsihin nyiví tsa caahán ndavaha ñi tsi ndo. Tan ndacan tahvi ndo tsi Nyoo tsa cuenda nyiví caahán nyaa tsi ndo.

²⁹ Tatun iin ra cañí iin tsiyo nuu ndo, cuhva ndihí ndo inga tsiyo, nacañi ndihí maa ra. Tatun iin ra quinyaá tsaqueta nditsí ndo, cuhva ndihí ndo camiseta ndo.

³⁰ Cuhva ndo náa ndihí tsicán nyiví tsi ndo. Tatun quinyaá ñi náa tsa iyó tsi ndo, ña ndacan ca ndo can tsi ñi.

³¹ Tumaa cuñí ndo tsa javaha nyiví tsa vaha tsihin ndo, tacan javaha tucu maa ndo tsa vaha tsihin ñi.

³² Tatun cuñí ndo tsi maa ñi maa nyiví tsa cuñí tsi ndo, nduve tsa vaha javahá ndo. Tyin tacan icá tucu nyiví quiñi iyó.

³³ Tan tatun tsihin nyiví tsa vaha icá tsihin ndo, tan icá ndo tsa vaha, tan ña icá ndo tsa vaha tsihin inga nyiví, nduve tsa vaha icá ndo cuví can, tyin nyiví caquiñi, tacan icá tucu ñi can.

³⁴ Tatun javahá ndo tumañi iñi tsi iin nyiví, tan nyitá iñi ndo tyin cua javaha tucu ñi can tumañi iñi tsi ndo, nduve tsa vaha icá ndo. Tyin nyiví caquiñi, tacan icá ñi. Tatun náa tumañi iñi javahá ñi tsi nyiví vaha iñi tsi ñi, ndatú ñi tsa nacuhva tucu ñi can tumañi iñi tsi ñi.

³⁵ Maa tyin nyooho, cuñi ndo tsi nyiví xaan iñi tsi ndo. Tan javaha ndo tsa vaha tsihin ñi. Tan cuhva nuu ndo náa nducú ñi. Maa tyin ña cuatu ndo náa tumañi iñi cua nacuhva ñi tsi ndo. Tacan tan cahnu xaan tsa cua ñihi ndo nuu Nyoo tan cua cuvi ndo sehe maa Nyoo, ra nyaá gloria. Tyin Nyoo vaha iñi ra nda cuanda tsihin nyiví tsa ña nacuhvá tyahvi nyoo tsi ra, tan tsihin nyiví caquiñi.

³⁶ Cú uhvi iñi ndo tsi nyiví, tumaa uhvi cuñí Nyoo Jutu yo nyehé ra tsi yo.

Ña cahan nyaa yo tsi inga nyiví
(Mr. 7.1-5)

³⁷ 'Ña cahan nyaa ndo tsi nyiví, tacan tan Nyoo ña cua cahan nyaa ra tsi maa ndo. Ña catyi ndo tsa cuhun ñi anyaya, tacan tan ña cua jacuhun Nyoo tsi ndo anyaya. Jaha ndo tucahnu iñi tsi nyiví. Tan Nyoo cua jaha ra tucahnu iñi tsi maa ndo.

³⁸ Cuhva ndo tsa tsiñí ñuhu tsi nyiví. Tacan tan cua cuhva tucu maa Nyoo tsa tsiñí ñuhu tsi maa ndo. Cuaha cua cuhva ra tsi ndo. Tyin tumaa cuhva cua cuhva ndo tsi nyiví, tacan cuhva cua cuhva Nyoo tsi ndo —catyí ra Jesús.

³⁹ Tan tsaha ra Jesús cuhva ihya tsi ñi, tan catyí ra:

—Iin ra cuaa ña cuví janaha ra ityi tsi inga ra cuaa. Tyin nduvi taahan ra naha ña nyehé ra naha

ityi cuahán ra naha. Tan cuví canacava ra naha tsitsi iin xahva.

⁴⁰ Ndi intuhun ra cutuhvá ña cua cuvi coto ra tsa tsitó ra jacuahá tsi ra. Tyin ndi quitsaha cahví ra. Cua coto ra nda ndihí cahvi ra.

⁴¹ '¿Nacaa tyin nyehé un tsahan luhlu tsa nyíí tinuu yañi un, tan ña jahá un cuenda yutun cahnu tsa nyíí tinuu maa un?

⁴² Tatun tinuu maa un nyíí iin yutun cahnu, ¿nacaa cua cuvi catyi un tsihin ra yañi un: “Naha, na tava yu tsahan luhlu tsa nyíí tinuu un.”? ¡Yooho tsa jahá tyin vaha xaan un! Tava jihna yutun cahnu tsa nyíí tinuu maa un. Tyin tacan tan cuvi nyehe vaha un tsahan luhlu tsa cua tava un tinuu yañi un.

Tsihin tsa javahá nyivi tan nacoto yo tsi ñi tatun ñi vaha, a ñi ña vaha cuvi ñi (Mt. 7.17-20; 12.34-35)

⁴³ 'Iin yutun vaha tsahá tun yucu vixi, yucu vaha. Tan iin yutun ña vaha tsahá tun yucu ña vaha.

⁴⁴ Tandihí yutun nacotó yo tsi tun tsihin tsiti tun. Tyin tiñata, ña cua cuhva tun mangu. Tan ndi intuhun iñu nduuhva ña cua cuhva tun uvas [tsa cuví yucu vixi].

⁴⁵ Tan tacan tandihí nyivi vaha, vaha caahán ñi, tyin yihí tsa vaha añima ñi. Maa tyin nyivi ña vaha, maa ñi maa tsa ña vaha caahán ñi tyin yihí tsa caquiñi añima ñi. Tyin tsihin yuhu yo caahán yo tandihí tsa quitá tsitsi añima yo.

Cua cacu nyivi tsa tyaá yahvi tuhun caahán ra Jesús, tan nyivi ña tyaá yahvi tsa caahán ra, ña cua cacu ñi

(Mt. 7.24-27)

⁴⁶ ¿Nacuenda catyí ndo tsihin yu, “Jutu Mañi yu, Jutu Mañi yu”, tan ña javahá ndo tsa caahán yu?

⁴⁷ Vityin cua catyi yu tsihin ndo yóo ndacú nyooho tsa vatsí ndo tsi maa yu, tan tyaá soho ndo tsa caahán yu, tan javahá ndo cuhva catyí yu.

⁴⁸ Cuví ndo tumaa cuví iin ra tsitó janduvita vehe. Tyin jihna ca tahvi cunu xaan ra tan tahan ra yuu. Tan tyaá ra tyihyo tsaha vehe can tsata yuu can. Tan quivi nduñihí cuún savi, ndutya can tsatyá xaan tsi tsaha vehe, maa tyin vehe can ña taní maa tsi tyin vaha xaan quitá tyihyo tsaha tsi.

⁴⁹ Maa tyin nyivi tsa tsiñí tsa caahán yu tan ña javahá ñi tsa caahán yu, cuví ñi tumaa iin ra javahá vehe tan ña vaha javahá ra itsi. Tyin nduve tyihyo tsaha tsi javahá ra. Tan quivi tsaá savi, tan cuñihí cuún savi, tan yaha ndutya cuaha tsaha vehe can. Tan vehe can, iin yaha ñi taní tsi —tacan catyí ra Jesús.

7

Nu janduvahá ra Jesús musu iin ra capitán andaru

(Mt. 8.5-13)

¹ Ndihi cahan ra Jesús tsihin nyivi, tacan tan cuanuhu ra inga tsaha nda ñuu Capernaum.

² Tan ñuu can iyó iin ra capitán. Tan iyó iin musu ra tsa cuñí xaan ra. Tan cuuhví ra can. Tan tsa cuñí cúu ra.

³ Tan tsa tsitó ra capitán can tuhun ra Jesús, tacan tan tava tyiñu ra tsi juhva ra cuví ra tsahnu ñuu Israel naha ra na cahan ra naha tsihin ra Jesús, tyin na quitsi ra janduvaha ra tsi musu ra.

⁴⁻⁵ Tacan tan tsaḡ ra tsahnu ican naha ra nu nyíí ra Jesús. Tan quitsahḡ caahán ndaahvi ra naha tsihin ra tan catyí ra naha:

—Iyó iin ra capitán cuenda ñuu Roma. Tan vaha xaan nyívi cuví ra tsihin yo tsa cuví yo nyívi Israel. Nda cuando javahḡ ña ra iin vehe ñuhu yo. Tan taahán tsi tyin jatyinyee un tsi ra. Tyin cuuhví xaan musu ra. Tan cuñí ra tyin janduvaha un tsi ra.

⁶ Tacan tan cuahán ra Jesús tsihin ra naha. Maa tyin tsa ndi cumañi ca tsaa ra nda vehe ra capitán can, tan ra capitán can tava tyiñu ra tsi ra vaha iñi tsi ra. Tacan tan tsaḡ ra naha nu nyíí ra Jesús. Tan catyí ra naha tsihin ra Jesús:

—Taa, catyí ra capitán tyin ña jatyañu un tsi un tsa cuhun un nda yuvehe ra. Tyin ña cahnu cuví ra tan cuhun un vehe ra, catyí ra.

⁷ Yacan ña cana iñi ra quitsi ra nu nyíí un. ¿A ña jaha un tumañi iñi tsi ra, tyin ihya cahan un iin tuhun, tan cua nduvaha musu ra, catyí ra?

⁸ Tyin maa ra, capitán cuví ra. Tan ndacá ñaha rey tsi ra. Tan maa ra ndacá ñaha ra tsi ra cuatyí cutahán tsihin ra. Tatun tava tyiñu ra tsi iin ra cuatyí ican, na cuhun ra, cuahán ra. Tatun catyí ra tsihin inga ra, na quitsi ra, vatsí ra. Tatun jacuhún ra tsi inga ra, na jaha tyiñu ra, cua jaha tyiñu ra. Tan tacan tucu yooho, tatun catyí un na nduvaha musu ra, tacan tan cua nduvaha ra —catyí ra vaha iñi tsi ra capitán can naha ra tsihin ra Jesús.

⁹ Tsa tsiñi ra Jesús tsa cahan ra can naha ra, tan iyo xaan cuñi ra. Tan nanyehē ra tsi nyivi tsa nyecú tsihin ra, tan catyí ra:

—Nditsa nditsa tyin tsinú xaan iñi ra capitán can. Ñaha ca nañihi yu tsi ndi intuhun ra Israel tsa tsinú xaan iñi tumaa ra ican —catyí ra Jesús.

¹⁰ Tacan tan cuanuhū ra vaha iñi tsi ra capitán can naha ra. Tan tsa tsaā ra naha nda yuvehe, tan nyehē ra naha tyin tsa nduvahā musu ra.

Nu janandotó ra Jesús tsi sehe iin ñaha ndaahvi tsihi y#

¹¹ Tsa yahā yacan tan cuahán ra Jesús iin ñuu tsa nañi Naín. Tan cuahán tucu ra tsicá tsihin ra. Tan cuahán ndihi tucu cuaha xaan nyivi.

¹² Tacan tan cuhva tsa cua tsaā ra yatyin ñuu ican, nyehē ra tyin cuaha xaan nyivi quitá ñi ñuu ican. Tan nyisó ra naha iin ndiyi, cua cutsi ra naha sehe iin ñaha ndaahvi tsa tsihi y#. Tan intuhun ñi maa ra cuví sehe ña, tan tsihi ra.

¹³ Tan tsa nyehē ra Jesús tsi ña, tan cundaahvi iñi ra nyehē ra tsi ña. Tan catyí ra tsihin ña:

—Ña vacu un.

¹⁴ Tsahan natuhvā ra tan tñin ra tsatun tsa nyii ndiyi can. Tacan tan ra nyisó tsi ndiyi can naha ra tsicuiñi ra naha. Tan catyí ra Jesús tsihin ndiyi can:

—Nduvita, yooho ra tyuvaa —catyí ra.

¹⁵ Tacan tan nduvitā ndiyi can. Tan nacunyaā ra. Tacan tan quitsahā caahán ra. Tan ra Jesús nacuhvā cuenda ra tsi ra tsi sihi ra.

¹⁶ Tsa nyehē ñi tsa tacan nandotó ra jahā ra Jesús tan yuuhvi xaan ñi, tan quitsahā jacahnú ñi tsi Nyoo. Tan catyí ñi:

—Cahnu xaan ra cuví ndusu yuhu Nyoo tsaá nu yucú yo ihya.

Tan catyí tucu ñi:

—Maa Nyoo cuví ra vatsí nu iyó yo, vatsí jatyinyee ra tsi yo —catyí ñi.

¹⁷ Tan tandihí maa nyívi tanií cahnu Judea, tsito ñi tsa javahá ra Jesús.

Nu jacuhun ra Juan uvi taahan ra tsa tsicá tsihin ra nu nyíí ra Jesús

(Mt. 11.2-19)

¹⁸ Tan ra tsicá tsihin ra Juan naha ra nacatyí tuhun ra naha tsa javahá ra Jesús. Tacan tan caná ra Juan tsi uvi taahan ra naha.

¹⁹ Tan tava tyiñu ra tsi ra naha na cahun ra naha nu nyíí ra Jesús, tan ndaca tuhun ra naha tsi ra tatun juvin ra cuví Cristo, ra tsa cua jaquitsi Nyoo. Tyin tatun ñavin ra Cristo cuví ra, cuatu ra naha tsi inga ra.

²⁰ Tacan tan ra tsa jacuhun ra Juan, cuahán ra naha. Tan tsaá ra naha nu nyíí ra Jesús. Tan catyí ra naha:

—Ra Juan, ra jacoondutyá, tava tyiñu ra tsi ndi tyin ndaca tuhun ndi tsi un tatun juvin un cuví Cristo, ra tsa cua jaquitsi Nyoo. Tyin tatun ñavin un, cuatu ndi tsi inga ra —catyí ra naha tsihin ra Jesús.

²¹ Tan tsa ndi yucú ra tsa jacuhun ra Juan naha ra tan cuaha xaan nyívi cuuhví janduvahá ra Jesús. Tan tacan tucu nyívi yihí tatyí ña vaha. Tan cuaha tucu nyívi cuaa nanyehe ñi jahá ra.

²² Tacan tan catyí ra Jesús tsihin ra tsa jacuhun ra Juan naha ra:

—Cuaahan ndo. Tan nacatyi tuhun ndo tsihin ra Juan tandihi tsa nyehe ndo, tan tandihi tsa tsiñi ndo. Tan catyi ndo tsihin ra: ra cuaa nanyehe ra, ra coxo nacaca ra, ra ndoho cuehe tyaahyú nduvaha ra, ra soho nacuñi ra, ndiyi nandoto, tan caahán yu tuhun Nyoo tsihin ñi ndaahvi nácaa cacu ñi. Tan catyi ndo tsihin ra tyin

²³ si xaan cuñi ñi nyicún tsi yu tun ña ndu uví iñi —catyi ra Jesús tsihin ra naha.

²⁴ Cuahán ra tsa jacuhun ra Juan naha ra, tan quitsaha caahán ra Jesús tuhun ra Juan tsihin nyivi. Tan catyi ra:

—¿Náa nyehe ndo quivi sahan ndo nuu tsiqui ndi ican? ¿A nyehe ndo iin ndoo tsa janduvá tatyí?

²⁵ ¿A iin ra tsa nditsí jahma vaha nyehe ndo? Ñavin. Tyin tsitó ndo tyin ra nditsí jahma vaha, iyó ra tsihin tsa vaha tan iyó ra vehe ra cuví rey.

²⁶ ¿A ña nyehe ndo tsi iin ra cuví ndusu yuhu Nyoo? Juvín. Cahnu ca cuví ra tan ñavin ca ra ndusu yuhu Nyoo.

²⁷ Juvín ñi tuhun ra Juan cuví tsa nyaá nuu tutu tsa tyaa ra Isaías sahan tsanaha. Tan caahán Nyoo tuhun ra tyehen:

Yuhu cua jacuhun yu iin ra cua cahan tuhun yu tsa ndi cumañi ca cuhun un.

Na natyiso vaha ra ityi nu cua cuhun un.

²⁸ Tan catyi yu tsihin ndo tyin tsitsi tsa tandihi ra tsa cacu jahá ñiñaha, yoñi ra cuví ndusu yuhu Nyoo tsa cahnu ca tumaa ra Juan, ra jacoondutyá. Maa tyin ra tsa ndacá ñaha Nyoo aña vasu iin ra luhlu cuii ñi cuví ra, maa tyin cahnu xaan ca cuví ra tan ñavin ca ra Juan.

29 'Tandihí nyívi tan ra tavá xuhun naha ra, tsa tsicoondutyá jaha ra Juan, nacoto ñi tyin cuhva javahá Nyoo, cuiti xaan tsi.

30 Maa tyin tandihí ra fariseo tsihin ra maestro cuenda ley vehe ñuhu, ña cuñí ra naha tsa jacoondutyá ra Juan tsi ra naha, tyin ña cuñí ra naha quihin ra naha tsa tsahá Nyoo tsi ra naha —catyí ra Jesús.

31 Tan catyí tucu ra:

—¿Náa cua jandu inducu yu tsihin nyooho, nyívi iyó quívi ihya? ¿Yóo caá tumaa caá ndo?

32 Tumaa ra nyihi cuví nyooho. Tyin ra nyihi jasiquí nuyahvi. Tan caná tsa tahan ra naha, tan catyí ra naha: “Tívi ndi tiyoo tan ña tsañi ndo yaa. Tan tsita ndi yaa cuiihya, tan ña tsacu ndo”. catyí ra nyihi. [Tan tacan ñi cuví nyooho tyin ndi intuhun cuhva ña taahán iñi ndo.]

33 Tyin ra Juan, ra jacoondutyá, quitsi ra tan ña tsatsí vaha ra. Tan ña tsihi ra vinu. Tan nyooho catyí ndo tyin tatyí ña vaha yihí tsi ra.

34 Tan quitsi tucu yuhu tan cuví yu Rayi tsa quee nda gloria. [Tan tsatsí yu tan tsihi yu.] Tan nyooho catyí ndo tyin tsatsí xaan yu tan tsihi xaan yu vinu. Tan ña taahán iñi ndo tsa cutahán yu tsihin ra iyó cuatyí naha ra, tan tsihin ra tavá xuhun naha ra.

35 Maa tyin catyí yu tsihin ndo tyin tsa tsiñi tuñi Nyoo tsahá ra tsi nyívi naquihín tuhun caahán yu tan tuhun caahán ra Juan. Tan maa ñi cua janaha tsi ndo tyin vaha tsa tsiñi tuñi Nyoo —catyí ra Jesús.

Nu nyii ra Jesús vehe ra Simón ra cuví fariseo

36 Iin ra fariseo tsa nañí Simón jacoto ra tsi ra Jesús tyin cahun ra cucatsi ra nda yuvehe ra. Tan tsaá ra Jesús vehe ra, tan tsicunyaá ra nu mesa.

37 Tacan tan iin ñaha sñi ñi ñuu ican tsito ña tyin nyii ra Jesús ican. Tan tsaá ña tsihin iin yutyi yuu xiñu tsitú tsi ndutya tami.

38 Tan tsinyaá ña yatyin ñi tsaha ra. Tan quit-saha tsacú ña tyin ndu uvi ñi ña cuatyí ña. Tan cuún ndutya nuu ña. Tan tsihin ndutya nuu ña nacatyá ña tsaha ra Jesús. Yaha can tan jana ityi ña tsaha ra tsihin ixi jiñi ña. Tan tyayuhu ña tsaha ra. Tacan tan tyoso ña ndutya tami ican tsata tsaha ra.

39 Tsa nyehe ra fariseo can tsa tacan ica ña, tan tsicá ñi ra: “Tatun nditsa tsa Nyoo jaquitsi tsi ra ihya, cua nacoto ra yóo ñaha tiñ tsaha ra, tyin ñaha ican, ñaha iyó cuatyí cuví ña.”

40 Tacan tan ra Jesús catyí ra tsihin ra fariseo ican:

—Yooho Simón, iyó iin tsa cua cahan yu tsihin un —catyí ra tsihin ra.

Tacan tan nacahan ra Simón, tan catyí ra:

—Vaha, cahan tsihin yu, Maestro —catyí ra.

41 Tan catyí ra Jesús tyehen tsihin ra:

—Uvi taahan rayñi nyaá cuenda ra xuhun tsi iin ra tsa tuhvá tsahá nuu xuhun. Tan iin ra ican nyaá cuenda ra uhun cientu denario. Tan inga ra nyaá cuenda ra uvi xico utsi ñi denario.

42 Tan nduvi taahan ra, ña cuví tyahvi ra naha. Tan ra tuhvá tsahá nuu xuhun ican, jaha ra tuc-ahnu ñi tsi nduvi taahan ra naha. Tan vityin catyi tsihin yu, yooho Simón, ¿ndáa ra cua cuñi ca tsi ra tsa tsahá nuu xuhun ican? —catyí ra Jesús.

43 Tacan tan nacahan ra Simón, tan catyí ra:

—Ra tsa cuaha ca jahá ra tucahnu iñi tsi —catyí ra.

Tacan tan catyí ra Jesús:

—Nditsa tsa caahan un —catyí ra.

44 Tacan tan nanyehe ra Jesús tsi ñaha ican, tan catyí ra tsihin ra Simón:

—¿A nyehé un tsi ñaha ihya? Yuhu quihvi yu tsitsi vehe un, tan ña tsaha un ndutya tsa ndoo tsaha yu tumaa cuhva tsa iyó yo. Tan ñaha ihya nacatya ña tsaha yu tsihin ndutya nuu ña. Tan jana ityi ña tsihin ixi jiñi ña.

45 Yoohe ña tyayuhu un ndaha yu, tumaa cuhva tsa iyó yo, maa tyin maa ña nda cuanda tsa quihvi yu ihya tan ña jandihí ña tsa tyayuhú ña tsaha yu.

46 Tan yoohe ña tyihí un acetye jiñi yu, maa tyin ñaha ihya tyihí ña ndutya tami tsaha yu.

47 Tan catyí yu tsihin un, yoohe Simón, vasu cahnu xaan cuatyí ña, maa tyin jahá yu tucahnu iñi tsi ña. Yacan cuenda cuñi xaan ña tsi yu. Tan nyivi tsa jahá yu tucahnu iñi luxu ñi cuatyí ñi, luxu ñi cuñi ñi tsi yu —catyí ra Jesús.

48 Tacan tan catyí ra Jesús tsihin ña can:

—Cuatyí un tsa yaha catsiyo, tyin tsa jahá Nyoo tucahnu iñi tsi un —catyí ra Jesús tsihin ña.

49 Tacan tan ra yucú tsihin ra quitsaha tsicá iñi ra naha: “¿Yoo ra cuví ra ihya? tyin jahá ra tucahnu iñi cuatyí nyivi.”

50 Tacan tan catyí ra Jesús tsihin ñaha ican:

—Cuahan vityin, tsa cacu un tyin tsinu iñi un tsi yu. Cuahan tsihin tsa vaha —catyí ra tsihin ña.

8

Ñiñaha tsa jatyinyee tsi ra Jesús

¹ Tsa yahā can, tan cuahán ra Jesús tsicá ra iin iin ñuu nahnu tan iin iin ñuu nyihi. Tan caahán ra tsihin nyivi. Tan jacotó ra tsi ñi tuhun vaha nácaa cuñi Nyoo cundaca ñaha ra tsi ñi. Tan tsa utsi uvi taahan ra tsa tavā tyiñu ra, cuahán ra naha tsihin ra.

² Tan cuahán tucu juhva ñiñaha tsa janduvaha ra: ñi cuhvi tan ñi yihí tatyí ña vaha. Tan tsihin ñi cuahán ña María tsa quee ñuu Magdala, tan juvin ña cuví ña yihí utsa tatyí ña vaha tan nduvaha ña.

³ Tan cuahán tucu ña Juana, ñasihi ra Chuza, ra cumí tyiñu cuenda ra Herodes, tan ña Susana tsihin tandihi ca ñiñaha tsa jatyinyee tsi ra Jesús tsihin tsa iyó tsi ñi.

Nu caahán ra Jesús tyin tumaa iin ra tatsí tacan cuví ra caahán tuhun Nyoo

(Mt. 13.1-9; Mr. 4.1-9)

⁴ Tan cuaha xaan nyivi quee ñi iin iin ñuu, tyin cua nyehe ñi nu caahán ra Jesús tuhun Nyoo. Tan tuvi xaan ñi nyecú, tan quitsaha caahán ra tsihin ñi tsihin iin cuhva tsaha cuenda ra, tan catyí ra:

⁵ —Quitā iin ra vehe ra. Cuahán ra nu iyó tyiñu jahá ra, tyin cua tatsí ra tsiti trigu nu ñuhu ra. Tan cuhva tsa tatsí ra quití ra tsiti can, tan cucoyo juhva yuhu ityi. Tan tsañi nyivi tsata can. Tan quitsi saa tan tsatsi ti.

⁶ Tan juhva ca tsiti can cucoyo tyañu yuu. Cana tsiti ican. Maa tyin na ityi tsi tyin luxu cuii ñi ñuhu yihí tsaha tsi. Tan nduve catsin.

⁷ Tan juhva ca tsiti cucoyo tyañu iñu. Maa tyin quivi cana trigu iin caa ñi tsihin iñu can, iñu can tsahñi tsi trigu can.

⁸ Maa tyin juhva ca tsiti cucoyo nu ñuhu vaha. Tan quivi tsahnu tsi, vaha xaan tsaha tsi tsiti. Tyin tsa iin ñi tsiti ican, cientu tsiti quita tsihin tsi —catyí ra Jesús.

Tan tsa yaha tsaha ra cuhva can, tan quitsaha cana tsa ra tyin na tyaa soho nyivi, tan catyí ra:

—Tatun iyó soho ndo, tyaa soho ndo tuhun caahán yu —catyí ra.

Nu jacoto ra Jesús nacuenda jacuahá ra tsi nyivi tsihin cuhva caahán ra tsihin ñi (Mt. 13.10-17; Mr. 4.10-12)

⁹ Yaha can tan ra tsicá tsihin ra, nducu tuhun ra naha tsi ra náa cuñí tsi catyi cuhva tsa cahan ra tsihin nyivi.

¹⁰ Tacan tan catyí ra tsihin ra naha:

—Tsi nyooho jacoto Nyoo tuhun xeehe, nácaa ndacá ñaha ra. Maa tyin tandihi ca ñi ican, tsihin cuhva ñi caahán yu tsihin ñi. Tacan tan nyehé ñi tan cuví tsi tumaa tsa ña nditsin nyehé ñi, tan tsiñi ñi maa tyin ña cua cutuñi iñi ñi náa tuhun cuví can.

Nu tsaha cuenda ra Jesús cuenda ra tsa tatsí (Mt. 13.18-23; Mr. 4.13-20)

¹¹ Cuhva tsa tsaha yu tsi ñi, cuñí tsi catyi tsi tyehen: tsiti can, tuhun Nyoo cuví tsi.

¹² Tan nu cucoyo tsiti trigu ican yuhu ityi, nyivi tsa tsiñi tuhun Nyoo cuví can. Maa tyin quitsi nu ña vaha tan quinyaa nu tuhun Nyoo tsi ñi tan coto tsinu iñi ñi tan cacu ñi.

¹³ Tan nu cucoyo tsiti can tyañu yuu, juvin ñi nyivi tsa tsiñi tuhun Nyoo cuví can. Sii xaan naquihin vaha ñi itsi juhva ñi quivi. Maa tyin ña yihí vaha yoho ñi, juhva ñi quivi tsinu iñi ñi, tan quivi tsa quitsaha nyehé ñi tundoho, tan jandihí ñi tsa tsinú iñi ñi.

¹⁴ Tan nu cucoyo tsiti tyañu iñu, juvin ñi nyivi tsiñi tuhun Nyoo cuví can. Tsiñi ñi tuhun Nyoo maa tyin ña nasama ñi cuhva iyó ñi. Tyin yihí ñi, tyaá ca iñi ñi tuhun tundoho tan ñavin ca tuhun Nyoo. Tan inga ñi, nyiyo ca iñi ñi tsa cuca. Tan inga tucu ñi sii ca cuñí ñi tsihin tsa sii caá tsa iyó nu ñuhu ñayivi. Tan cuví ñi tumaa cuví yutun tsa ña tsaha tsiti.

¹⁵ Maa tyin nu cucoyo tsiti nu ñuhu vaha, yacan cuví nyivi tsa tsiñi tuhun Nyoo, tan vaha aña ñi tyin tsinú iñi ñi tsihin tani aña ñi. Tan vaha tyaá soho ñi tuhun Nyoo, tan ña naá maa iñi ñi tuhun ra. Tan javahá ñi tandihí tuhun caahán ra.

Nu cahan ra Jesús tyin ña cua tyihi xeehe yo ñuhu tsa jandunditsin Nyoo aña yo coto quinyaa ra itsi (Mr. 4.21-25)

¹⁶ 'Ndi intuhun yo ña tyaá yo ñuhu tyuma tan tyihí xeehe yo xuu tsito a inga nu xeehe. Tyaá yo ñuhu tyuma maa tyin tsaquin nyaa yo can iin nu sucun, tacan tan quihví nyivi tsitsi vehe maa tyin nditsin.

¹⁷ Tyin nduve iin tsa nyii xeehe, tan ña cua quituvi can. Tan ndi intuhun tsa xeehe, tan ña cua quita tsi nu nditsin, tan tsahan nacoto yo.

¹⁸ Yacan cuenda tyaa soho ndo tuhun caahán yu. Tyin tatun tyaá yahvi ndo tuhun caahán yu, cuaha

ca cua janaha yu tsi ndo. Maa tyin tatun ña cua tyaa soho ndo, tacan tan cua quinyaa Nyoo nda cuanda tsa luxu ñi tsa cuñí maa ndo tyin cumí ndo.

Nu tsaḥa cuenda ra Jesús tyin tumaa yañi ra, tan tumaa sihi ra, tacan cuví nyivi tyaá yahvi tuhun Nyoo

(Mt. 12.46-50; Mr. 3.31-35)

¹⁹ Tacan tan tsaá sihi ra Jesús tsihin yañi ra nu nyií ra. Maa tyin ña cuví tsaá ñi tyin tuvi xaan nyivi.

²⁰ Tacan tan jacotoḡ nyivi nyecú ican tsi ra Jesús, tan catyí ñi:

—Sihí un tsihin ra yañi un naha ra nyecú ñi tsata vehe. Tan cuñí ñi cahan ñi tsihin un.

²¹ Tacan tan nacahan ra Jesús, tan catyí ra:

—Tandihí maa nyivi tsa tyaá soho tuhun Nyoo tsa caahán yu tan tyaá yahvi ñi itsi, juvin ñi cuví sihi yu, tan juvin ñi cuví yañi yu —catyí ra Jesús.

Nu jacutaxin ra Jesús tatyí ñihi nu miñi

(Mt. 8.23-27; Mr. 4.35-41)

²² Cuví tsi iin quivi quihvi ra Jesús tsitsi iin yutun ndoo tsihin ra tsicá tsihin ra. Tan catyí ra tsihin ra naha:

—Cohon ndo inga tsiyo miñi ihya.

Tacan tan cuahán ra naha tsihin yutun ndoo ican.

²³ Tan tsa ndi cuahán ca ra naha mahñu miñi ican, quixí ra Jesús. Tacan tan sana ñni ra naha tan tsaá tatyí ñihi xaan. Tan quitsaḥa tyihí tsi ndutya tsitsi yutun ndoo ican. Tan cuñí nyee yutun ndoo can tyin cuaha xaan ndutya quihvi.

²⁴ Tacan tan jandotoḡ ra naha tsi ra Jesús. Tan catyí ra naha tsihin ra:

—¡Maestro! ¡Maestro! Tsa cuñí nyee yo tsitsi ndutyá —catyí ra naha.

Tacan tan nduvitá ra Jesús. Tan caahán ra tsihin tatyí can tan tsihin ndutyá can, na cutaxin tsi. Tan cutaxin tsi.

²⁵ Tacan tan catyí ra tsihin ra tsicá tsihin ra:

—[¿Nacuvi yuuhví ndo?] ¿Numaa cuahán tsa tsinú iñi ndo? —catyí ra tsihin ra naha.

Maa tyin ra ican naha ra, nayuhví xaan ra naha. Tan iyo xaan cuñí ra naha. Tan quitsahá tsicá tuhun tahan ra naha:

—¿Yóo ra cuví ra ihya? Tyin nda cuando tatyí tan ndutyá tan tyaá yahvi tsi tsa caahán ra.

Nu nduvahá iin ra yihí tatyí ña vaha nda Gadara (Mt. 8.28-34; Mr. 5.1-20)

²⁶ Tacan tan tsaá ra naha nda Gadara tsa canyíí yuhu miñi ityi nuu Galilea tsa canyíí inga tsiyo miñi can.

²⁷ Tan quitá ra Jesús tsitsi yutun ndoo ican. Tan ican tsaá iin ra ñuu tsa canyíí Gadara can tsijatahan ra tsi ra. Tan tsanaha xaan yihí tatyí ña vaha tsi ra, tan ña nditsí ca maa ra jahma. Tan ña iyó ra vehe ra. Tsicá nuu ñi maa ra nu ñaña cumí santu.

²⁸⁻²⁹ Tan tuhvá tatyí ña vaha ican jacunú sana nu tsi ra. Tan yacan cuenda tuhvá ñi tsaahñi ndaha ra tan tsaha ra tsihin cadena. Maa tyin tatyí ña vaha ican tsahá tunyee iñi tsi ra tsa cahnya ra can. Tan jacunú nu tsi ra. Tan tsindacá nu tsi ra iin nu nduve maa nyivi iyó. Ra ican tsaá ra nu nyíí ra Jesús. Tan cuhva tsa nyehé ra can tsi ra Jesús, tsicuiñi tsiti ra nuu ra. Tan caná tsaá ra tan catyí ra:

—¿Nacuvi tyihí un tsi un tsihin yuhu, yooho Jesús, Sehe Nyoo nyaá gloria? Tsicán yu tsi un ña janyehe un tundoho tsi yu —catyí ra yihí tatyí ña vaha ican tsihin ra Jesús, tyin ra Jesús tava tyiñu ra tsi nu tsa quita nu tsi ra ndaahvi ican.

³⁰ Tan nducȳ tuhun ra Jesús tsi tatyí ña vaha ican, tan catyí ra:

—¿Náa nañí un?

Tan tatyí ña vaha ican jacahan nu tsi ra can, tan catyí ra:

—Nyuhu nañí ndi, Legión.

Tacan catyí ra tyin cuaha xaan tatyí ña vaha yihí tsi ra. [Cuenda mil nahnu yihí tsi ra.]

³¹ Tacan tan catyí nahnu tsihin ra Jesús tyin ña jacuhun ra tsi nahnu tsitsi Yavi Cunu nu cua nyehe nahnu tundoho tan ña cuvi maa quita nahnu.

³² Tan tsican nahnu tsi ra Jesús na cuhva ra quihvi nahnu tsitsi quini tsa yucú yuhu miñi ican tsatsí ti naha ti. Tacan tan tsaha ra Jesús ndatu tsa quihvi nahnu tsitsi quini ican naha ti.

³³ Tan quitá nahnu tsi ra ndaahvi can. Tan quihvi nahnu tsitsi quini ican naha ti. Tacan tan tsinu quini can naha ti. Tan yatyin ican nyaá iin xahva cunu yuhu miñi ican. Ican cucoyo ti naha ti tsitsi miñi ican. Tan tsihi ti naha ti tsitsi ndutya.

³⁴ Tacan tan ra jahá cuenda tsi quini ican naha ra, nayuhvi xaan ra naha. Tan tsinú ra naha cuahan ra naha cua nacatyí tuhun ra naha tsa cuvi can tsihin nyivi nda ñuu. Tan tandihí ñi nyivi tsa nyehe ra naha, tan nacatyí tuhun ra naha tsa cuvi ican.

³⁵ Tacan tan tsahan nyiv̄i tsinyeh̄e ñi náa tsa cuv̄i, tan tsaá ñi nu nyíi ra Jesús. Tan nañih̄i ñi tsi ra tsa tsa yah̄a quit̄a tatyi ña vaha can. Nyaá ra tsaha ra Jesús. Tan tsa ñuhú ra jahma. Tan tsa vaha cuñí jiñi ra. Tan nayuhv̄i xaan ñi cuv̄i.

³⁶ Tacan tan tandih̄i ñi tsa nyehē tsa cuv̄i ican, nacatyí tuhun ñi tsihin tandih̄i ca nyiv̄i nácaa quit̄a tatyi ña vaha tsi ra ndaahvi can, tan nduvah̄a ra.

³⁷⁻³⁹ Tacan tan tandih̄i nyiv̄i iyó Gadara can quit-sah̄a caahán ñi tsihin ra Jesús na cunuhu ra ityi nu quee ra. Tyin nayuhv̄i xaan ñi tsa javah̄a ra tsihin nu tatyi ña vaha ican. Tacan tan ra tsa quit̄a nu tatyi ña vaha can nahnu, cah̄an ndaahvi ra tsihin ra Jesús, na cuhva ra cuhun ndih̄i ra tsihin ra. Maa tyin catyí ra Jesús tsihin ra:

—Cuanuhu yuvehe un. Tan cuhva cuenda un tsi nyiv̄i vehe un náa ndih̄i tsa javah̄a Nyoo tsihin un —catyí ra.

Tacan tan ra Jesús quihv̄i ra tsitsi yutun ndoo ican. Tan cuanuhu ra tsihin ra tsicá tsihin ra. Tacan tan ra ndaahvi tsa nduvah̄a ican, cuanuhu ra nda ñuu ra. Tan ityi cuahán ra nacatyí tuhun ra tsihin tandih̄i nyiv̄i ñuu ican nácaa janduvah̄a ra Jesús tsi ra.

Nu nduvah̄a ña sehe ra Jairo tan ñaha tsa t̄iñ jahma ra Jesús

(Mt. 9.18-26; Mr. 5.21-43)

⁴⁰ Quiv̄i tsa tsaá ra Jesús inga tsaha tsa tsahan ra inga tsiyo miñi can, cuaha xaan nyiv̄i ndatú tsi ra. Tan sii xaan cuñí ñi tyin tsaá nyico ra.

⁴¹ Tacan tan tsaá iin ra tsa nañí Jairo, ra cuv̄i ityi nuu vehe ñuhu, tan tsicuiñi tsiti ra nuu ra

Jesús. Tan quitsahā caahán ndaahvi ra tsihin ra na cuhun ra vehe ra.

⁴² Tyin iyó iin ñaha sehe ra, tan iyó utsi uvi cuiya ña. Tan tsa cuñí cúu ña jahá cuehe. Tacan tan cuahán ra Jesús vehe ra. Tan cuaha xaan nyiví cuahán tsihin ra, tan tyañu xaan nu cuahán ra tyañu ñi.

⁴³ Tan tsihin nyiví ican cuahán iin ñaha cuuhví. Tsa iyó utsi uvi cuiya ndohó ña cuehe tsa cuún niñi ña. Tan tsa ndihí maa xuhun ña janaa ña tsihin doctor tan ña nduvahā ña.

⁴⁴ Maa tyin tsaā ña nu cuahán ra Jesús, ityi tsata ra. Tan tñin ña jahma ra. Tan iin yaha ñi, tan tsicuiñi tsa cuún niñi ña.

⁴⁵ Tacan tan catyí ra Jesús:

—¿Yóo tñin jahma yu?

Tan tandihí ñi cuahán tsihin ra catyí ñi:

—Yoñi.

Tan ra Pedro tsihin ra cutahan tsihin ra, catyí ra naha tsihin ra Jesús:

—Maestro, cuaha xaan nyiví cuahán tsihin un, tan tyañu xaan nu cuahán un. Tan juvin ñi maa ñi tyandahñi tsi un. Tan nducú tuhun ca un “¿Yóo tñin jahma yu?” —catyí ra naha.

⁴⁶ Maa tyin ra Jesús catyí ra:

—Tsitó maa yu tyin iyó iin nyiví tñin jahma yu, tyin tuví iñi yu cuahán juhva tunyee iñi tsa iyó tsi yu —catyí ra.

⁴⁷ Tacan tan ñaha can nyehé ña tyin tsa tsitó ra. Tan quitsahā nihí ña tsihin tsa yuuhví ña. Tan tsicuiñi tsiti ña nuu ra. Tan nacatyí tuhun ña tsihin ra nacuenta tñin ña jahma ra, tan nácaa nduvahā

ña iin yaha ñi ican. Tan tsiñí tandihí nyívi tsa nacatyí tuhun ña.

48 Tacan tan catyí ra Jesús tshin ña:

—Tsa nduvaha un tyin tsinú iñi un tsi yu. Cuaahan tshin tsa vaha —catyí ra.

49 Ndi caahán ca ra Jesús, tan tsaá ñi iin ra quee vehe ra Jairo, ra cuví ityi nuu vehe ñuhu. Tan catyí ra tshin ra Jairo:

—Sehe un tsa yaha tshí ña. Ña cuhva ca un tsihi tsi ra Maestro ihya —catyí ra.

50 Maa tyin tsa tsiñí ra Jesús tsa cahan ra ican, tan catyí ra tshin ra Jairo:

—Ña nayuhvi un. Tsinu iñi. Tan ña sehe un cua nduvaha ña —catyí ra.

51 Tan cuhva tsa tsaá ra Jesús vehe ra Jairo, ña tsaá ra quihvi nyívi tsitsi vehe. Maa ñi maa ra Pedro tan ra Jacobo tan ra Juan tan jutu ñaha luhlu can tshin síhi ña quihvi ñi tsitsi vehe nu canyí ñaha luhlu tsa tshí can.

52 Tan tandihí ñi tsacú xaan ñi tsa cuenda tyin tshí ña. Maa tyin ra Jesús catyí ra tshin ñi:

—Ña vacu ca ndo. Tyin ña tshí ña. Quixí ña —catyí ra.

53 Maa tyin tsacú naaha ñi tsa caahán ra tacan. Tan ña tsinú iñi ñi, tyin tsitó ñi tyin tsa tshí ña.

54 Tacan tan tñn ra Jesús ndaha ña. Tan tsaá nacahan ra tan catyí ra tshin ña:

—Nduvita, ñaha luhlu —catyí ra.

55 Tacan tan nandoto ña. Tan iin yaha ñi nduvita ña. Tan catyí ra Jesús:

—Cuhva ndo tsa catsi ña.

⁵⁶ Tan jutu ña tsihin sihi ña, iyo xaan cuñí ñi. Maa tyin catyí ra Jesús tsihin ñi tyin yoñi maa tsihin cua cahan ñi tsa cuvı́ ican.

9

Nu tava ra Jesús tyiñu tsi tsa utsi uvi taahan ra tsicá tsihin ra tyin cahan ra naha tuhun Nyoo (Mt. 10.5-15; Mr. 6.7-13)

¹ Cana ra Jesús tsa utsi uvi taahan ra tsicá tsihin ra. Tan tsaha ra tunyee iñi cahnu tsi ra naha tyin cuvı́ tava ra naha tatyı́ ña vaha tsi nyı́vi, tan cuvı́ janduvaha ra naha tsi nyı́vi cuuhví.

² Tan tava tyiñu ra tsi ra naha na cahan ra naha nácaa ndacá ñaha Nyoo tsi nyı́vi. Tan tava tucu ra tyiñu tsi ra naha na janduvaha ra naha tsi nyı́vi cuuhví.

³ Tan catyí ra tsihin ra naha:

—Nduve tsa cuiso ndo ityi cahun ndo, ndi tatun ña cundaha ndo. Ndi marali tan ndi tsa catsi ndo tan ña cundaha ndo. Tan ndi xuhun ña cundaha ndo. Tan iin nditsi ñi jahma ñuhú ndo cahun tsihin ndo.

⁴ Tan ndáa cuvı́ ñi vehe tsaa ndo, ndoo ndo ican nda cuanda quita quı́vi tsa cahun ndo inga ñuu.

⁵ Tan nu ña cuñí nyı́vi tyaa soho ñi tsa caahán ndo, quita ndo ñuu ican. Tan naquisi ndo nyaca ñuhu tsaha ndo. Tan yacan janahá tyin ndoó cuatyı́ ñi siqui ñi —catyí ra Jesús tsihin ra naha.

⁶ Tacan tan cuahán ra naha tandihı́ maa ñuu. Tan caahán ra naha tuhun Nyoo tan nácaa cuñí tsi tan cacu ñi. Tan janduvaha ra naha tsi nyı́vi cuuhví.

Nu cuñi ra Herodes coto ra yoo ra cuvi ra tsica nuu caahan tuhun Nyoo tan janduvaha ra nyivi (Mt. 14.1-12; Mr. 6. 14-29)

⁷ Ra Herodes, ra cuvi ra ndaca ñaha [tani# cahnu Galilea], ñih_i tuhun ra tsa javaha ra Jesús. Tan ña ñih_i vaha ra cuhva yoo ra cuvi ra. Tyin yih_i nyivi caty_i ñi tyin ra Juan nandoto.

⁸ Tan yih_i ñi caty_i ñi tyin ra Elías quituvi nyico. Tan yih_i ñi caty_i ñi tyin inga ra cuvi ndusu yuhu Nyoo tsanaha nandoto.

⁹ Maa tyin caty_i ra Herodes:

—Maa maa yu tyih_i tyiñu tsa tyahnya jucun ra Juan. Tun tacan, ¿yoo ra cuvi ra tsa caahan xaan nyivi tuhun caty_i ñi tsiñi yu tyin cuaha xaan tsa iyo javaha ra? —caty_i ra.

Tan ra Herodes can nducú xaan ra cuhva nyehe ra tsi ra.

Nu tsaha ra Jesús tsa catsi uhun mil rayi (Mt. 14.13-21; Mr. 6.30-44; Jn 6.1-14)

¹⁰ Tan cuhva tsa tsa# nyico ra tava tyiñu ra Jesús, tan nacaty_i tuhun ra naha tsihin ra Jesús tandih_i maa tsa cuvi nu tsahan ra naha. Tacan tan tava siin ra Jesús tsi ra naha tan cuahan ra naha yatyin ñi iin ñuu tsa nañi Betsaida.

¹¹ Maa tyin cuhva tsa ñih_i tuhun nyivi tyin cuahan ra Jesús ndacan, tan cuahan ñi nda nu nyii ra. Tan naquih_i cuenda ra tsi ñi. Tacan tan quitsaha caahan ra tsihin ñi nácaa ndaca ñaha Nyoo tsi ñi. Tan janduvaha ra tsi nyivi cuuhvi.

¹² Tan tsa tseñi cuii ña, tsa utsi uvi taahan ra tsica tsihin ra Jesús caty_i ra naha tsihin ra:

—Cahan tsihin nyivi ihya, na cunuhu ñi na quitatu ñi, na nanducu ñi tsa catsi ñi ñuu tsa canyíi yatyin ñi ihya, tyin ihya nduve maa tsa catsi yo iyó —catyí ra naha.

¹³ Tacan tan catyí ra Jesús tsihin ra naha:

—Cuhva nyooho tsa catsi ñi —catyí ra.

Tacan tan catyí ra naha:

—Nduve maa tsa iyó ihya. Uhun taahan ñi paan, tan uvi taahan ñi tyaca iyó. Maa tyin ña ñihi tsa catsi tandihí nyivi ihya. Ndi maa cuhun ndi cujata ndi, maa tyin ña cua ñihi tsa catsi ñi tyin cuaha xaan ñi —catyí ra naha.

¹⁴ Tyin vasiqui quitá maa uhun mil rayi yucú ican. Tan siin maa ñiñaha tsihin sehe ñi. Tacan tan ra Jesús catyí ra tsihin ra naha:

—Na cunyecu nyivi tsa uvi xico utsi taahan ñi iin iin nu cunyecu ñi.

¹⁵ Tacan tan tsicunyecu tandihí ñi jahá ra naha.

¹⁶ Tan quihín ra Jesús uhun taahan paan ican tsihin uvi taahan tyaca ican. Tan nanyehé ndaa ra ityi andivi, tan nacuhva ra tyahvi nyoo tsi Nyoo tsa cuenda can. Tan tsahnya sava ra paan tan tyaca ican. Tan tsaha ra tsi ra tsicá tsihin ra, na tsatsa ra naha can tsi nyivi.

¹⁷ Tacan tan tandihí ñi tsatsi ñi, tan ndaha vaha iñi ñi. Yahá can tan ndoo ca tsa ñahñu, tan jacutu ra naha utsi uvi taahan tyica tsihin tsa ñahñu ican.

Nu catyi ra Pedro tyin ra Jesús cuví ra Cristo, ra jacacú tsi yo

(Mt. 16.13-19; Mr. 8.27-29)

¹⁸ Iin quivi quitá siin ra Jesús tsihin ra tsicá tsihin ra. Tan tsican tahvi ra tsi Nyoo. Tan nu ndihí

tsican tahvi ra, tan tsica tuhun ra tsi ra tsicá tsihin ra tan catyí ra tsihin ra naha:

—¿Náa catyí nyivi tuhun yu, yóo ra cuví yu, catyí ñi?

¹⁹ Tan nacahan ra tsicá tsihin ra, tan catyí ra naha:

—Yihí ñi catyí ñi tyin ra Juan, ra jacoondutyá tsi nyivi, cuví un. Tan yihí ñi catyí ñi tyin ra Elías cuví un. Tan yihí ñi catyí ñi tyin inga ra cuví ndusu yuhu Nyoo tahan tsanaha cuví un —catyí ra naha.

²⁰ Tacan tan nducu tuhun ra Jesús tsi ra naha, tan catyí ra:

—Tan nyooho, ¿yóo ra cuví yuhu, cuñí maa ndo?

Tan nacahan ra Pedro, tan catyí ra:

—Yooho cuví ra Cristo, ra tsa quee nu nyaá Nyoo.

²¹ Tan catyí ra Jesús tsihin ra naha tyin ña cahan ra naha can tsihin nyivi.

*Nu jacoto ra Jesús nácaa cua cahñi nyivi tsi ra
(Mt. 16.20-28; Mr. 8.30—9.1)*

²² Tacan tan catyí ra tsihin ra naha inga tsaha:

—Yuhu Rayi tsa quee nda gloria cuví yu. Tan taahan tsi tyin cuaha xaan tundocho cua nyehe yu. Tan ra cuví mandoñi naha ra, tan ra cuví jutu tsa cuví ityi nuu naha ra, tsihin ra maestro cuenda ley naha ra ña cua tsinu iñi ra naha tsi yu. Tan cua cahñi ra naha tsi yu. Maa tyin tsa tsinu uñi quivi cua nandoto yu —catyí ra Jesús.

²³ Tacan tan catyí ra tsihin ra naha:

—Nyooho tsa cuñí cunyicun tsi yu, cahnya iñi ndo tsa cuñí maa ndo javaha ndo, tacan tan cuví javaha ndo tsa cuñí Nyoo. Ña ndu uvi iñi ndo tsa

yihí ndo cuenda yu vasu tandihí quiví nyehé ndo tundo. Tyin yacan cuví tumaa cruu tsa taahán tsi cuiso ndo tatun cua cunyicun ndo tsi yu.

²⁴ Tan nyooho tsa ña cuñí nyehe tundo tan ña cuñí ndo cuhva ndo ñayiví iyó ndo tsa cuenda yu, cua nyehe ndo tundo anyaya. Maa tyin nyooho tsa cua cuhva ñayiví iyó ndo tsa cuenda yu, cua cacu ndo.

²⁵ Nduve yahvi nyaá cua ñihi ndo tandihí tsa iyó nu ñuhu ñayiví ihya, tun ña cua cacu añima ndo.

²⁶ Tyin tatun cahan nuu ndo tsa xaan cuñí nyiví nyehé ñi tsi ndo tsacatyí yuhu, tan tsacatyí tuhun caahán yu, cua nducahan tucu nuu maa yu nyehe yu tsi ndo na tsa quiví quitsi yu inga tsaha. Tyin cua quitsi nyico yuhu Rayí tsa quee nda gloria tsihin tsa cahnu cuví yu, tan tsa cahnu cuví Nyoo Jutu yo, tan ángel tsa cuenda ra.

²⁷ Tan tsa nditsa catyí yu tsihin ndo tyin yihí ndo tsa nyecú ndo ihya vityin, ña cua cúu ndo nda cuanda yaha nyehe ndo nácaa cuví nu ndacá ñaha Nyoo.

Nu uñi taahan ra tsicá tsihin ra Jesús nyehé ra naha nácaa cuví nu ndacá ñaha Nyoo

(Mt. 17.1-8; Mr. 9.2-8)

²⁸ Una quiví yahá tsa cahan ra Jesús yacan, tan ndaa ra iin yucu tyin cua ndacan tahvi ra tsi Nyoo. Tan cuahán ra Pedro, ra Jacobo tan ra Juan tsihin ra.

²⁹ Tan tsa ndi tsicán tahvi ca ra Jesús, tan nasama cuhva caá nuu ra tan jahma ra. Sii xaan cuitsin tsi tan xiñu tsi.

³⁰ Tacan tan quituví uvi taahan ra natuhún tsihin ra, ra Moisés tan ra Elías.

³¹ Tan nditsin xaan nu yucú ra naha. Tan caahán ra naha cuenda tsa cua nyehe ra Jesús tundoho ñuu Jerusalén tan cua cúu ra.

³² Tan vasu cuñí xaan ra Pedro naha ra cusu ra naha, maa tyin ña quixi maa ra naha tyin nyehé ra naha tsa nditsin cuví nu nyaá ra Jesús tsihin ra nyecú tsihin ra.

³³ Cuhva tsa cuahán ra tsinyecu tsihin ra Jesús, tan catyí ra Pedro:

—Maestro, vaha xaan tsa yucú ndi ihya. Na javaha ndi uñi taahan tyahva, iin tsi maa un, iin tsi ra Moisés, tan iin tsi ra Elías —catyí ra Pedro, maa tyin ña tsitó ra tsa caahán ra.

³⁴ Tan tsa ndi caahán ca ra tan quitsi iin vico siqui ra naha. Tan nayuhvi xaan ra naha tsa quihvi ra naha tsitsi vico ican.

³⁵ Tacan tan tsitsi vico ican tsiñi ra naha iin ndusu tsa catyí:

—Juvín ra ihya cuví Sehe yu, tan cuñí xaan yu tsi ra. Tyaa soho ndo tsa caahán ra —catyí ndusu ican.

³⁶ Tan tsa yaha cahan ndusu ican, tan nanyehe ra naha tyin intuhun ña maa ra Jesús nyaá ican. Tan yoñi maa tsihin cahan ra naha tsa nyehe ra naha.

Nu janduvaha ra Jesús tsi iin ra luhlu tsa yihí tatyí ña vaha

(Mt. 17.14-21; Mr. 9.14-29)

³⁷ Tan tsa inga quivi tsa nuu ra Jesús yucu ican, cuaha xaan nyivi tsijatahan tsi ra.

³⁸ Tacan tan cana tsaa iin ra cuahán tsihin nyivi cuaha tsa tsijatahan tsi ra Jesús, tan catyí ra:

—Maestro, jaha tumañi iñi. Cundaahvi iñi tsi sehe yu. Tyin intuhun ñi maa ra cuví sehe yu.

³⁹ Tan tuhvá tatyí ña vaha quihví tsi ra. Tan tuhvá ra caná tsa jahá nu. Tan janduvá nu tsi ra ndasava. Tan quitá tiñuu yuhu ra. Quiñi xaan taahán ra jahá nu. Tan ña cuñí maa nu tatyí ña vaha ican jaña nu tsi ra.

⁴⁰ Tsa cahán yu tsihin ra tsicá tsihin un na tava ra naha tsi nu tatyí ña vaha ican, maa tyin ña cuví tavá ra naha tsi nu —catyí ra.

⁴¹ Tacan tan nacahán ra Jesús tan catyí ra:

—Nyooho, nyívi ña tsinú vaha iñi. Tan caquiñi ndo. ¿Najava taahan ca quívi cunyaa yu tsihin ndo tan cunyeé iñi yu nyehe yu tsi ndo nda cuando cutuhva ndo tan tsinu iñi ndo tsi yu?

Tan catyí ra tsihin ra ican:

—Ndaca sehe un tsi yu.

⁴² Tan cuhva tsa natuhvá ra luhlu can nu nyaá ra Jesús, tan janduvá nu tatyí ña vaha ican tsi ra ndasava. Maa tyin ra Jesús tavá ra tsi nu tatyí ña vaha ican. Tan janduvahá ra tsi ra. Tacan tan nacuhvá cuenda ra tsi ra tsi jutu ra.

⁴³ Tan tandíhi nyívi, iyo xaan cuñí ñi tsa cahnu tsa javahá Nyoo nu yucú ñi.

Tsitsi tsa iyo cuñí nyívi tsa javahá ra Jesús, tan catyí ra tsihin ra tsicá tsihin ra:

Nu cahán ra Jesús inga tsaha tyin cua cahñi nyívi tsi ra

(Mt. 17.22-23; Mr. 9.30-32)

⁴⁴ —Tyaa soho vaha ndo tuhun caahán yu. Tan ña naa iñi ndo. Tyin Rayii tsa quee nda gloria,

cua cuhva cuenda nyivi tsi ra tsi ra xaan iñi tsi ra —catyí ra Jesús.

⁴⁵ Maa tyin ra tsicá tsihin ra ña cutuñí iñi ra naha nacuenda cahan ra tacan. Tyin Nyoo ña tsaha ra tsa cutuñi iñi ra naha. Tan yuuhví ra naha nducu tuhun ra naha tsi ra Jesús náa cuví tsa caahán ra.

Nu janaha ra Jesús yóo ra tsa cahnu ca cuví nu ndacá ñaha Nyoo

(Mt. 18.1-5; Mr. 9.33-37)

⁴⁶ Tacan tan ra tsicá tsihin ra quitsaha caahán yuhu tahan ra naha, ndáa ra cahnu ca cuví tsitsi tsa utsi uvi taahan ra naha.

⁴⁷ Tan tsitó ra Jesús tsa tsicá iñi ra naha, tan quihin ra iin ra luhlu.

⁴⁸ Tan catyí ra tsihin ra naha:

—Tatun tsihin sivi yu naquihín cuenda ndo tsi iin nyivi tsa ña cahnu jahá ñi tsi ñi tumaa ra luhlu ihya, tsi yuhu naquihín cuenda ndo cuví can. Tan tatun naquihín cuenda ndo tsi yu, tsi maa Nyoo tsa jaquitsi tsi yu, naquihín cuenda ndo. Tyin nu yucú ndo, ra tsa ña cahnu cuví, juvin ra cuví ra cahnu cuví nuu Nyoo —catyí ra Jesús.

Nyivi tsa ña cuxaán tsi yo, juvin ñi ican jatyinyeé tsi yo

(Mr. 9.38-40)

⁴⁹ Tacan tan ra Juan catyí ra tsihin ra Jesús:

—Maestro, nyehē ndi tsi iin ra tavá tatyí ña vaha. Caahán ra sivi un tan tavá ra tatyí ña vaha. Maa tyin ña tsaha ca ndi javaha ra tacan. Tyin ñavin tsihin yo tsicá ra —catyí ra.

⁵⁰ Tacan tan catyí ra Jesús tsihin ra:

—Ña casi ndo tsi ra. Tyin ra ican, ñavin ra xaan iñi tsi yo cuví ra, juvin ra cutahán tsihin yo cuví ra —catyí ra.

Nu cahān ra Jesús tsihin ra Juan tan tsihin ra Jacobo tyin ña vaha tsa tsicá iñi ra naha

⁵¹ Tuví iñi ra Jesús tyin tsa nyaa naa yatyin quivi tsa cunuhu ra gloria. Tan jandu iin ra iñi ra, tan quihin ra ityi tan cuahán ra ñuu Jerusalén.

⁵² Tan tava tyiñu ra na cahun ra tsicá tsihin ra ityi nuu ca. Tan cuahán ra naha nda iin ñuu cuenda Samaria, tyin nducú ra naha nu quitatu ra Jesús.

⁵³ Maa tyin nyivi Samaria ican, ña cuñi ñi tsa ndoo ra ndacan, tyin tuví iñi ñi tyin Jerusalén cuahán ra, tan nyivi Samaria ndasi cuñi ñi nyehe ñi tsi nyivi ñuu Jerusalén.

⁵⁴ Tan tsa tsitó ra Jacobo tan ra Juan tsa ña tsahá ñi Samaria ican tsa ndoo ra ican, catyí ra naha tsihin ra Jesús:

—Jutu Mañi ndi, ¿A cuñi un tsa ica yo tumaa ica ra Elías? Cua ndacan yo tsi Nyoo na jaquitsi ra ñuhu andivi tyin cayu ñi Samaria ican tyin ña cuñi ñi tsa ndoo yo ñuu ñi —catyí ra naha.

⁵⁵ Tacan tan nyehe ra Jesús nuu ra naha. Tan cuxaan ra tsi ra naha tan catyí ra:

—Taxin ñi ndo. Ña vaha tsicá iñi ndo tyin ña cutuñi iñi ndo náa tyiñu vatsí yuhu.

⁵⁶ Tyin Rayii tsa quee nda gloria, ña vatsí ra tyin janaa ra tsi nyivi, maa tyin vatsí ra tyin jacacu ra tsi ñi —catyí ra.

Tacan tan cuahán ra naha inga ñuu.

*Nyivi tsa cuñi quihvi cuenda ra Jesús
(Mt. 8.19-22)*

57 Tan tsitsi tsa tsicá ityi ra naha, quita iin ra, tan catyí ra tsihin ra Jesús:

—Jutu Mañi yu, cuñi yu cunyicun yu tsi un. Tan cuhun yu tsihin un tandihí ñi ityi cuhun un —catyí ra.

58 Tacan tan catyí ra Jesús tsihin ra:

—¿A nditsa un? Tyin ñicuii iyó vehe ti. Tan saa iyó taca ti. Maa tyin Rayi tsa quee nda gloria ndi nu cava jiñi ra tan nduve iyó —catyí ra tsihin ra ican.

59 Tacan tan catyí ra Jesús tsihin inga ra:

—Cohon tsihin yu.

Tacan tan nacahan ra ican, tan catyí ra:

—Taa, cūatu nuu tsi yu, na cuhun jihna yu cucutsi yu tsi jutu yu —catyí ra.

60 Tacan tan ra Jesús nacahan ra tan catyí ra tsihin ra:

—Nācoo tsi nyivi ña iyó Nyoo añima na cucutsi tahan maa ñi tsi ñi tsitsi ñuhu tun tsihi ñi. Maa tyin yooho cuaahan cahan un tuhun Nyoo tsihin nyivi na cuhva cuenda ñi tsi ñi tsi Nyoo na cundaca ñaha ra tsi ñi —catyí ra.

61 Tacan tan catyí inga ra tsihin ra Jesús:

—Cuñi yu cunyicun yu tsi un, tata. Maa tyin cuhva na cuhun jihna yu cucahan yu tsihin nyivi vehe yu —catyí ra.

62 Tan ra Jesús catyí ra tsihin ra:

—Tumaa iin ra tahví ñuhu tsihin indiqui, tatun nanyehe tsata ra, ña quita vaha yucun nu jahá tyiñu ra. Tan tacan cuví iin ra nyicún tsi yu, tatun

cuñi nyico ra tsa tsa nacoq ra, ña cuvi cuhva ra tsi ra cundaca ñaha Nyoo —catyi ra Jesús tsihin ra.

10

Nu tava ra Jesús tyiñu tsi uñi xico utsi taahan ra cua cahan tuhun Nyoo tsihin nyivi

¹ Tsa yaha can tan nacatsi Jutu Mañi yo Jesús tsi inga uñi xico utsi ca ra naha. Tan jacuhun ra tsi ra naha tandihi ñi ñuu, uvi uvi ra cuahan tsa iin nu cuahán ra nu cua cahun ra Jesús.

² Tan catyi ra tsihin ra naha:

—Tumaa iin itu cahnu xaan, tacan cuvi tyiñu jahá yu. Maa tyin cumañi xaan musu. Yacan cuenda ndacan ndo tsi Nyoo na jaquitsi ca ra musu, tyin jatyinyee ra naha tsi ndo cahan ndo tuhun Nyoo tsihin nyivi.

³ Tan cuaahan ndo tan nyehe ndo tyin cua jacuhun yu tsi ndo tumaa mbee mahñu lobo tsa cuvi quití xaan. Tyin lobo tuhvá ti tsahñi tsi mbee. Tan tacan tucu cua cuñi nyivi cahñi ñi tsi ndo.

⁴ Tan ña cua cuiso ndo ndi marali tan ndi nu yihí xuhun ndo, tan ndi inga pari nditsan ndo ña cuiso ndo. Janumi ndo. Tun taahán ndo nyivi ityi cuahán ndo cuhva ndo nacumi tsi ñi tan ña cucuiñi ndo natuhun ndo tsihin ñi.

⁵ Cuhva tsa quihvi ndo tsitsi vehe iin nyivi, cahan ndo tsihin ñi. Tan catyi ndo, na coo tsa vaha añima ñi.

⁶ Tan tacan tucu tatun iyó nyivi vaha iñi vehe ican, cua ndoo tsa vaha can tsihin ñi. Maa tyin tatun yoñi ñi vaha añima, ña cua ndoo tsa vaha tsihin ñi.

⁷ Tan ndoo ndo juvin ñi maa vehe ican. Tatun tsahá ñi tsa catsi ndo, catsi ndo. Tatun tsahá ñi tsa coho ndo, coho ndo itsi. Tyin ra jahá tyiñu, iyó ndatu tsi ra tsa catsi ra tsa jahá canaa ra. Iin ñi maa vehe ican cuyucu ndo nda cuanda tsa tsa quiivi tsa cuhun ndo inga ñuu.

⁸ Tan nu tsa ndo iin ñuu tan vaha cahan ñi tsihin ndo, catsi ndo tandihi tsa cuhva ñi catsi ndo.

⁹ Tan janduvaha ndo tsi ñi cuuhvi ñuu ican. Tan catyi ndo tsihin ñi: “Tsa nyanaá yatyin Nyoo, ra cuñi quihvi añima ndo cundaca ñaha ra tsi ndo.”

¹⁰ Maa tyin tatun tsa ndo iin ñuu tan ña cuñi nyivi tyaa soho ñi tsa caahán ndo, quita ndo ityi cahnu. Tan catyi ndo tsihin ñi:

¹¹ “Nda cuanda nyaca ñuhu ñuu ndo tsa iñi tsaha ndi, tan cua naquisi ndi. Tyin cuñi tsi catyi tyin cuatyí ndo ndoo can siqui ndo. Tyin Nyoo nyanaá yatyin ra tsihin ndo tan ña tyaá soho ndo tsa caahán ra nácaa cuñi tsi tsa cundaca ñaha ra tsi ndo.” Tacan catyi ndo tsihin ñi —catyi ra Jesús tsihin ra tsa uñi xico utsi can naha ra.

¹² Tan catyi tucu ra tsihin ra naha:

—Quiivi cua tatsi tuñi Nyoo tsi nyivi, yaha ca cuhva cua nyehe nyivi ñuu ican tundoho tan ñavin ca nyivi tsicoo tahan tsanaha ñuu Sodoma, —catyi ra Jesús.

Nyivi ña tyaá soho tuhun caahán ra Jesús cua nyehe ñi tundoho

(Mt. 11.20-24)

¹³ Tan catyi ra Jesús:

—¡Ndahvi nyooho, nyivi ñuu Corazin! Tan ¡ndahvi nyooho nyivi ñuu Betsaida! Tyin nyehé ndo tsa iyo javahá yu, tan ña cuñi ndo nasamá ndo cuhva iyó

ndo. Maa tyin nyiví ñuu Tiro tan ñuu Sidón nduve tsa nyehe ñi. Maa tyin tun tsatyin nyehe ñi tsa nyehé nyooho vityin, numi xaan cua cunditsi ñi jahma tucuihya iñi tan cunyecú ñi nu nyaa: tsa ndu uvi iñi ñi cuatyí ñi cuví can.

¹⁴ Yacan cuenda, nyooho nyiví ñuu Corazin tsihin ñuu Betsaida, ñihi ca cua tatsi tuñi Nyoo tsi ndo tan ñavin ca nyiví ñuu Tiro tan nyiví ñuu Sidón can.

¹⁵ Tan nyooho nyiví ñuu Capernaum, cuñi maa ndo tyin cundaa ndo nda cuanda andiví. Maa tyin cua nuu ndo nda cuanda nu yucú ndiyí anyaya, tyin ña tyaá yahvi ndo tuhun Nyoo —catyí ra Jesús.

¹⁶ Tan catyí ra tsihin tsa uñi xico utsi taahan ra can naha ra:

—Nyiví tsa tyaá soho tsa caahán nyooho, tsa caahán yuhu tyaá soho ñi. Tan nyiví ña tyaá soho tsa caahán nyooho, tsa caahán yuhu ña tyaá yahvi ñi. Tan ñi ña tyaá yahvi tsa caahán yuhu, tsa caahán ra tsa jaquitsi tsi yu, ña tyaá yahvi ñi —catyí ra Jesús tsihin ra naha.

Nu tsaq nyico tsa uñi xico utsi ra tsa tsahan tsicahan tuhun Nyoo

¹⁷ Ihya cuví nu tsaq nyico tsa uñi xico utsi ra tsa tsahan tsicahan tuhun Nyoo tsihin nyiví. Tan sii xaan cuñi ra naha. Tan catyí ra naha tsihin ra Jesús:

—Jutu Mañi nyuhu, nda cuanda nu tatyí ña vaha tan tyaá yahvi nahnu tsa cahān ndi tsihin siví un —catyí ra naha.

¹⁸ Tacan tan catyí ra Jesús tsihin ra naha:

—Tacan tyin yuhu nyehe yu andiví nu canacava nu ña vaha, nu nañí Satanás. Tumaa cañí iin tatsa savi, tacan canacava nu.

¹⁹ Tan maa yuhu, tsaha tunyee iñi tsi ndo tyin cuví cañi tahan ndo tsihin nu ña vaha. Tan cuví cuañi ndo tsata coo tan tujuhma, tan nduve tsa cua jaha ti naha ti tsi ndo.

²⁰ Maa tyin ña cusii xaan iñi ndo tyin cuví tava ndo tatyí ña vaha ican. Cusii ca iñi ndo tyin nyaá sivi ndo nu libru Nyoo nda gloria —catyí ra Jesús tsihin ra naha.

Nu jacahnú ra Jesús tsi Nyoo tsa sii cuñí ra tyin janahá Nyoo tsa vaha tsi nyivi ndaahvi

(Mt. 11.25-27; 13.16-17)

²¹ Tacan tan sii xaan cuñí ra Jesús jahá Tatyí Ii Nyoo, tan catyí ra:

—Jacahnú yu tsi un, Jutu yu, tyin yoocho cuví ra ndacá ñaha andiví tan nu ñuhu ñayivi ihya. Tyin maa un janahá un tuhun maa un tsi nyivi ndaahvi ihya. Tan ña janahá un tsi un tsi ra tsitó tan ra nyityi. Tacan cuví tsi Jutu yu tyin tacan cuñí maa un —catyí ra Jesús.

²² Tan catyí ra Jesús tsihin tandihi ra naha:

—Tandihi maa tsaha Jutu yu tsi yu. Yoñi tsitó tsi yu, intuhun ñi maa Jutu yu tsitó tsi yu. Tan yoñi tsitó yoo ra cuví Sehe Nyoo, intuhun ñi maa Jutu ra tsitó tsi ra. Tan yoñi tsitó yoo ra cuví Nyoo Jutu, intuhun ñi Sehe ra tsitó tsi ra. Tan coto tucu nyivi tsa cuñí Sehe Nyoo jacoto ra tsi ñi —catyí ra Jesús.

²³ Tacan tan nanyehe ra nu nyecú ra tsicá tsihin ra. Tan caahán xeehe ra tsihin ra naha:

—Sii xaan cuñí nyoocho tan nyivi tsa iyó vityin tyin nyehé ndo tsa javahá yu.

24 Tyin cuaha xaan rey tan ra cuví ndusu yuhu Nyoo taħan tsanaha, cuñi ra naha nyehe ra naha tsa nyehé nyooho vityin. Maa tyin ña nyehe ra naha. Tan cuñi ra naha tyaa soho ra naha tsa tsiñi nyooho vityin. Maa tyin ña tsiñi ra naha —catyí ra Jesús tsihin ra tsa tsicá tsihin ra.

Nu jacuahā ra Jesús tsi yo tyin taahán tsi jatyinyee yo tsi tandihi ñi maa nyivi

25 Tacan tan tsaā iin ra maestro cuenda ley vehe ñuhu. Tan quitsahā tsicá tuhun ra tsi ra Jesús, tyin nducú cuhva ra tsi ra. Tan catyí ra:

—Maestro, ¿nácaa cua javaha yu tan cahun yu coo yu ñayivi nyito tsa ña cua naa maa?

26 Tacan tan nacahān ra Jesús, tan catyí ra tsihin ra:

—¿Náa catyí nu ley? ¿Nacaa catyí tsa cahvi un?

27 Tacan tan nacahān ra maestro cuenda ley ican tan catyí ra:

—Catyí ley tyin cuñi yo tsi Nyoo tsihin taniñi añima yo tan tsihin tandihi cuhva tsicá iñi yo, tan tsihin tandihi tunyee iñi tsa iyó tsi yo, tan tsihin tandihi tsa tsiñi tuñi tsa iyó tsi yo. Tan cuñi yo tsi nyivi tumaa tsa cuñi yo tsi maa yo. Tacan catyí ley —catyí ra ican.

28 Tacan tan catyí ra Jesús tsihin ra:

—Nditsa tsa caahán un. Tacan javaha un tan coo un ñayivi nyito tsa ña cua naa maa —catyí ra Jesús.

29 Maa tyin ra maestro cuenda ley can cuñi ra cuvi ra ra vaha nuu ra Jesús, tan catyí ra tsihin ra:

—¿Tan yóo nyivi cuñi yu? —catyí ra.

30 Tacan tan nacahān ra Jesús, tan catyí ra:

—Iin ra quee ñuu Jerusalén cuahán ra nda ñuu Jericó. Tan taħan ra tsi nu ñasuhu nahnu. Tan suhı nahnu tandihı maa tsa nyisó ra, nda cuanda jahma ra. Tan cañi nahnu tsi ra nda cuanda tsaquın taxin ña nahnu tsi ra. Tan nacoı ihñi nahnu tsi ra ican.

³¹ Tacan tan yahı iin ra cuvı jutu ityi can. Maa tyin tsa nyehe ra tsi ra canyiı ican, ndasava ñi yahı tsiyo ra.

³² Tacan tan yahı tucu iin ra yihı cuenda vehe ñuhu, ra cuvı tata ra Levı. Maa tyin tsa nyehe ra tsi ra canyiı ican, juvin ñi ndasava yahı ra.

³³ Tacan tucu iin ra Samaria yahı ra juvin ñi ityi can. Tan nyehe ra tsi ra canyiı ican, tan quitsı tsa ndaahvi cuñi ra nyehé ra tsi ra.

³⁴ Tan natuhva ra nu canyiı ra, tan quitsaha tyaa ra numeri tsi ra, tyihı ra acetye tsihin vinu nu uhvi can. Tan tyaa ra iin jahma vita nu uhvi can. Yahı can tan jandaı ra tsi ra tsata burru jana ra, tan quihın ra tsi ra, cuahán tsihin ra nu nyaá iin vehe. Tan jahı cuenda ra tsi ra.

³⁵ Tan tsa inga quıvi tsa cuñi cuhun ra Samaria. Tan tava ra uvi taahan xuhun. Tan tsaha ra tsi ra jatsii vehe can. Tan catyı ra tsihin ra: “Jaha cuenda vaha tsi ra ihya. Tan cuhva tsa catsı ra. Tan jata un numeri tsi ra na nduvaha ñi ra. Tatun cuñi ca tsi xuhun, tyahvi maa yu tsi un tsa quitsı nyico yu”, catyı ra. Tacan tan cuahán ra —catyı ra Jesús.

³⁶ Nu ndihı nacatyı tuhun ra Jesús, tan nducu tuhun ra tsi ra maestro can, tan catyı ra:

—Vaha. ¿Tsa uñi taahan ra naha, tan ndaa ra cuvı ra vaha iñi tsi ra ndaahvi tsa tsinyaı ndaha

nu ñasuhu nahnu? —catyí ra Jesús.

³⁷ Tacan tan catyí ra maestro ican:

—Ra tsa cundaahv̄i iñi tsi ra —catyí ra.

Tacan tan catyí ra Jesús:

—Cuaahan tan ica tucu yooho tacan tsihin nyivi tsa nyehé tundoho —catyí ra.

Nu tsinyaa ra Jesús vehe ña Marta tsihin ña María

³⁸ Tan quih̄in ra Jesús ityi cuahán ra. Tan tsā ra iin ñuu. Tan ican iyó iin ñaha tsa nañí Marta. Tan tsā ra vehe ña. Tan tsah̄a ña quih̄vi ra tsitsi vehe ña.

³⁹ Tan ña Marta, iyó iin tahan ña nañí María. Tan ña María tsicunyāa ña yatyin ñi tsaha ra Jesús, tyin tyaa soho ña tsa caahán ra.

⁴⁰ Tan ña Marta cuaha xaan tyiñu javahá ña. Tan tsā ña nu nyaá ra Jesús, tan catyí ña tsihin ra:

—Yooho tata. ¿A ña tsicá iñi yooho tyin ña tahan yu nacō ña tsi intuhun ñi maa yu tsihin tyiñu ihya? Cahan tsihin ña na jatyinyee ña tsi yu —catyí ña tsihin ra.

⁴¹ Maa tyin ra Jesús catyí ra tsihin ña:

—Marta, Marta, tsicá xaan iñi un tan tuñu xaan cuñí un tsihin tyiñu can.

⁴² Maa tyin iyó intuhun tsa ñiñi ca taahán tsi caca iñi yo. Tan ña María ihya nacats̄i ña tyiñu vaha ca javahá ña. Tan yoñi cuv̄i quinyaa can tsi ña —catyí ra Jesús tsihin ña Marta.

11

Nu jacuah̄a ra Jesús tsi ra tsicá tsihin ra nácaa ndacan tahvi ra naha tsi Nyoo

(Mt. 6.9-15; 7.7-11)

¹ Cuví iin tsaha tsa tsicán tahvi ra Jesús. Tsa ndihí tsicán tahvi ra, tan catyí iin ra tsicá tsihin ra:

—Janaha nácaa ndacan tahvi ndi tsi Nyoo, tumaa janaha ra Juan tsi ra tsica tsihin ra —catyí ra.

² Tacan tan catyí ra Jesús tsihin ra:

—Cua kuhva yu kuhva tsi ndo nácaa. Tyehen ndacan tahvi ndo, catyi ndo:

Jutu Mañi ndi, yooho tsa nyaá un gloria. Jacahnú xaan ndi tsi un.

Na quitsi quivi tsa ndaca ñaha un nu ñuhu ñayivi ihya.

Na javaha nyivi nu ñuhu ñayivi ihya tandihi kuhva cuñi maa un, tumaa kuhva cuví nda gloria.

³ Cuhva tsa catsi ndi tan yaha ndi iin iin quivi.

⁴ Jaha tucahnu iñi tsi ndi tsa cuenda cuatyí ndi. Tyin nyuhu jahá tucu maa ndi tucahnu iñi tsi nyivi xaan iñi tsi ndi.

Ña cua kuhva un tsa nducu kuhva nu ña vaha tsi ndi. Tan jacacu tsi ndi tan ña cua cunyeen nu ña vaha tsihin ndi.

Tacan ndacan tahvi ndo —catyí ra Jesús.

⁵ Tan catyí tucu ra:

—Na catyi yo tyin iin nyooho iyó iin ra vaha iñi tsi ndo, tan tsaá ra vehe ndo tsa tsa cuaa tan catyí ra tsihin ndo: “Jaha tumañi iñi tsi, xin. Cuhva nuu uñi taahán paan tsi yu.

⁶ Tyin iin ra vaha iñi tsi yu ndi tsaá ra yuvehe yu. Tan cañi xaan quee ra. Tan nduve tsa kuhva yu catsi ra.”

⁷ Tan nyooho cua nacahan ndo tan catyi ndo tsihin ra: “Ña jatyañu un tsi yu, xin. Tyin ndasí yuvehe yu. Tan ndi quixí yu tsihin sehe yu. Tan

ña cuví nduvita yu tan cuhva yu tsa cuhva yu tsi un tsa vityin.” Tacan cua catyi ndo tsihin ra.

⁸ Tan catyí yu tsihin ndo. Vasu ra vaha ñni ndo cuví tsi ra can, ña cua nduvita ndo tan cuhva ndo tsa nducú ra tsa numi ñi. Maa tyin tatun caahán yuhu ra tsihin ndo, jandatsan ra yuvehe ndo tan caná tsa ra tsi ndo tsa ña cua cuví cusu ndo, tacan tan cua nduvita ndo tan cuhva ndo tsa nducú ra. Tacan tan ña cua jatyañu ca ra tsi ndo.

⁹ Tan tacan tucu nyooho tsihin Nyoo, ndacan ndo tsi ra. Tan cua cuhva ra tsi ndo. Nanducu ndo tan cua ñihi ndo. Jandatsan ndo yuvehe tan cua nuña.

¹⁰ Tyin tatun ndacan ndo, cua ñihi ndo. Tatun nanducu ndo, cua nañihi ndo. Tatun cua jandatsan ndo yuvehe, cua nuña tsi.

¹¹ Tacan tucu nyooho tsa iyó sehe. Tuhvá ndo tsahá tsa vaha tsi sehe ndo. Ña tuhvá ndo cuhva iin yuu itsi tun tsicán tsi paan. Tan ña tuhvá ndo cuhva iin coo itsi tun tsicán tsi tyaca.

¹² Tan ña tuhvá ndo cuhva tujuhma tsi sehe ndo tatun tsicán tsi ndiví catsi tsi.

¹³ Nyooho quiñi iyó ndo, maa tyin tsitó ndo nácaa cuhva ndo tsa vaha tsi sehe ndo. Tan vihi ca maa Jutu Mañi yo, ra nyaá gloria, cuhva ra Tatyí li ra cunyaa añima ndo tun ndacan ndo tsi ra.

Nu xaan ñni tsi ra Jesús catyí nahnu tyin tsihin tunyee ñni nu ña vaha javahá ra tsa iyo

(Mt. 12.22-30; Mr. 3.20-27)

¹⁴ Ra Jesús tavá ra tatyí ña vaha tsa janduñihí tsi iin rayí. Tsa quita nu tatyí can tsi ra can, cuví nacahan ra. Tacan tan iyo xaan cuñí nyiví tsá nyehé ñi tsa cuví.

15 Tan yihí ñi catyí ñi:

—Ra ihya, tavá ra tatyí ña vaha tsihin tunyee iñi nu Beelzebú nu cuví ityi nuu tsihin tandihí tatyí ña vaha —catyí ñi.

16 Tan yihí ñi cuñí ñi nducu cuhva ñi tsi ra, tan tsicán ñi tsi ra Jesús na javaha ra iin tsa iyo tsa quita andivi.

17 Maa tyin ra Jesús tsitó ra tsa tsicá iñi ñi. Tan catyí ra tsihin ñi:

—Tatun ra ndacá ñaha naha ra tan natahvi ra naha, tan cañi tahan ra naha, tacan tan cundihi tyiñu tsa ndacá ñaha ra naha. Tan tatun iin vehe tan natahvi nyivi tsihin tahan ñi, tacan tan cua tivi nu yucú ñi.

18 Tan tacan tucu nu ña vaha, tatun natahvi nahnu, cua cundihi tunyee iñi tsa iyó tsi nahnu. Caahán yu tyehen tsihin ndo, tyin catyí ndo tyin tsihin tunyee iñi nu Beelzebú tavá yu tsi nu tatyí ña vaha nahnu.

19 Maa tyin tun tsatyin tavá yu tsi nahnu tumaa cuhva catyí ndo, ndaca tuhun ndo tsi ra nyecú tsihin ndo yóo tsahá tunyee iñi tsi ra naha tan tavá ra naha tsi nahnu. Maa ra naha cua cahan tsa nditsa tsihin ndo tyin nyooho soho xaan tsicá iñi ndo.

20 Maa tyin catyí yu tsihin ndo tyin yuhu tavá yu tatyí ña vaha tsihin tunyee iñi Nyoo. Tan cuñí tsi catyi yacan tyin nditsa tyin Nyoo, ra taahán tsi cundaca ñaha tsi nyivi, tsa tsaá ra nu yucú ndo.

Nu jacuahá ra Jesús tyin ñihi ca tunyee iñi Nyoo tan ñavin ca tunyee iñi nu ña vaha

21 Tatun iin ra tan iyó xaan tunyee iñi tsi ra tan nyisó ra mityi ra, tan jahá cuenda ra vehe ra, nu

yíhí xeehe vaha ndaha tyiñu ra tsitsi vehe ra, tsa ña cua cuvi quinyaa ñasuhu.

²² Maa tyin tatun quitsi iin ra tsa cuaha ca tunyee iñi iyó, tan cañí tahan ra tsihin ra, tan cuví jaha canaa ra tsi ra, tacan tan quinyaa ra ndaha tyiñu ra tan natsatsa ra tsi ra vaha iñi tsi ra.

²³ Nyívi ña jahá tyiñu tsihin yu, jatívi ñi tyiñu jahá yu. Tan tatun ña caahán ñi tuhun Nyoo tsihin nyívi, tyin cunyicun ñi tsi yu; cuñí tsi catyi tsi tyin ña tsahá ñi tsa cunyicun nyívi tsi yu.

Nu jacuahá ra Jesús tsi yo nácaa quihvi tatyí ña vaha tsi yo inga tsaha tatun naa iñi yo

²⁴ Tatun iin nu tatyí ña vaha quita nu tsi iin nyívi, tsicá nuu nu iin ñuhu ityi, nanducú nu nu quitatu nu. Maa tyin ña nañihí maa nu nu quitatu nu, tacan tan tsicá iñi nu: “Cunuhu nyico yu nda vehe yu nu quee yu.”

²⁵ Tacan tan tsaá nyico nu añaima nu quee nu. Tan nyehé nu tyin ndii xaan tan sii xaan caá.

²⁶ Tacan tan cua quihin nu utsa taahan ca tatyí ña vaha tsa yaha ca caquiñi tan ñavin ca maa nu. Tacan tan iin caa ñi cua quihvi tandihí nahnu añaima ñi ican. Yacan cuenda yaha ca caquiñi ñi tan ñavin ca tsa jihna ñi —catyí ra Jesús.

Nyívi tsa nditsa iyó vaha ñi nu ñuhu ñayívi

²⁷ Tsitsi tsa ndi caahán ca ra Jesús yacan, tan cana tsa iin ñaha tsa nyí mahñu nyívi ican. Tan catyí ña:

—¡Náa tsa sii cuñí ñaha tsa jacacu tsi un, ñaha tsa jacaxin tsi un! —catyí ña.

²⁸ Maa tyin ra Jesús catyí ra:

—Sīi xaan ca cuñi nyivi tsa tsiñi tuhun caahán Nyoo tan tyaá yahvi ñi itsi —catyí ra.

Nyivi ña vaha, maa ñi maa tsa iyo cuñi ñi nyehe ñi

(Mt. 12.38-42; Mr. 8.12)

²⁹ Tacan tan tsaá ca nyivi nu nyíi ra Jesús. Tan catyí ra tsihin ñi:

—Nyivi tsa iyó vityin quiñi xaan iyó ñi. Tan nyiyo xaan iñi ñi. Cuñi ñi nyehe jihna ñi tsa iyo. Maa tyin intuhun ñi tsa iyo cua nyehe ñi, yacan cuví tsa javahá Nyoo tsihin ra Jonás, ra cuví ndusu yuhu Nyoo tsanaha. Nduve inga ca tsa iyo cua nyehe ñi.

³⁰ Tumaa tsa janahá ra Jonás tsi nyivi ñuu Nínive tahán tsanaha tyin ii Nyoo, tacan tucu yuhu, Rayii tsa quee nda gloria, janahá yu tsi nyivi tsa iyó vityin tyin ii Nyoo.

³¹ Quivi cua tatsi tuñi Nyoo tsi nyivi, cua nandoto ñaha cuví reina ityi sur tahán tsanaha, tan cua catyi ña tyin cuhun ndo anyaya tyin maa ña vasu cañi ñuu ña, maa tyin quitsi ña, quitsi tyaa soho ña tsa tsiñi tuñi tsa cahán ra Salomón. Tan vityin cahnu ca cuví ra nyaá tsihin ndo tan ñavin ca ra Salomón.

³² Tan quivi cua cutuñi tandihi nyivi, cua nandoto nyivi tsicoo ñuu Nínive tahán tsanaha, tan cua catyi ñi tyin nyooho nyivi tsa iyó vityin cuhun ndo anyaya, tyin nyivi Nínive ícan, nasama ñi cuhva iyó ñi quivi cahán ra Jonás tuhun Nyoo tsihin ñi. Tan vityin cahnu ca cuví ra nyaá tsihin ndo tan ñavin ca ra Jonás.

Nu janaha ra Jesús tyin na jaha yo cuenda añima yo na coo tsa nditsin jahá Nyoo

(Mt. 5.15; 6.22-23)

³³ Ndi intuhun ndo tan ña tuhvá ndo tyaá ñuhũ tyuma tan tyihí xeehe ndo can, a tinyíi ndo can tsitsi iin caja. Tyin ñuhũ can taahán tsi cunyi can nu sucun. Tyin tatun quihví nyívi tsitsi vehe ndo, nditsin.

³⁴ Tinuu yo, iin ñuhũ nditsin cuví tsi tsa cuenda cuñu ñuhu yo. Tan tacan tucu tsa nditsin Nyoo, tsa cuenda añima yo. Tatun iyó tsa nditsin jahá Nyoo añima yo, vaha nyívi cuví yo. Tatun nduve tsa nditsin jahá Nyoo añima yo, tumaa iin ra cuaa cuví yo, ña cuví nyehe yo ityi vaha tsa cuahán nu nyaá Nyoo.

³⁵ Yacan cuenda jaha ndo cuenda tsi ndo, na coo tsa nditsin jahá Nyoo añima ndo, tan ña coo tsa naa.

³⁶ Tatun tsitú añima ndo tsihin tsa nditsin jahá Nyoo, nduve ca maa tsa naa iyó tsihin ndo, tyin jandunditsín tsi taníi cahnu ndo. Tumaa tsa nyaá iin ñuhũ tyuma jandunditsín tsi taníi cahnu ndo cuví can —catyí ra Jesús.

Nu cuxaḡḡ ra Jesús tsihin ra maestro cuenda ley vehe ñuhu naha ra tan tsihin ra fariseo naha ra

(Mt. 23.1-36; Mr. 12.38-40; Lc. 20.45-47)

³⁷ Tsa ndihíi caḡḡḡ ra Jesús tsihin nyívi, iin ra fariseo, catyí ra tsihin ra, na cuhun ra cucatsi ra yuvehe ra. Tan tsaḡḡ ra Jesús vehe ra. Tan quihví ra tsicunyaḡḡ ra nu mesa.

³⁸ Tacan tan ra fariseo ican iyo cuñí ra tyin ña nacatyḡḡ ra Jesús ndaha ra tsa ndi cumañi ca catsi ra, tumaa cuhva iyó maa ra naha.

39 Maa tyin Jutu Mañi yo Jesús catyí ra tsihin ra:

—Nyooho, ra cuví fariseo, tumaa tsa tsata ñi vasu tan coho nacuhvá ndo. Maa tyin ityi tsitsi, quiñi xaan caá can tyin ña nacatyá ndo can. Tacan cuví nyooho. Tyin cuñí nyívi tyin vaha ndo. Maa tyin xeehe ñi suhú ndo tan javahá ndo tsa ña vaha.

40 Ndava xaan iñi ndo. ¿A ña tsitó ndo tyin ra tsa javaha ityi tsata ndo, juven ñi maa ra javaha ityi tsitsi ndo?

41 Taahán tsi javaha ndo tumañi iñi tsi nyívi ndaahvi, tan jatyinyee ndo tsi ñi tsihin taniñi añima ndo. Javaha ndo tsa vaha tsihin ñi, tacan tan nduvaha tucu ityi tsitsi ndo.

42 ¡Ndahvi nyooho ra fariseo! tyin nyooho, cahví ndo ndaha menta tan ndaha lura tan náa ndihí ca yucu tsa tsatsí ndo, tan tavá ndo intuhun tsi tsa iin iin utsi tan tsahá ndo tsi Nyoo, maa tyin ña tyaá yahvi ndo tsa vaha tsa cuñí Nyoo javaha yo tan tsa cuñí yo tsi ra. Taahán tsi tsa cuñi vaha ca ndo tsi Nyoo tan javaha ndo cuhva cuñí ra, tan ña jandihí ndo tsa cuhva ndo diezmo can.

43 ¡Ndahvi nyooho tsa cuví ndo fariseo! tyin cuñí ndo cunyaa ndo nu tyayu vaha tsitsi vehe ñuhu. Tan cuñí ndo tsa tyaa yahvi nyívi tsi ndo nuyahvi.

44 ¡Ndahvi nyooho ra maestro cuenda ley, tan nyooho ra fariseo! Vaha xaan jahá ndo tsi ndo tan ña nditsa ndo. Cuví ndo tumaa iin ñaña ndiyi tsa ña nditsin ca canyií. Tyin tsañi nyívi tsata can tan ña tsitó ñi tyin nyii ndiyi tsitsi ñaña ican. Tyin nduve ca cuhva canyií nu nyii ndiyi ican. Cuñí maa nyívi tyin vaha ndo, tan ña tsitó ñi tyin ña vaha añima ndo —catyí ra Jesús.

⁴⁵ Tacan tan nacahan iin ra maestro cuenda ley vehe ñuhu, tan catyí ra:

—Maestro, tsa catyí un tacan, caahan nyaa ndihi un tsi ndi —catyí ra.

⁴⁶ Tacan tan catyí ra Jesús tsihin ra naha:

—¡Ndahvi tucu nyooho ra maestro cuenda ley vehe ñuhu! tyin jacuahá ca ndo ley tsa tsahá Nyoo tahan tsanaha. Tan ña taahan tsi. Tan yoñi ndoyó carga can, tan jañiñi ca ndo na javaha nyivi can, tan maa ndo ndi luxu ña jatyinyeé ndo tsi ñi.

⁴⁷ ¡Ndahvi nyooho! tyin janduvahá vaha ndo ñaña nu ñuhú yiqui ra cuvi ndusu yuhu Nyoo tsa tsahñi ra cuvi tsii tsaahnu ndo tahan tsanaha.

⁴⁸ Yacan cuñi tsi catyi tyin ndoó ndo vaha tsa javahá tsii tsaahnu ndo naha ra. Tyin tsii tsaahnu ndo tsahñi ra naha tsi ra cuvi ndusu yuhu Nyoo. Tan nyooho janduvahá ca ndo ñaña ra naha.

⁴⁹ Yacan cuenda catyi Nyoo tahan tsanaha tsihin tsa tsiñi tuñi ra tyin cua jaquitsi ra tsi ra cua cuvi ndusu yuhu ra tan ra caca tyiñu ra nu iyó ndo. Tan cua cahñi ndo juhva ra naha tan inga ra cua jacunu ndo tsi ra naha.

⁵⁰ Tan nditsa tyin tacan javahá ndo. Nyoo cua tatsi tuñi ra tsi ndo tan tsi nyivi iyó vityin tsa cuenda tandihi ra cuvi ndusu yuhu ra tsa tsahñi tsii tsaahnu ndo naha ra nda cuanda tsinu ñuhu ñayivi tan nda cuanda vityin.

⁵¹ Nda cuanda niñi ra Abel tsa tsati tsa tsahñi ra Caín yañi ra tsi ra, tan nda cuanda niñi ra Zacarías tsa tsahñi nyivi tsitsi vehe ñuhu yatyin nu nyaá altar. Yacan cuenda catyí Nyoo tyin cua tatsi tuñi ra tsi nyivi tsa iyó vityin tsa catyí cuatyí nyivi tsa tsicoo tahan tsanaha.

⁵² ¡Ndahvi nyooho ra maestro cuenda ley vehe ñuhu! tyin tumaa tsa tyihí xeehe ndo ndaha tucu yuvehe nu quihví nyívi ityi nu nyaá Nyoo. Tan ndi maa ndo ña quihví ndo nu nyaá Nyoo. Tan ndi ña tsahá ndo tsa quihví inga nyívi tsa cuñí quihví —catyi ra Jesús.

⁵³ Ndihi cahān ra Jesús tacan. Tan ra maestro cuenda ley vehe ñuhu naha ra tsihin ra fariseo naha ra, nduxaān xaan ra naha tan quitsaha nducú tuhun xaan ra naha tsi ra Jesús.

⁵⁴ Tyin cuñí ra naha tsa cahan ra Jesús iin tsa ña vaha, tyin tacan tan cuvi tyaa ra naha cuatyí tsi ra.

12

Nu jacuahā ra Jesús tyin ña cuví tyihi xeehe yo cuatyí yo

¹ Cuenda mil nyívi ndu iin nda cuanda catyihí tahan ña ñi, tyin cuaha xaan ñi. Tacan tan ra Jesús cahān jihna ra tsihin ra tsicá tsihin ra:

—Jaha ndo cuenda tsi ndo tsihin ra fariseo naha ra tsihin cuatyí ra tsa cuví tumaa yutsan iya. Tyin ndaá paan jahá yutsan iya, tan tacan cuví cuatyí ra can naha ra. Tyin jahá ra naha tyin vaha ra. Maa tyin ña cuví tyihi xeehe ra naha cuatyí ra naha.

² Tyin nduve iin tsa yihí xeehe tan cuñí yo, tyin ña cua quituvi. Tan nduve tsa xeehe tan cuñí yo, tyin ña cua coto nyívi.

³ Yacan cuenda, náa ndihí tsa caahán ndo nu xeehe, cua quita tsi nu nditsin. Tan náa ndihí tsa caahán ndo tsitsi vehe ndo, cua cana tsa nyívi jiñi vehe.

*¿Yóo taahán tsi nayuhvi yo, a tsi nyivi a tsi Nyoo?
(Mt. 10.28-31)*

⁴Tan catyí yu tsihin ndo tsa cuví ndo ra vaha iñi tsi yu, tyin ña nayuhvi ndo tsi nu tsahñí cuñu ñuhu yo. Tyin yaha can tan nduve ca tsa cuví javaha nu tsi yo.

⁵Maa tyin cua catyi yu tsihin ndo yóo taahán tsi nayuhvi ndo. Nayuhvi ndo tan tyaa yahvi ndo tsi Nyoo, ra cuví quinyaa tsa nyito ndo. Tan yaha yacan tan cuví tyihi ra tsi ndo anyaya.

⁶Saa, ña yahvi nyaá ti. Cuví jata yo uhun taahan ti tsihin uvi ñi xuhun. Vasu ndi maa nyihi ñi ti, Nyoo ña naá iñi ra tsi ndi intuhun ti.

⁷Tan nyooho, nyaá yahvi ca ndo nu Nyoo tan ñavin ca tsa cuaha saa can, tan nda cuando ixí jiñi ndo tan tsitó Nyoo najava taahan tsi iyó tyin tsa nacahvi ra intuhun intuhun tsi. Yacan cuando ña nayuhvi ndo.

*Na ña nayuhvi yo cahan yo tuhun ra Jesucristo
tsihin nyivi
(Mt. 10.32-33; 12.32; 10.19-20)*

⁸Catyí yu tsihin ndo tyin tandihí nyooho tsa janahá ndo tsi nyivi tyin tsinú iñi ndo tsi yu, tacan tucu maa yu, cua cahan yu tuhun ndo nuu ángel Nyoo nda gloria. Tyin yuhu Rayii nda gloria quee yu.

⁹Maa tyin nyooho tsa janahá ndo tyin ña tsinú iñi ndo tsi yu, tacan tucu maa yu, cua cahan yu nuu ángel Nyoo tyin ñavin nyivi cuando yu cuví ndo.

¹⁰Tan vasu cuxaan nyivi tsi yuhu, Rayii tsa quee nda gloria, Nyoo cua jaha ra tucahnu iñi tsi ñi. Maa

tyin nyiví caahán tsa ndavaha ñi siquí Tatyí li Nyoo ña cua coo tucahnu iñi tsi ñi cuenda yacan.

¹¹ Quiví tsa cua cundaca nyiví tsi ndo tsitsi vehe ñuhu, nu juez, a nuu ra cumí tyiñu naha ra, ña caca iñi ndo náa tuhun cua nacahan ndo.

¹² Tyin cuhva tsa cua nacahan ndo, cua cuhva maa Tatyí li Nyoo náa tuhun taahán tsi cahan ndo —catyí ra Jesús.

Nu tsaha cuenda ra Jesús tyin ña taahán tsi nyiyo iñi yo tsa cuca

¹³ Iin ra tsa nyíí tsihin nyiví cuaha tsa ndu iin nu nyíí ra Jesús, catyí ra tsihin ra Jesús:

—Maestro, çahan tsihin ra yañi yu na natahvi ra tsa tsii jutu ndi, cuhva ra tsa taahán tsi tsi yu.

¹⁴ Tacan tan catyí ra Jesús tsihin ra:

—¿Tsaa, yóo tsaha tsi yu tsa cuví yu juez tan natahvi yu ndaha tyiñu ndo? —catyí ra.

¹⁵ Tan yahá can tan catyí ra nuu nyiví cuaha can:

—Jaha xaan ndo cuenda tan ña nyiyo xaan iñi ndo tyin ña tsiñí ñuhu tsa coo cuaha ndaha tyiñu yo tan coonyito yo.

¹⁶ Tacan tan tsaha cuenda ra Jesús iin cuhva tsi tandihi nyiví, tan catyí ra:

—Tsicoo iin ra cuca. Tan cuaha xaan ndaha tyiñu ñihí ra nu jahá tyiñu ra.

¹⁷ Tacan tan tsicá iñi ra: “¿Nacaa javaha yu? Nduve nu quihí tandihi ndaha tyiñu ihya.”

¹⁸ Tan catyí ra: “Tsa tsitó yu nácaa cua javaha yu. Cua caní yu tandihi yaca nyihí yu, tan cua javaha yu tsa nahnu ca, tan natyihí yu tandihi ndaha tyiñu can tsihin tandihi ca tsa iyó tsi yu tsitsi can.

19 Tacan tan cua catyí yu tsihin yu: Cuaha xaan ndaha tyiñu naquih̄in vaha un, tan vityin cuahán maa cuiya, q̄itatu, çatsi vaha, çoho vaha, tan çusī iñi.”

20 Tan Nyoo catyí ra tsihin ra can: “Ra soho, tsacuaa vityin cua cúu un, tan tsa naquih̄in vaha un ¿Yóo tsii cua cuví yacan?” catyí Nyoo tsihin ra can.

21 Tacan cuví iin ra tsa jatacá tan tyihí vaha ra tsa cuca tsi ra; maa tyin nuu Nyoo ra ndaahvi cuví ra —catyí ra Jesús.

*Ña caca xaan iñi yo náa ndih̄i tsa tsiñí ñuhu tsi yo
(Mt. 6.25-34)*

22 Tacan tan catyí ra Jesús tsihin ra tsicá tsihin ra:

—Tacan ñi catyí yu tsihin ndo, ña caca xaan iñi ndo nácaa ñihi ndo tsa catsi ndo, tan ndi jahma tsa cunditsi ndo.

23 Tyin nyaá yahvi ca ñayivi tsa nyito yo tan ñavin ca tsa catsi yo. Tan nyaá yahvi ca cuñu ñuhu yo tan ñavin ca tsa nditsí yo.

24 Jaha ndo cuenda saa tyin ña jahá tyiñu ti. Tan ndi ña tyihí vaha ti tsa catsi ti. Maa tyin tsatsí ti, tyin Nyoo tsahá ra tsa catsi ti. Tan nuu Nyoo nyaá yahvi ca nyooho tan ñavin ca saa.

25 Tan vasu ndi maa tsicá xaan iñi ndo maa tyin ña cuví jandusucun ndo luxu ca tsi ndo.

26 Tatun ndi luxu can tan ña cuví jahá ndo, ¿nacuenda tsa tsicá xaan iñi ndo tandih̄i ca tsa tsiñí ñuhu tsi ndo?

27 Jaha ndo cuenda nácaa iyó yutun ita tyin ña jahá tyiñu tun tan ndi ña taví tun yuhva. Maa tyin catyí yu tsihin ndo tyin ndi ra rey Salomón tsihin

tandihí tsa cuca ra tan ña sîi caá tsa tsinditsî ra tumaa tsa jacunditsî Nyoo tsi yutun ita ican.

²⁸ Tatun tacan ñi jacunditsî Nyoo tsi yutun ita tsa iyó nu tsiquí vityin, tan ityaan cua cayu tun tsitsi horno, tan nyooho cahnu ca cuví ndo nuu ra tan ñavin ca yutun ita. ¿A ña cua cuhva ra tsa cunditsi ndo? Maa tyin maa ndo ña tsinú vaha iñi ndo tsi ra.

²⁹ Ña caca xaan iñi ndo tuhun tsa catsi ndo tan tsa coho ndo.

³⁰ Tyin nyívi tsa ña tsinú iñi tsi Nyoo tsicá iñi ñi yacan. Maa tyin Jutu yo Nyoo tsitó ra náa tsiñí ñuhu tsi ndo.

³¹ Vaha ca tsa nducu ndo nácaa cuhva cuenda ndo tsi ndo tsi Nyoo na cundaca ñaha ra tsi ndo. Tan cuhva tucu ra tandihí tsa tsiñí ñuhu tsi ndo.

*Tsa vaha tsa iyó gloria
(Mt. 6.19-21)*

³² Ña nayuhvi nyooho, mbee jana yu. Ña cuaha ndo maa tyin Jutu yo Nyoo cuñí ra tsi ndo. Yacan cuenda cua cuhva ra quihvi ndo nu ndacá ñaha ra.

³³ Xico ndo tsa iyó tsi ndo. Tan jatyyinee ndo tsi nyívi ndaahvi. Tatun javahá ndo tacan, jacayá ndo tsa vaha nuu nyaá Nyoo. Tyin nuu nyaá Nyoo ña ndihí tsa vaha. Tyin yoñi yóo jatívi can ndacan, ndi nu ñasuhu, tan ndi quiti.

³⁴ Tyin nuu iyó tsa cuca ndo, ican cuví nu nyita iñi ndo. Tan ndacan cua coo ndihí añaima ndo —catyí ra.

*Nu jacuahá ra Jesús tsi yo nácaa cuatu yo tsi ra
quívi quitsi ra inga tsaha*

³⁵ 'Cuatu vaha ndo tsi yu tsihin ñuhu nditsin Nyoo quívi quitsi yu inga tsaha.

³⁶ Tan *cuví* ndo tumaa musu tsa ndatú tsi tsitoho ra naha *nãa* *cuhva* *quitsi* ra tsa *cuahán* ra iin *vico* *tindaha*. Tan ndatú ra naha, tyin tacan tan numi *ñi* *cua* *nuña* ra naha *yuvehe* *cuhva* tsa *jandatsan* *tsitoho* ra naha tsa *tsaa* ra.

³⁷⁻³⁸ Tan *sii* *xaan* *cua* *cuñi* ra naha *nyehe* ra naha tsi ra *cuví* *tsitoho* ra naha. Tyin ndatú ra naha tsi ra *nda* *cuanda* tsa *tsaa* ra, *vasu* *ñuu* *taxin*, *vasu* tsa naha *ca*. Tan *cua* *tyaa* ra tsi ra *musu* *ican* naha ra *yuhu* *mesa* tan *cuhva* ra tsa *catsi* ra naha. Tacan tan *sii* *xaan* *cua* *cuñi* *musu* *can* naha ra.

³⁹ Tan *coto* ndo tyin *tatun* *tsitoho* *vehe*, tan *tsitó* ra *nãa* *cuhva* *cua* *quihvi* *ñasuhu* *vehe* ra, *cua* *jaha* ra *cuenda* *vehe* ra. Tan *ña* *cua* *cuhva* ra *quihvi* *nu* *ñasuhu* *ican* *tsitsi* *vehe* ra.

⁴⁰ Tan tacan *cuví* *tucu* *nyooho*, *cuatú* ndo. Tyin *yuhu*, *Rayi* tsa *quee* *nda* *gloria*, *sana* *iñi* ndo tan *cua* *quitsi* *yu* —*catyí* ra *Jesús*.

Musu vaha tan musu ña vaha
(Mt. 24.45-51)

⁴¹ Tacan tan *quitsaha* *nducú* *tuhun* ra *Pedro* tsi ra *Jesús*:

—*Jutu* *Mañi* *yu*, *¿yóo* *cuenda* *caahan* *un* *yacan*?
¿A *tsa* *cuenda* *maa* *ñi* *maa* *ndi*, *a* *tsa* *cuenda* *tandihí* *nyivi*?

⁴² Tacan tan *nacahan* ra *Jesús*, tan *catyí* ra *tsihin* ra:

—*Musu* tsa *tyaá* *soho* tsa *caahán* *tsitoho* ra, *juvin* ra *cuví* *musu* *vaha*. Tyin *jahá* *cuenda* ra *vehe* *tsitoho* ra. Tan *vaha* *cuhva* *tshá* ra tsa *catsi* *tandihí* *ca* *musu* *ican*.

⁴³ Tan *sii* *xaan* *cuñi* *musu* *ican* *tatun* *cuhva* tsa *jahá* *tyiñu* ra, tan *cua* *tsaa* *tsitoho* ra. Tyin *tyaá* *yahvi* ra *tandihí* tsa *taahán* tsi *ica* ra.

44 Tan catyí yu tsihin ndo tyin tsa nditsa. Tyin tsitoho ra cua nacuhva ra tandihí tsa cumí ra, cua quihí ndaha ra. Tyin vaha tyaá yahvi ra tsihin tyiñu jahá ra.

45 Maa tyin tatun tsicá iñi musu ican tyin naha xaan cuahán tsitoho ra, tan quitsaha cañí ra tsi inga musu tsa cutahán tsihin ra tan ñiñaha jahá tyiñu ican, tan ña cuñí ra jaha tyiñu ra. Tyiñu tsatsí ñi tan tyiñu tsiñí nyixi ñi iyó ra.

46 Tacan tan sana iñi ra cua tsa tsitoho ra quivi tsa ña ndatú ra tsi ra, tan cuhva tsa ña tsitó ra. Tacan tan ñihi xaan cua tatsi tuñi tsitoho ra tsi ra, tumaa tuhvá maa ra icá tsihin nyivi tsa ña tsiñú iñi tsa caahán ra.

47 Tan iin musu tsa tsitó nácaa iyó tsitoho ra tan ña javahá ra cuhva cuñí tsitoho ra, cuaha xaan tundoho cua nyehe ra.

48 Maa tyin tatun iin musu tsa ña tsitó, tan javaha ra tsa ña vaha, cua tatsi tuñi tsitoho ra tsi ra, maa tyin luxu ñi. Tyin ña tsitó ra can, tan javaha ra. Tatun iin musu tan cuaha tsa tsaha tsitoho ra tsi ra, cuaha tyiñu taahán tsi nacuhva cuenda ra tsi tsitoho ra. Tan ra tsa cuaha xaan yihí ndaha can, cuaha xaan tyiñu taahán tsi nacuhva cuenda ra tsi tsitoho ra.

Nu cahan ra Jesús tyin tsacatyí ra cua cañi tahan nyivi tsihin nyivi ñi

(Mt. 10.34-36)

49 Tumaa tsa jatahán yu ñuhu nu ñuhu ñayivi, tacan cuví tyiñu vatsí yu. ¡Tan cuñí xaan yu tsa nacayu catyin ña ñuhu ihya!

⁵⁰ Tyin nyaá cua yaha yu iin tundoho cahnu, tan cahnu xaan tundoho iyó yu nda cuanda ndihi tyiñu jahá yu.

⁵¹ Cuñí maa ndo tyin tsa vatsí cuhva yu tsa taxin coo ndo nu ñuhu ñayivi ihya. Maa tyin yuhu vatsí yu tyin jasiin yu tsi ndo.

⁵² Tyin tsa vityin tan ityi nuu ca, uhun taahan nyivi iin vehe ñi cua cusiiñ ñi. Uñi taahan ñi cua cañi tahan tsihin uvi taahan ñi. Tan uvi taahan ñi cua cañi tahan tsihin uñi taahan ñi.

⁵³ Tan ra iyó sehe, cua cañi tahan ra tsihin sehe ra. Tan ra cuví sehe can cua cañi tahan ra tsihin jutu ra. Tan ñaha iyó sehe siihi cua cañi tahan ña tsihin sehe siihi ña. Tan ña cuví sehe siihi can cua cañi tahan ña tsihin sihi ña. Tan ñaha cuví tyiso cua cañi tahan ña tsihin tsanu ña. Tan ñaha cuví tsanu can cua cañi tahan ña tsihin tyiso ña —catyí ra Jesús.

Nu cahan ra Jesús tsihin nyivi tyin ña nacotó ñi tyin tsa tsaá Sehe Nyoo nu yucú ñi (Mt. 16.1-4; Mr. 8.11-13)

⁵⁴ Catyí tucu ra Jesús tsihin nyivi cuaha tsa yucú ican:

—Tatun nyehé ndo tyin tsa yihí vico, catyí ndo tyin tsa cua cuun savi. Tan tacan tsa cuii cuví.

⁵⁵ Tatun tsa nyehé ndo tyin tsa yihí tatyí quee ityi ndutya ñuhu, catyí ndo tyin tsa cua ndu ihñi. Tan quita tsa cuii nu caahán ndo.

⁵⁶ Nyooho jahá ndo tsa tsitó xaan ndo, tan nacotó ndo tandihi tsa cuví andivi, tan tandihi tsa cuví nu ñuhu ñayivi ihya. Tan ¿nacuenta tsa ña nacotó ndo náa tyembu iyó ndo vityin?

Nducu yo cuhva nácaa coo vaha yo tsihin ra tsicán cuatyí tsaha yo coto cuhun yo anyaya (Mt. 5.25-26)

⁵⁷ ¿Nacuenda ña jahá ndo cuenda, ndáa tsa vaha tan ndáa tsa ña vaha?

⁵⁸ Tatun iin ra tsicán cuatyí tsaha ndo tan cuahán ndo tsihin ra nu nyaá ra cumí tyiñu, ityi cuahán ndo nducu ndo cuhva coo vaha ndo tsihin ra tsa ndi cumañi ca tsa ndo nu nyaá ra cumí tyiñu. Coto nacuhva cuenda ra tsi ndo tsi juez. Tan juez ican cua nacuhva cuenda ra tsi ndo tsi ra vitya naha ra. Tan ra vitya naha ra cua tyihi ra naha tsi ndo tsitsi vehe caa.

⁵⁹ Tatun tacan cua cuvi, catyí yu tsihin ndo tyin ña cua quita ndo nda cuanda tyahvi ndo tandihí tsa taahán tsi tyahvi ndo —catyí ra Jesús.

13

Cuñí tsi tsa nasama yo cuhva iyó yo, tun ña cuñí yo cuhun yo anyaya

¹ Tacan tan juvin ñi quivi can nyecu juhva ra naha. Tan quitsaha nacatyí tuhun ra naha tsihin ra Jesús tsa javaha ra Pilato tsihin juhva ra Galilea naha ra. Tyin tava ra tyiñu na cahñi andaru naha ra tsi ra Galilea tsa tsijamañi quiti jana ra naha tsi Nyoo. Tan tacan saca nuu niñi ra ican naha ra tsihin niñi quiti tsa tsijamañi ra ican naha ra.

² Tan nacaħan ra Jesús tan catyí ra tsihin ra naha:

—¿A tsicá iñi nyooħo tyin cahnu xaan ca cuatyí ra Galilea ican naha ra tan ñavin ca tandihí ca ra ñuu ra naha, tan yacan tsihi ra naha?

³ Ñavin. Tyin tatun nyoocho tan ña nasama ndo cuhva iyó ndo, tacan cua cunaa ndo.

⁴ Tan tsa tsahun uñi taahan ra tsihi can naha ra tsa canacava torre Siloé ican tsata ra naha, ¿a cuaha ca cuatyí ra naha tan ñavin ca inga ra tsa tsicoo ñuu Jerusalén, cuñí maa ndo?

⁵ Ñavin. Tyin tatun nyoocho tan ña nasama ndo cuhva iyó ndo, cua cunaa ndo.

Nu tsaha cuenda ra Jesús iin cuhva nácaa ndatú Nyoo tsa nasama yo cuhva iyó yo

⁶ Tacan tan tsaha cuenda ra Jesús iin cuhva ihya. Tan catyí ra:

—Iin ra iyó yutun tsa nañi higuera tsi ra. Tan nyaa tun nu ñuhu ra. Tan tsahan ra tsinyehé ra tatun iñi tsiti tun. Tan nyehe ra tyin nduve.

⁷ Tan catyí ra tsihin ra jahá cuenda tsi tun: “Tsa uñi cuiya tsa tyito ñi quitsi nyehe yu tatun iyó tsiti tun. Tan nduve maa tsiti tun iñi. Cahnya tsi tun. Tyin nyaá cuatu ñi maa tun nu ñuhu ihya. Tyin nduve tsiti tsahá tun”, catyí ra.

⁸ Maa tyin ra tsa jahá cuenda ñuhu ican catyí ra: “Taa, ña cua cahnya naha yo tsi tun vityin. Na cunyaá nuu maa tun inga cuiya ihya. Cua janduvita yu ñuhu tsaha tun tan cua tyihi yu ñuhu tyaahyú.

⁹ Vasiqui tacan tan cua cuhva tun tsiti. Maa tyin tatun ña cuhva tun tsiti, tacan tan cahnya yo tsi tun”, catyí ra tsa jahá cuenda ñuhu can —catyí ra Jesús.

Quiivi quitatú nyivi janduvaha ra Jesús tsi iin ñaha tihí tsata

10 Iin qui^vi tsa quitatú ny^vi, jacuahá ra Jesús tsi ny^vi tsitsi vehe ñuhu.

11 Tan ican nyaá iin ñaha tsa yihí tatyí ña vaha. Tan tsa tsahun uñi cuiya cuuhví ña tsa tihí tsata ña. Tan ña cuví ndundoo ña.

12 Tacan tan nyehe ra Jesús tsi ña. Tan cana ra tsi ña. Tan quitsaha caahán ra tsihin ña, tan catyí ra:

—Tsa nduvaha un. Nduve ca cuehe ndohó un —catyí ra tsihin ña.

13 Tacan tan tyisó ra ndaha ra jiñi ña. Tan iin yaha ñi tan ndundoo ña. Tacan tan quitsaha jacahnú ña tsi Nyoo.

14 Maa tyin ra cuví ityi nuu vehe ñuhu, cuxaan xaan ra tsi ra. Tyin qui^vi quitatú janduvaha ra tsi ña. Tan catyí ra tsihin ny^vi nyecú ican:

—Iyó iñu taahan qui^vi taahán tsi jaha tyiñu yo. Tacan qui^vi quitsi ndo cuví ndo numeri. Tan ña quitsi ndo qui^vi quitatú yo —catyí ra.

15 Tacan tan Jutu Mañi yo Jesús catyí ra tsihin ra:

—Nyooho tsa jahá ndo tyin vaha ndo. ¿A ña ndatsí tucu nyooho qui^ti jana ndo tan jacohó ndo ndutya tsi ti qui^vi quitatú yo?

16 Tan tacan tucu ñaha ihya, tata ra Abraham cuví tsi ña. Tan tsa tsahun uñi cuiya tsa nuuhñi ña tsihin cuehe ihya jahá nu ña vaha. Tan yoñi ndatsi tsi ña. ¿A ña taahán tsi ndatsi yo tsi ña vasu ndi maa qui^vi quitatú yo cuví vityin? —catyí ra Jesús.

17 Tacan tan cuhva tsa cahan ra Jesús yacan, tandihí maa nu xaan iñi tsi ra nducahan nuu nahnu. Maa tyin tandihí ca maa ny^vi si^h xaan cuñi ñi tsihin tsa cahnu tsa iyo javaha ra Jesús.

*Nu cah̄an ra Jesús tyin tumaa iin tsit̄i mostaza
cuví tsa ndacá ñaha Nyoo tsi yo*

¹⁸ Tacan tan catyí ra Jesús:

—¿Náa cuví tsa ndacá ñaha Nyoo tsi yo? ¿Tan náa
tsihin jandu inducu yo itsi?

¹⁹ Tumaa iin tsit̄i mostaza, tacan cuví tsi. Tyin
iin ra tatsi ra iin tsit̄i ican nu ñuhu ra, tan cana
iin yutun luhlu, tan tsahn̄u tun. Tan cuví tun iin
yutun cahnu xaan. Tacan tan tsāa saa naha ti nuu
yutun ican. Tan javahā ti taca ti nuu tun.

*Nu cah̄an ra Jesús tyin tumaa yutsan iya, tacan
cuví tsa ndacá ñaha Nyoo tsi yo*

(Mt. 13.33)

²⁰ Tacan tan catyí ra Jesús inga tsaha:

—¿Náa ca tsihin jandu inducu yu nácaa ndacá
ñaha Nyoo tsi yo?

²¹ Cuví tsi tumaa yutsan iya tsa nasacá nuu iin
ñaha tsihin uñi jahma yutyi paan. Tyin tumaa
ndaá tan̄i yutsan paan ican jahá yutsan iya ican,
tacan cuví tsa ndacá ñaha Nyoo tsi yo —catyí ra.

*Yuvehe t̄ih̄in tan ityi cuiñi tsa cuahán nu nyaá
Nyoo*

(Mt. 7.13-14, 21-23)

²² Ityi cuahán ra Jesús ñuu Jerusalén caahán ra
tuhun Nyoo tsihin nyiv̄i tandih̄i ñi ñuu nu yahá ra.

²³ Tan iin ra tsicá tuhun ra tsi ra:

—Jutu Mañi yu, ¿a cuaha maa nyiv̄i cua cacu?
—catyí ra.

Tacan tan nacah̄an ra Jesús, tan catyí ra:

²⁴ —N̄anducu ndo cuhva quih̄vi ndo yuvehe
t̄ih̄in. Tyin tacan cuví quih̄vi ndo nu ndacá ñaha

Nyoo. Tyin cuaha xaan ndo cuñí ndo quihv̄i ndo ndacan, tan ña cuvi.

²⁵ Tyin tumaa tsitoho iin vehe, tacan cuví Nyoo. Tan tsitoho vehe ican cua nacasi ra yuvehe. Tacan tan nyooho tsa nyecú ndo ityi tsata cua jandatsan ndo yuvehe, tan cua catyi ndo: “Nuña yuvehe.” Tan ra ican cua catyi ra tsihin ndo: “Ña tsitó yu ndáa ityi quee nyooho.”

²⁶ Tacan tan nyooho cua catyi ndo: “Nyuhu tsatsi ndi tan tsihi ndi tsihin un. Maa un jacuaha un tuhun Nyoo tsi ndi ityi nu nyecú vehe ndi”, cua catyi ndo tsihin ra.

²⁷ Maa tyin ra ican cua nacahan ra tsihin ndo tan cua catyi ra: “Tsa catyi yu tsihin ndo tyin ña tsitó yu ndáa ityi quee ndo. Catsiyo nyaha ndo nu nyaá yu tandihi nyooho nyivi javahá tsa ña vaha”

²⁸ Tacan tan cua vacu ndo tan catsan ña cua cuvi nuhu ndo tsa cua nyehe ndo tsi ra Abraham tsihin ra Isaac tan ra Jacob, tan tsihin tandihi ra cuvi ndusu yuhu Nyoo tsa tsicoo tahan tsanaha. Tyin nyecú ra naha nu ndacá ñaha Nyoo. Tan nyooho ndoo ndo ityi tsata.

²⁹ Tan cua quitsi nyivi ityi ndutya ñuhu, tan ityi norte, tan ityi nu caná ñicanyii, tan ityi nu tyisó ñicanyii. Tan cua cunyecú ñi catsi ñi tsihin Nyoo nu ndacá ñaha ra.

³⁰ Tan juhva nyivi tsa cuahán ityi nuu vityin, ñi can cuhun nu ndihi. Tan juhva nyivi tsa cuahán nu ndihi ña, ñi can cua cuhun ityi nuu —catyi ra.

*Nu cuihya xaan cuñí ra Jesús nyehé ra tsi nyivi
ñuu Jerusalén
(Mt. 23.37-39)*

³¹ Juvín ñi maa quiví can tsaa juhva ra fariseo. Tan catyí ra naha tsihin ra Jesús:

—Quita ihya tyin ra Herodes cuñí ra cahñi ra tsi un —catyí ra naha.

³² Tan catyí ra Jesús tsihin ra naha:

—Cuaahan ndo tan cahan ndo tsihin ra tsa cuví tumaa ñicuii, tyin nda cuanda quita quiví tsa ndihí tyiñu jahá yu tsa tavá yu tatyí ña vaha tsi nyiví tan tsa janduvahá yu tsi nyiví cuuhví tsihin cuehe, tacan tan cundihí tyiñu jahá yu.

³³ Maa tyin nda cuanda tahan tsi tsa ndihí maa tyiñu jahá yu, tacan tan cahun maa yu cua cúu yu nda ñuu Jerusalén. Tyin ña cuví cúu iin ra cuví ndusu yuhu Nyoo ityi tsata ñuu Jerusalén.

³⁴ ¡Ndahvi nyooho nyiví Jerusalén! tyin tsahñi ndo tsi ra cuví ndusu yuhu Nyoo. Tan cañi ndo yuu tsi tandihí ra tsa jaquitsi Nyoo nu yucú ndo. Tan yuhu cuaha xaan tsaha cuñí yu jaha cuenda yu tsi ndo, tumaa jahá cuenda iin ndiví sihi sehe ti, tan naquihín vaha ti tsi ti naha ti tsitsi nditsin ti. Maa tyin maa ndo ña cuñí ndo.

³⁵ Nyehe ndo vityin tyin tsa nacoó yu tsi ndo. Tan catyí yu tsihin ndo tyin ña cua nyehe ca ndo tsi yu nda cuanda quita quiví tsa cua catyi ndo tyin cahnu xaan ra vatsí tsihin siví Nyoo Jutu yo —catyí ra Jesús.

14

Nu janduvahá ra Jesús tsi iin ra cuuhví tsa iyó cuiñu quiví quitatú nyiví

¹ Cuví tsi iin quiví quitatú nyiví. Tan ra Jesús cuahán ra cua catsi ra vehe iin ra cuví ityi nuu

tsihin ra fariseo naha ra. Tan juhva ca ra fariseo ican ndatú ra naha nyehé ra naha náa cuatyí cuví tyaa ra naha tsi ra Jesús.

² Tacan tan yatyin ñi nuu ra Jesús nyaá iin ra cuuhví tsa iyó cuiñu.

³ Tan catyí ra Jesús tsihin ra maestro cuenda ley vehe ñuhu naha ra tan tsihin ra fariseo naha ra:

—¿A vaha janduvaha yo nyivi cuuhví quivi quitatú yo? ¿Náa catyí ley Nyoo? —catyí ra.

⁴ Tacan tan tandihi ra naha, taxin ña tsinyecu ra naha. Tacan tan tyiso ndaha ra Jesús jiñi ra cuuhví can. Tan janduvaha ra tsi ra. Tan catyí ra tsihin ra na cunuhu ra.

⁵ Tacan tan catyí ra Jesús tsihin ra fariseo naha ra:

—Tatun nyooho tan canacava iin burru jana ndo, a inga quití jana ndo, tsitsi xahva, ¿a ña cua tava ndo tsi ti tsa numi ñi, vasu ndi maa quivi quitatú yo cuví? —catyí ra.

⁶ Tacan tan taxin ña tsinyecu ra fariseo naha ra. Tyin ña ñihí ca ra naha náa nacahan ra naha.

Nu jacuaha ra Jesús tsi yo tyin ña vaha tsa cahnu jaha yo tsi yo

⁷ Nyehe ra Jesús tyin tandihi ra nyecu vico ican nacatsi ra naha tyayu vaha ca cunyecu ra naha. Tacan tan tsaḥa cuenda ra tyehen tsi ra naha:

⁸ —Ndáa quivi cahun ndo vico tindaha, ña nanducu ndo tyayu vaha ca cunyecu ndo. Tyin coto quitsi inga ra tsa cahnu ca cuvi tan ñavin ca maa ndo,

⁹ tan coto quitsi ra tsa cana tsi ndo tan catyí ra tsihin ndo: “Cuhva tyayu can tyin cunyaa ra ihya.” Tacan tan nyooho tsihin tsa cahan nuu ndo, tan

cua cuhva ndo tyayu can. Tacan tan cua cunyecu ndo nu ndihi ña.

¹⁰ Maa tyin catyí yu tsihin ndo, tyin ndáa quivi cana ra tsi ndo, cuaahan ndo, tan ñavin nu vaha cunyecu ndo. Tyin tacan tan cua quitsi maa ra tsa cana tsi ndo tan cua cahan ra tsihin ndo: “Amigos, ñaha ndo, cunyecu ndo nu tyayu vaha ihya.” Tan tacan cua jachanu ca ra tsi ndo nu nyivi nyecú yuhu mesa tsihin ndo.

¹¹ Tyin ra tsa cahnu jahá tsi maa ra, cua tahan ra ticanuu. Tan ra tsa ndaahvi jahá tsi ra, cahnu ca cua cuvi ra —catyí ra Jesús.

¹² Tacan tan catyí tucu ra tsihin ra cana tsi ra nu iyó vico can:

—Ndáa quivi coo vico vehe un, ña cua cana un tsi ra vaha iñi tsi un, ndi tsi ra yañi un, ndi tsi ra cuvi nyivi un, ndi tsi nyivi nyecú yuvehe un, ñi cuca. Tyin ñi ican cuvi cana tucu ñi tsi maa un, na coo tucu vico vehe maa ñi. Tacan tan nacahnya ñi cuenda tsa tsahan ñi vico vehe un.

¹³ Maa tyin catyí yu tsihin un tyin ndáa quivi coo vico vehe un, cana tsi nyivi ndaahvi, nyivi cuuhví, nyivi coxo, tan tsihin nyivi cuaa.

¹⁴ Tacan tan sii cua cuñi un, tyin ñi ican ña cua cuvi natyahvi ñi tsi un. Maa tyin cua natyahvi Nyoo tsi un quivi cua nandoto un tsihin nyivi vaha.

Nu tsaha cuenda ra Jesús iin cuhva nácaa caná ra tsi yo na quihvi yo nu ndacá ñaha Nyoo

(Mt. 22.1-10)

¹⁵ Tan tsiñi iin ra tsa nyaá yuhu mesa ican tsa caahán ra Jesús. Tan catyí ra tsihin ra:

—Sii xaan cua cuñi nyivi tsa cua catsi nu ndacá ñaha Nyoo —catyí ra.

16 Tacan tan catyí ra Jesús tsihin ra:

—Iin ra ican jacoq ra iin vico cahnu xaan vehe ra. Tan cana ra cuaha xaan nyivi.

17 Tacan tan tsaq cuhva tsa cua cuxiñi ñi, tan jacuhún ra tsi musu ra na cuquihin ra tsi ñi, tyin tsa tahañ tsi cuhva cuxiñi ñi.

18 Maa tyin tandihí ñi ican quitsaha caahán ñi tyin ña cua cuhun ñi. Tan iin ra ican catyí ra: “Ndi jata yu iin ñuhu. Tan cuñí tsi cuhun yu cunyehe yu itsi. Yacan tsicán yu na jaha ra tucahnu iñi tsi yu tyin ña cua cuhun yu.”

19 Tacan tan inga ra ican catyí ra: “Ndi jata ñi yu uhun taahan yunta. Tan cuhun yu cunyehe yu tatun vaha ti naha ti. Yacan tsicán yu tumañi iñi tsi ra na jaha ra tucahnu iñi tsi yu, tyin ña cua cuvi cuhun yu.”

20 Tacan tan inga tucu ra ican catyí ra: “Ndi tindaha cuii ñi yu, tan ña cua cuvi cuhun yu”, catyí ra.

21 Tacan tan musu ra ican cuanuhu ra. Tan catyí tuhun ra tandihí tsa cuvi ican tsihin ra tsitoho ra. Tsa tsiñi tsitoho ra tsa tacan, tan cuxaan xaan ra. Tan catyí ra tsihin musu ra: “Cuaahan vityin tandihí maa ityi. Tan quitsi ndaca un tsi nyivi ndaahvi, nyivi cuuhví, nyivi coxo, tan tsihin nyivi cuaa”, catyí ra.

22 Tan tsa yaha tsaq nyico musu ican tan catyí ra tsihin ra tsitoho ra: “Tsa javaha yu tandihí maa tsa cahan un tsihin yu. Tan nuña ca tsitsi vehe”, catyí ra.

23 Tacan tan tsitoho ra catyí ra tsihin ra: “Cuaahan cua nducu ca nyivi tandihí maa ityi. Tan jañiñi un tsi ñi na quitsi ñi, tyin na cutu tsitsi vehe yu.

²⁴ Tyin catyí yu tsihin un tyin ndi intuhun ñi tsa cana yu tsa jihna, ña cua catsi ñi tsihin yu”, catyí ra —catyí ra Jesús.

Cuaha xaan tundoho nyehé yo tatun cuenda ra Jesús yihí yo
(Mt. 10.37-38)

²⁵ Cuaha xaan nyivi nyicún tsi ra Jesús. Tacan tan nanyehe ra tsi ñi, tan catyí ra tsihin ñi:

²⁶ —Tandihí nyooho tsa nyicún tsi yu, tatun cuñi ca ndo tsi nyivi ndo tan ñavin ca tsi yuhu, ñavin cuenda yu yihí ndo. Tan tatun cuñi ca ndo tsi maa ndo tsa nuu yuhu, ñavin cuenda yu yihí ndo.

²⁷ Tyin nyooho tsa ña cuñi nyehe tundoho tsa cunyicun ndo tsi yu, ña taahán tsi cuvi ndo nyivi cuenda yu, tyin tsa nyehé ndo tundoho, yacan cuví cruu tsa taahán tsi cuiso ndo.

²⁸ Tyin tun cua javaha ndo iin vehe, nacañi nuu jihna ndo jiñi ndo tan tyihi tuñi iñi ndo tun quita vehe cahnu can tsihin xuhun tsa nyii tsi ndo.

²⁹ Tyin tatun quitsaha jandaá ndo vehe ican, tan ña cuvi jandihí ndo tyin nduve ca xuhun ndo, cua vacu nducu nyivi tsi ndo.

³⁰ Tan cua catyi ñi: “Ra ican quitsaha javahá ra vehe ra, tan ndi ña cuví jandihí ra can”, cua catyi ñi.

³¹ A tatun iin rey tan cuñi ra cañi tahan ra tsihin inga rey ¿a ña cunyaa jihna ra tan nyehe ra tatun ñihi tsa utsi mil ñi andaru tsa cuahán tsihin ra cua cañi tahan ra naha tsihin inga rey tsa vatsí tsihin oco mil andaru ican?

³² Tan tatun tsitó ra tyin ña cua cuvi jaha canaa ra tsi inga rey ican, tacan tan cañi ca vatsí inga rey

ican, tan cua jacuhun ra tsi musu ra tyin na catyi tuhun ra naha tsihin inga rey ican na jandihí taxin ra itsi.

³³ Tan tacan cuví nyooho. Tatun ña cahnya iñi ndo tandihí maa tsa cuñí ndo tan tandihí tsa cumí ndo, ña cua cuví cunyicun ndo tsi yu.

Nu jacuahá ra Jesús tyin tumaa ñi tsa ndihí tsa uhva, tacan cuví yo tatun ndu uvi iñi yo tsa tsinú iñi yo tsi ra

(Mt. 5.13; Mr. 9.50)

³⁴ Vaha ñi tyin jacu uhv́a tsi tsa catsi yo. Maa tyin tatun ndihí tsa uhva tsi, ña vaha ca tsi.

³⁵ Nduve ca tyiñu cuví javaha tsi. Ndi ña cuví jatyinyee tsi tsi ñuhu. Tan javitá yo itsi tyin ña vaha ca tsi. Nyooho tsa iyó soho, tyáa soho ndo tuhun caahán yu —catyi ra Jesús.

15

Nu jacuahá ra Jesús tyin tumaa mbee tsa cuanaá tacan cuví yo

(Mt. 18.10-14)

¹ Tandihí ra tavá xuhun cuenda ra ndacá ñaha nda ñu Roma, tan ra iyó cuatyí naha ra, natuhv́a ra naha nu nyíí ra Jesús, tan tyaá soho ra naha tsa caahán ra.

² Tacan tan ra fariseo naha ra tsihin ra maestro cuenda ley vehe ñuhu naha ra quitsahá caahán nyaa ra naha tsi ra Jesús, tan catyi ra naha:

—Ra ihya, caahán ra tsihin ra iyó cuatyí naha ra. Tan tsatsí ra tsihin ra naha —catyi ra naha.

³ Tacan tan ra Jesús tsahá cuenda ra cuhva ihya, tan catyi ra:

4 —Nyooho tsa iyó iin cientu mbee jana, tun cunaa intuhun ti, ¿a ña cua nacoo ndo tsi tandihi ca ti, tan cunanducu ndo tsi mbee tsa cunaa can nda cuanda tsa nañihi ndo tsi ti?

5 Tan tsa yaha nañihi ndo tsi ti, tyiso soco ndo tsi ti. Tan sii xaan cua cuñi ndo.

6 Tan tsa tsaa nyico ndo vehe ndo, tan ndu iin ndo tsihin ra vaha iñi tsi ndo tan tsihin nyivi iyó yatyin yuvehe ndo, tacan tan catyí ndo tsihin ñi tyin na cusii ndihi iñi ñi tsihin ndo tyin nañihí ndo mbee jana ndo tsa tsinaa.

7 Tan catyí yu tsihin ndo, tyin tacan tucu sii xaan ca cuñí ángel Nyoo tsa iyó gloria tsacatyí intuhun ra tsa iyó cuatyí tan nasamá ra cuhva iyó ra, tan ñavin ca tsa cumi xico tsahun cumi taahan nyivi tsa nduve cuatyí tan ña cuñí ca tsi tsa nasama ñi cuhva iyó ñi.

Ñaha tsa tsinaa xuhun tan nañihí ña

8 Tan catyí yu tsihin ndo, tyin tatun iin ñaha tan iyó utsi taahan xuhun ña, tan cuanaá iin xuhun ña, cua tyaa ña iin candili. Tan cua tihvi ña tani tsitsi vehe ña. Tan cua nanducu ña xuhun can nda cuanda tsa nañihi ña can.

9 Tan tsa yaha nañihi ña, cua cuhun ña cunanducu ña tsi ñi vaha iñi tsi ña, tsihin nyivi tsa iyó yatyin yuvehe ña, tan cua cahan ña tsihin ñi: “Cusii ndihi iñi ndo tsihin yu tyin tsa nañihí yu xuhun yu tsa tsinaa”, cua catyí ña.

10 Tan catyí yu tsihin ndo tyin tacan tucu sii cuñí ángel Nyoo tsacatyí intuhun ra iyó cuatyí tan ndu uvi iñi ra cuatyí ra —catyí ra Jesús.

Nu jacuahā ra Jesús nácaa cuñí Nyoo tsi iin ra ndu uvi iñi cuatyí

¹¹ Tacan tan tsahá cuenda ra Jesús inga cuhva ihya tan catyí ra:

—Iin ra, iyó uvi taahan sehe ra.

¹² Tan ra tsa luhlu ca caahán ra tsihin jutu ra tyin na nacuhva ra tsa taahán tsi tsi ra. Tacan tan jutu ra natahvı sava ra tsa tsii ra tan tsahā ra tsi nduvi taahan sehe ra.

¹³ Tan ña cuaha ñi quıvı tan ra luhlu ican xico ra tandıhi maa tsa tsahā jutu ra tsi ra. Tan jandu iin ra xuhun ra, tan quihın ra ityi, cuahán ra iin ñuu cañi xaan. Tan ndacan tsicoo ra tan janaa ra tandıhi maa xuhun ra tsihin tusı iñi. Tan quiñi xaan icá ra tsicá nuu ra.

¹⁴ Tacan tan tsaā tama ityi nu iyó ra. Tan quit-sahā tsisocó ra tyin tandıhi xuhun ra janaa ra.

¹⁵ Tacan tan tsahan ra tsinducu ra tyiñu jaha ra tsihin iin ra ñuu ican. Tan ra can jacuhun ra tsi ra iin nu iyó quini jana ra, tyin jaha cuenda ra tsi ti naha ti.

¹⁶ Tan cuvı tsi iin tsaha tsisocó xaan ra can. Tan nduve maa tsa catsi ra iyó, ndacua cuñí ra catsi ra tsa tsatsı quini ican naha ti. Tan yoñi maa tsahā tsa catsi ra.

¹⁷ Tacan tan nducuhun iñi ra tsi jutu ra. Tan nacañi jiñi ra: “¿Náa tsa cuaha ra naha jahá tyiñu tsihin jutu yo? Tan nduve tsa cumañi tsi ra naha. Tan yoo vityin cuñí cúu yo jahá soco.

¹⁸ Vityin cua cunuhu yo nu nyaá jutu yo. Tan cua catyi yo tsihin ra tyin tsicoo cuatyí yo nuu Nyoo tan tacan tucu nuu maa ra.

¹⁹ Tan ña taahán ca tsi tsi yo tsa cuvı yo sehe ra, tan na jaha ra tyin iin musu ña ra cuvı tsi yo” cuñí

ra tsicá iñi ra.

²⁰ Tacan tan quih̄in ra ityi cuanuh̄u ra nda vehe jutu ra. Tan cañi ca vatsí ra tan nyehē jutu ra tsi ra, tan cundaahvi iñi ra nyehé ra tsi sehe ra. Tan tsin̄u xaan ra tsijatahan̄ ra tsi ra. Tan tsinum̄i nyaa ra tsi ra.

²¹ Tacan tan catyí ra tsihin jutu ra: “Tyatya, tsicoō cuatyi yu nuu Nyoo tan tsicoō cuatyi yu nuu tucu maa un. Tan yacan ña taahán ca tsi tsi yu tsa cuví yu sehe un”, catyí ra tsihin jutu ra.

²² Maa tyin jutu ra tavā tyiñu ra, tan catyí ra tsihin musu ra: “Tavā ndo jahma vaha tan jacunditsi ndo tsi ra ihya. Tan tyih̄i ndo iin xehe nundaha ra. Tan tyih̄i ndih̄i ndo zapatu tsaha ra.

²³ Tan cah̄ñi ndo iin becerru tsa xaahan vaha ca, tyin catsi yo tsi ti. Tyin vityin cua coo yo vico.

²⁴ Tyin ra sehe yu ihya tsa tsih̄i ra cuñi maa yu, tsicá iñi yu. Cuñi maa yu tyin ña cua nyehe ca yu tsi ra, tan tsā nyico ra”, catyí jutu ra can. Tacan tan quitsahā tsicoō ñi vico. Tan s̄i xaan cuñi ñi tyin tsā nuhu nyico ra.

²⁵ Tacan tan inga sehe ra, ra tsa tsitsa, nyií ra tsicuhu. Tan tsa cua tsā nuhu ra nda yuvehe ra, tan tsiñī ra tyin iyó yaa. Tan tuv̄i iñi ra tyin tsañī ñi yaa.

²⁶ Tacan tan tsa cuyatyin ra nda yuvehe ra tan canā ra tsi iin musu ra. Tan tsicá tuhun ra tsi ra can náa cuví xaan can.

²⁷ Tacan tan musu can catyí ra: “Ra yañi un tsā nuhu ra. Tan yacan tavā jutu un tyiñu tyin na cah̄ñi ra naha iin becerru xaahan. Tyin vaha tsā ra yañi un, tan nduve náa tahān ra”, catyí musu can tsihin ra.

²⁸ Tacan tan nduxaan xaan cuñí ra can. Tan ña cuñí ra quihvi ra tsitsi vehe. Tan jutu ra tsahan ra tsicahan ndaahvi ra tsihin ra, tyin na quihvi ra tsitsi vehe.

²⁹ Tacan tan nacahan ra can tan catyí ra tsihin jutu ra: “¿Náa tsa cuaha cuiya jahá tyiñu yu tsihin un? Tan tyaá yahvi xaan yu tsa caahán un. Maa tyin ndi intuhun mbee luhlu ñaha ca cuhva un tsi yu tyin coo vico jaha yu tsihin ra vaha iñi tsi yu.

³⁰ Maa tyin vityin tsaá nuhu nu sehe un ihya, nu tsa janaa xuhun tsihin ñaha sii iñi. Tan tsaha un iin becerru quiti xaahan tsi nu”, catyí ra tsihin jutu ra.

³¹ Tacan tan nacahan jutu ra tan catyí ra tsihin ra: “Sehe yu, yooho tsihin maa yu nyaá un tandihi quivi. Tan tandihi tsa cumí yu, tsii un cuví can.

³² Tan vityin taahán tsi tyin javaha yo vico ihya, tan cusii iñi yo. Tyin tsaá nuhu ra yañi un, ra tsa tsihi, cuñi maa yu. Tumaa tsa nandoto nyico ra cuví can, tyin tsinaa ra, tan nañihi yo tsi ra inga tsaha”, catyí ra tsihin sehe ra —catyí ra Jesús.

16

Nu jacuahá ra Jesús tsi yo nácaa javaha yo tumañi iñi tsihin tsa iyó tsi yo

¹ Tacan tan catyí ra Jesús tsihin ra tsicá tsihin ra: —Iyó iin ra, cuca xaan ra. Tan iyó iin ra yihí ndaha tandihi tyiñu jahá ra cuca can. Tan tsahan iin musu ra tsicatyí tuhun ra tsihin ra cuca ican, tyin ra yihí ndaha tyiñu ican, janaá ra tandihi tsa iyó tsi ra.

² Tacan tan cana ra cuca ican tsi ra tan catyí ra tsihin ra: “Tsa cuaha xaan cuatyí javahá un quitsi

nu nyaá yu. Vaha ca nacuhva cuenda un tandihi tyiñu tsa javahá un tsi yu. Tyin ña cua jaha tyiñu ca un tsihin yu”, catyí ra cuca can tsihin ra.

³ Tacan tan ra yihí ndaha tyiñu can tsicá iñi ra: “¿Naca cua javaha yu vityin? Tsiho yu ña cuñi ca ra tsa jaha tyiñu yu tsihin ra. Tan nduve tunyee iñi iyó tsi yu tsa jaha tyiñu yu tsihin ñuhu. Tan cahán xaan nuu yu caya yu tsitsi ñuu.

⁴ Maa tyin tsa tsitó yu nácaa cua javaha yu, tacan tan vaha cua cuñi nyivi tsihin yu quivi tsa nduve ca tyiñu cua jaha yu, tan vaha cua tsaa yu vehe ñi”, tsicá iñi ra can.

⁵ Tacan tan cana ra tsi intuhun intuhun ra tsa nyaá cuenda tsi tsiho ra. Tan catyí ra tsihin iin ra ican: “¿Náa nyaá cuenda un tsi tsiho yu?” catyí ra.

⁶ Tacan tan nacahan ra ican tan catyí ra: “Yuhu nyaá cuenda yu cumi mil litru acetye.” Tacan tan ra yihí ndaha tyiñu ican catyí ra tsihin ra: “Quihin un inga tutu ihya. Tan tyaa un uvi mil ñi. Tan javita un tutu tsaahnu ican”, catyí ra. Tacan ica ra can, tan cuahán ra.

⁷ Tacan tan tsaa inga ra. Tan tsicá tuhun tucu ra tsi ra ican: “¿Náa nyaá cuenda un tsi tsiho yu?” Tan nacahan ra ican: “Nyaá cuenda yu iin mil arroba trigo”, catyí ra. Tacan tan catyí ra yihí ndaha tyiñu ican: “Quihin inga tutu, tan tyaa un una cientu ñi arroba. Tan javita un tutu tsaahnu can”, catyí ra.

⁸ Tacan tan tsito tsiho ra tsa ña vaha tsa javaha ra. Tan iyo xaan cuñi ra cuca can, tyin yatyi xaan ñihj ra cuhva ica ra —catyí ra Jesús.

Tan catyí ra tsihin ra tsicá tsihin ra:

—Nyivi nu ñuhu ñayivi ihya tsa ña tyaá yahvi tsi Nyoo yatyi xaan ca jahá ñi tsi ñi tan ñavin ca nyivi tsa iyó ñuhu nditsin Nyoo ańima.

⁹ Tan catyí yu tsihin ndo, tyin cuatyíñu ndo tsa cuca tsa iyó nu ñuhu ñayivi ihya, tan jatyinyee ndo tsi nyivi. Tan quivi tsa cua ndihi tsa cuca, cua ñihi ndo coo ndo nu ña cua naa maa.

¹⁰ Tatun tsitó ndo cuatyíñu vaha ndo tsa luxu ñi tsa iyó tsi ndo, tacan tucu tatun cuaha coo tsi ndo cua cuatyíñu vaha ndo itsi. Tyin tatun ña tsitó ndo cuatyíñu ndo tsa luxu ñi tsa iyó tsi ndo, tacan ña cua coto tucu ndo cuatyíñu ndo tatun cuaha coo tsi ndo.

¹¹ Tan catyí yu tsihin ndo, tatun ña javahá ndo tsa vaha tsihin tsa iyó tsi ndo nu ñuhu ñayivi ihya, Nyoo ña cua cuhva ra tsa vaha tsa iyó gloria tsi ndo.

¹² Tyin tandihi tsa iyó tsi ndo, maa Nyoo tsaha nuu itsi tsi ndo. Tan tatun ña javahá ndo tumańi ińi tsihin tsi, ña cua cuhva ra tsa cuvi tsii ndo.

¹³ Iin musu ña cuví coo uvi taahan tsitoho ra. Tyin musu ican cua cuńi ca ra tsi iin ra, tan ñavin ca tsi inga ra. Tan vaha ca cua tyaa yahvi ra tsa cahan iin ra, tan inga ra, ña cua tyaa yahvi ra tsa cahan ra can. Ña cua cuvi cuńi ndo tsi Nyoo tatun cuńi tucu ndo tsa cuca —catyí ra Jesús.

¹⁴ Tan tsa tsińi ra fariseo naha ra tandihi tsa cahan ra Jesús, tacan tan quitsaha tsacú nducu ra naha tsi ra. Tyin maa ra fariseo naha ra cuńi xaan ra naha xuhun.

¹⁵ Tacan tan catyí ra Jesús tsihin ra naha:

—Vaha xaan jahá maa ndo tsi ndo nuu nyivi. Maa tyin tsa tsitó Nyoo tyin ña vaha ańima ndo.

Tandihí tsa cahnu cuñí maa nyívi, Nyoo ña cuñí ra nyehe ra yacan.

Ley Nyoo tsa tyaa ra Moisés, tan tsihin tsa ndacá ñaha Nyoo tsi yo

¹⁶ Ley tsa tsahā Nyoo tsi ra Moisés tyin tyaa ra, tan tsihin tuhun tsa tyaa ra cuví ndusu yuhu Nyoo tahān tsanaha, yacan cuví tsa janahā ityi tsi nyívi nda cuanda quívi tsa quítsi ra Juan. Tan ra Juan quítsahā caahán ra tuhun vaha tyin tsa cuñí quítsi Nyoo tyin cua cundaca ñaha ra. Tan tandihí nyívi nducú xaan ñi kuhva tsa quíhvi ñi nu ndacá ñaha ra.

¹⁷ Tan catyí yu tsihin ndo, tyin vasu cunaa andívi tan nu ñuhu ñayívi ihya, maa tyin tsa cuví ley Nyoo tsa tyaa ra Moisés, ña cua cunaa tsi tyin cua cundaa tandihí tsi.

Nu jacuahā ra Jesús tyin ña vaha tsa nacoo ihñi rayí ñasíhi ra

(Mt. 19.1-12; Mr. 10.1-12)

¹⁸ Tatun iin rayí tan iyó ñasíhi ra, tan nacoo ihñi ra tsi ña, tan tindaha ra tsihin inga ñaha, coo cuatyí ra nuu Nyoo. Tan tatun tindaha inga rayí tsihin ñaha tsa nacoo yí, coo tucu cuatyí ra can nuu Nyoo.

Nu jacuahā ra Jesús tsi nyívi cuenda ra cuca tsihin ra Lázaro

¹⁹ Tsicoo iin ra cuca. Tan vaha xaan jahma tsinditsi ra. Tan tandihí quívi iyó vico jahá ra tan tsatsí vaha ra.

²⁰ Tan tsicoo tucu iin ra ndaahvi tsa tsinañi Lázaro. Tan ra ihya cuaha xaan ndíhyi iñí tsi ra. Tan nyaá ra yuvehe ra cuca ican.

21 Ra ndaahvi can, cuñí ra catsi ra, vasu tsa cucoyó xuu mesa ra cuca can. Tan nda cuando ina tan tsaá ti naha ti nu nyaá ra, tan tsacayaá ti nu uhvi ra.

22 Tan iin quiví tsihi ra ndaahvi can. Tan ángel maa Nyoo na quihin tsi ra tan tsindaca ra naha tsi ra nda nu nyaá ra Abraham gloria. Tacan tan tsihi tucu ra cuca can. Tan tsicutsi ñi tsi ra.

23 Tacan tan ra cuca ican nyehé xaan ra tundoho nu nyii ra anyaya. Tan nanyehé ra nu cañi xaan nu nyaá ra Abraham tsihin ra Lázaro.

24 Tacan tan cana tsa ra cuca can tan catyí ra: “Tyatya Abraham, cundaahvi iñi tsi yu. Jaquitsi tsi ra Lázaro tan na jatyii ra luxu nundaha ra. Tan na jatoo ra ndutya nu yaa yu. Tyin nyehé xaan yu tundoho nu cayú ñuhú ihya”, catyí ra.

25 Tan ra Abraham catyí ra tsihin ra: “Nducuhun iñi tyin vaha xaan tsicoo un nu ñuhu ñayivi. Tan ra Lázaro, tuhun ndaahvi tsicoo ra. Tan vityin vaha iyó ra ihya, tan yooho nyehé un tundoho.

26 Tan inga tucu tuhun, tyin mahñu nu yucú yo ihya cunu xaan xahva. Tan ra yucú nyehe ña cuví cuhun ra naha nu nyii un. Tan ndi ra yucú nu nyii un, ña cuví quitsi ra naha nyehe”, catyí ra Abraham tsihin ra cuca can.

27 Tacan tan catyí ra cuca ican: “Tyatya Abraham, jaha tumañi iñi tsi yu. Jacuhun tsi ra Lázaro nda vehe jutu yu.

28 Tyin iyó uhun taahan ca ra yañi yu naha ra. Tan cuñí yu tyin catyí tuhun ra Lázaro tsihin ra naha nácaa nyii yu nyehé yu tundoho ihya, coto quitsi ndihi ra naha ihya”, catyí ra.

29 Tacan tan catyí ra Abraham: “Iyó ley tsa tyaa

ra Moisés. Tan iyó tuhun tsa tyaa ra cuv̄i ndusu yuhu Nyoo taḥan tsanaha. Na tyaa yahvi ra yañi un naha ra, tun cuñi ra naha”, catyí ra Abraham.

³⁰ Tacan tan catyí ra cuca ican: “Tyatya Abraham. Ña cua tyaa yahvi ra naha. Maa tyin tatun yóo tsa nandoto, tan cahun cucahan tsihin ra naha, tacan tan cua tyaa soho ra naha tan cua nasama ra naha cuhva iyó ra naha”, catyí ra cuca ican.

³¹ Tan ra Abraham catyí ra: “Tatun ña cuñi ra naha tyaa yahvi ra naha tuhun tsa tyaa ra Moisés tan tuhun tsa tyaa ra cuv̄i ndusu yuhu Nyoo taḥan tsanaha, vasu ndi maa nandoto iin nyivi tan cahan ñi tsihin ra naha ña cua tsinu iñi ra naha.”

17

Nu jacuahá ra Jesús tsi yo nácaa jaha cuenda yo tsi yo coto javaha yo tsa ña vaha

(Mt. 18.6-7, 21-22; Mr. 9.42)

¹ Tyehen catyí ra Jesús tsihin ra tsicá tsihin ra:

—Tacan ñi iyó tsa quiñi caá tsa jatívi tsi nyivi.

Maa tyin ndahvi ra ndaahvi tsa jatívi tsi nyivi.

² Vaha taxin ca na cunuhñi iin yuu jucun ra, tan jacuhun nyivi tsi ra nu ndutya ñuhu. Coto jatívi ca ra tsi nyivi ndi nasama cuhva iyó.

³ Jaha vaha ndo cuenda tsi ndo. Tatun iin ra cutahán tsihin ndo tan javaha ra tsa ña vaha tsihin ndo, cahan ndo tsihin ra tyin ña vaha tsa javaha ra. Tun nasama ra cuhva iyó ra, jaha ndo tucahnu iñi tsi ra.

⁴ Tan ndi maa javaha ra tsa ña vaha tsihin ndo utsa tsaha tsa iin quiivi, tatun tandihi tsa utsa tsaha tan catyí ra tsihin ndo tyin ndu uvi iñi ra tsa javaha

ra; tandihí tsa utsa taahan tsaha can, jahá ndo tucahnu iñi tsi ra.

Nu jacuahá ra Jesús tsi yo tyin tatun tsinú iñi yo tsi ra, cuví javaha yo cuaha tsa vaha

⁵ Tacan tan catyí ra tava tyiñu ra Jesús tsihin ra: —Cuhva tsa tsinu ca iñi ndi tsi un —catyí ra naha.

⁶ Tan catyí ra Jesús tsihin ra naha: —Tatun tsinú iñi ndo tsi yu vasu tumaa cuhva iin tsiti mostaza tsa luhlu cuii ñi tsi, cua cahan ndo tsihin yutun cahnu tsa nañi sicómoro tsa nyaá ihya: “Na tuhun tsi un, tan cunyaa un nda nu ndutya ñuhu.” Tan cua tyaa yahvi tun tsa cua cahan ndo —catyí ra Jesús.

Nacaa taahán tsi tyaa yahvi yo tsi Nyoo

⁷ Tan catyí ra Jesús:

—Tatun iin nyooho tan iyó iin musu ndo, tan tsaa ra tsa tsahan ra tsicuhu tsijahá tyiñu ra, a tsijahá cuenda ra quití jana ndo, ¿a catyí ndo tsihin ra: “Cunyaa tan catsi un”? Ña tuhvá ndo cahan tacan tsihin ra.

⁸ Maa tyin tyehen tuhvá ndo caahán tsihin ra: “Javaha tsa cuxiñi yu. Tan tyihi un tsa catsi yu. Tsa yaha tsa catsi yu, tacan tan catsi tucu maa un”, tacan tuhvá ndo caahán tsihin ra.

⁹ Ndi ña tuhvá ndo nacuhvá tyahvi nyoo tsi ra tyin javahá ra náa tyiñu tava ndo tsi ra.

¹⁰ Tacan tucu maa ndo tsihin Nyoo. Quivi ndihí javaha ndo tandihí tsa cahan ra tsihin ndo, taahán tsi catyi ndo tsihin ra: “Nyuhu nduve náa ca tyiñu cuaha xaan javahá ndi. Tyiñu tsa tava ñi un tsi ndi, yacan ñi javahá ndi. Tan ña yaha ca javahá ndi.”

Nu janduvahā ra Jesús tsi utsi taahan ra ndohó cuehe tyaahyú

¹¹ Cuahán ra Jesús ityi ñuu Jerusalén tan yahā ra nu cuví xahñu Samaria tsihin Galilea.

¹² Tan nu tsaā ra iin ñuu, quita utsi taahan ra cuuhví tsihin cuehe tyaahyú. Tan tsicuiñi ra naha ndasava.

¹³ Tan canā tsaa ra naha tan catyí ra naha:

—Yooho, Maestro Jesús, cūndaahvi iñi tsi ndi —catyí ra naha.

¹⁴ Tan tsa nyehe ra Jesús tsi ra naha tan catyí ra tsihin ra naha:

—Cūaahan ndo, cujanaha ndo tsi ndo tsi ra jutu tyin tsa nduvahā ndo.

Tacan tan cuahán ra naha. Tan ityi cuahán ra naha tan nduvahā ra naha.

¹⁵ Tacan tan tsa nyehe iin ra ican tyin tsa nduvahā ra, vatsí tsihin tsata nyico ra nu nyí ra Jesús. Tan quitsahā caná tsaa ra, jacahnú ra tsi Nyoo.

¹⁶ Tan tsa tsaā ra nu nyí ra Jesús, tsicuiñi tsi ra, tan nacañi nuu ra jiñi ra nda nu ñuhu nuu ra Jesús. Tan nacuhvā ra tyahvi nyoo tsi ra. Ra tsa nduvahā ihya, ra Samaria cuví ra.

¹⁷ Tacan tan catyí ra Jesús:

—¿A ñavin utsi taahan ndo nduvahā? ¿Náa inga iin taahan ca ra naha?

¹⁸ ¿A intuhun ñi maa ra inga ñuu ihya vatsí, vatsí jacahnú tsi Nyoo? —catyí ra Jesús.

¹⁹ Tacan tan catyí ra tsihin ra tsa nduvahā ican:

—Nduvita, cūaahan. Nduvahā un tyin tsinú iñi un tsi Nyoo —catyí ra Jesús tsihin ra.

Cuhva cua quitsi Nyoo cua cundaca ñaha ra nu iyó yo ihya

(Mt. 24.23-28, 36-41)

²⁰ Tsiçá tuhun ra fariseo naha ra tsi ra Jesús, tan catyí ra naha:

—¿Ama cua quitsi Nyoo cua cundaca ñaha ra?

Tacan tan catyí ra Jesús:

—Ñavin tsa nyehé yo cuví tsa ndacá ñaha Nyoo ihya nu ñuhu ñayivi.

²¹ Ña cua cuvi catyi nyivi: “Juvín ra nyíi ihya, juvín ra nyíi ityi ican.” Tyín Nyoo tsa tsaá ra mahñu ndo, tan ndacá ñaha ra tsi nyivi yihí cuenda ra —catyí ra tsihin ra naha.

²² Yahá yacan tan catyí ra tsihin ra tsicá tsihin ra:

—Cua tsaá quivi tsa cua cuñi ndo nyehe ndo tsi yuhu Rayii quee nda gloria. Maa tyín ña cua nyehe ndo tsi yu.

²³ Yihí ñi cua catyi ñi tsihin ndo: “Ihya nyíi ra.” Inga ñi cua catyi ñi: “Ndacan nyíi ra.” Maa tyín coto cuhun ndo cunyehe ndo. Tan ña cunycun ndo tsi ra can tyín ñavin yu cuvi can.

²⁴ Tyín tandihí nyivi cua nyehe tsi yuhu, Rayii tsa quee nda gloria, quivi cua quitsi nyico yu inga tsaha. Tumaa tsa nyehé tandihí nyivi nu cañi tatsa savi tan quituvi ñuhu tatsa can ñi canduvi andivi, tacan cua cuvi quivi cua quitsi yu inga tsaha.

²⁵ Maa tyín cua nyehe jihna yu tundoho cahnu xaan. Tyín nyivi tsa iyó vityin, ndasi cua cuñi ñi nyehe ñi tsi yu.

²⁶ Tumaa quivi tsa tsicoo ra Noé, tacan cua cuvi quivi cua quitsi nyico yuhu Rayii quee nda gloria.

27 Qui_vi tsicoo ra Noé, tsatsí ny_vi. Tsihí ñi. Tindahá ñi. Tan tsa_ha ñi sehe si_hi ñi tindaha, nda cuanda qui_vi qui_hv_i ra Noé tsitsi yutun ndoo tan cu_un savi xaan. Tan tandi_hi ñi can tsi_hi ñi ja_ha ndutya.

28 Tacan tucu cu_vi qui_vi tsicoo ra Lot. Tsatsí ñi. Tsihí ñi. Jatá ñi. Xicó ñi. Tatsí ñi itu. Tan javahá ñi vehe ñi.

29 Tan qui_vi tsa quita ra Lot ñuu Sodoma ican, cu_un ñu_hu tsihin azufre tsa quee nda andi_vi. Tan tsa_hñi ñuhu can tandi_hi ny_vi Sodoma.

30 Tacan cua cu_vi qui_vi quitsi nyico yu tsa cu_vi yu Rayi quee nda gloria.

31 Tatun nyecú ndo nuquehe qui_vi quitsi yu, ña qui_hv_i ndo tsitsi vehe tan tava ndo ndaha tyiñu ndo. Tan tatun yucú ndo tsitsi cuhu, ña cunuhu ca ndo yuvehe ndo.

32 Nd_ucuhun iñi ndo tsa ta_ha_n ñasi_hi ra Lot.

33 Tandi_hi nyoo_ho tsa cuñi tsa iyó nu ñuhu ñay_vi i_hya, cua cunaa ndo. Tan tandi_hi nyoo_ho tsa ña tyaá yahvi tsa iyó nu ñuhu ñay_vi i_hya, cua cacu ndo.

34 Tan catyí yu tsihin ndo tyin tsacuaa can, uvi taahan ny_vi cua cava iin nu tsito. Iin ñi cua naquihin yu. Tan inga ñi cua ndoo ñi.

35 Tan uvi taahan ñiñaha, iin caa ñi cua nyico ñi qui_vi can. Intuhun ña cua naquihin yu. Tan inga ña cua ndoo ña.

36 Tan catyí yu tsihin ndo tyin uvi taahan ra cua cuyucu tsicuhu. Intuhun ra cua naquihin yu, tan inga ra cua ndoo ra —catyí ra Jesús.

37 Tsa tsiñi ra naha tsa ca_ha_n ra Jesús tacan, tsica tuhun ra naha tsi ra:

—¿Numaa tahan cua cuvi yacan, Jutu Mañi yu?
 —catyí ra naha.
 Tacan tan nacahan ra Jesús, tan catyí ra:
 —Nu canyíi ndiyi, ican cua nataca nditsii.

18

Nu jacuahá ra Jesús tyin tumaa tsa cahán yuhu iin ñaha tsihi y# tsihin juez, tacan taahán tsi ndacan yo tsi Nyoo

¹ Tshá cuenda ra Jesús iin cuhva ihya. Tyin iin nyita ñi cuñí tsi tsa ndacan tahvi ra naha tan ña cundihi iñi ra naha.

² Tan catyí ra:

—Iyó iin ñuu tsa nyaá iin ra cuví juez. Tan juez ican ña tyaá yahvi maa ra tsi Nyoo. Tan ndi nyivi tan ña tyaá yahvi ra.

³ Tan juvin ñuu ican iyó iin ñaha ndaahvi tsa tsihi y#. Tan tsaahán ña tsicahán ña tsihin ra can, tyin tsicán ña cuatyí tsaha iin nu xaan iñi tsi ña.

⁴ Tan juez ican ña tyaá yahvi nu tsa caahán ña. Ña jandaá maa nu tyiñu tsicán ña. Tan tsanaha xaan tsicán ña. Tacan tan quitsahá tsicá iñi nu juez can: “Vasu ndi maa ña tsinú iñi yu tsi Nyoo, tan nduve náa cuenda yu tsi nyivi,

⁵ maa tyin ñaha ihya tshá xaan ña tsihi tsi yu. Tan yacan cuenda vaha ca cua jacacu yu tsi ña. Tyin coto ña jaña ña tsa vatsí ña, tan cuhva ca ña tsihi tsi yu”, cuñí ra tsicá iñi ra.

⁶ Tacan tan catyí Jutu Mañi yo, ra Jesús:

—Tacan catyí ra juez caquiñi can. Ra juez can ra caquiñi xaan cuví ra maa tyin jatyinyee ra tsi ñaha ndaahvi ican.

7 Tan vihi ca cuví Nyoo tsihin yo, ¿a ña cua jatyinyee ra tsi nyívi tsa nacatsi ra tsa tsicán ñi tsi ra nduvi tan ñiñu? ¿A cuatu xaan ca ra tan jatyinyee ra tsi ñi?

8 Catyí yu tsihin ndo, tyin numi ca cua jatyinyee ra tsi ñi. Maa tyin quívi tsa cua quitsi nyico yu tsa cuví yu Rayi tsa quee nda gloria, tsitó Nyoo tun nañihi ca yu tsi nyívi tsa tsinú tsa cuii ñi tsi yu —catyí ra Jesús.

In cuhva cuenda ra tavá xuhun cuenda ra ndacá ñaha nda ñuu Roma tan cuenda ra fariseo naha ra

9 Tacan tan tsahá cuenda ra Jesús iin cuhva cuenda ra tsa vaha xaan jahá tsi maa ra naha, tan ndasi cuñi ra naha nyehé ra tsi inga nyívi. Tan catyí ra:

10 —Iyó uvi taahan ra cuahán vehe ñuhu cua ndacan tahvi ra naha tsi Nyoo. Iin ra ican ra fariseo cuví ra. Tan inga ra can ra tavá xuhun cuenda ra ndacá ñaha nda ñuu Roma cuví ra.

11 Tan ra fariseo ican nduvitá nyityi ra, tan quitsahá caahán ra tsihin Nyoo. Tan catyí ra: “Jutu Mañi yu, nacuhvá yu tyahvi nyoo tsi un tyin yuhu ñavin tumaa inga nyívi cuví yu. Tyin iyó ñi suhú ñi. Quiñi icá ñi. Tan yihí ra naha iyó ñasihi ra tan iyó inga ñaha ra naha. Tan ña cuví yu tumaa ra tavá xuhun ihya.

12 Tyin yuhu uvi tsaha tsicoó nyitya yu tsa iin vitya. Tan tsahá yu utsi taahan xuhun tsa iin iin cientu tsa jahá canaa yu tsi un”, catyí ra can.

13 Tan ra tsa tavá xuhun can tsa cañi luxu nyaá ra. Tan ña caná ñi ra nanyehe ndaa ra. Tan cañi ndaha ra yiqui nyica ra tyin ndu uví ñi ra cuatyí

ra. Tan catyí ra: “Jutu Mañi yu, cundaahvi iñi tsi yu tyin cuaha xaan cuatyí yu iyó”, catyí ra —catyí ra Jesús.

¹⁴ Tan catyí nyico ra Jesús tyehen:

—Catyí yu tsihin ndo tyin Nyoo jahá ra tucahnu iñi tsi ra tavá xuhun ican. Janaa Nyoo cuatyí ra tan cuanuhú ra nda yuvehe ra. Maa tyin ra fariseo ican, nduve tucahnu iñi tsicoo tsi ra, tyin nyívi tsa cahnu xaan jahá ñi tsi ñi, ña cahnu cuví ñi jahá Nyoo, tan nyívi tsa ndaahvi jahá tsi, cua jacahnu Nyoo tsi ñi —catyí ra Jesús.

*Nu nasocó ra Jesús tsi tsa nyihi
(Mt. 19.13-15; Mr. 10.13-16)*

¹⁵ Tacan tan quitsi ndaca nyívi tsa nyihi tsi ra Jesús tyin tyiso ndaha ra jiñi tsi naha tsi. Maa tyin cuhva tsa nanyehé ra tsicá tsihin ra tyin cuaha tsa nyihi tsaá nu nyaá ra, cuxaan ra naha tan ña tsaḥa ra naha cahun tsa nyihi can.

¹⁶ Tacan tan cana ra Jesús tsi ra naha, tan catyí ra tsihin ra naha:

—Jaña ndo na quitsi maa tsi naha tsi nu nyaá yu. Tan ña casi ndo. Tyin nyívi tsa ndacá ñaha Nyoo, cuví ñi tumaa tsa nyihi ihya.

¹⁷ Tan catyí yu tsihin ndo tyin tatun ña nyitá iñi ndo tsi Nyoo, tumaa nyitá iñi iin tsa luhlu ihya tsi jutu tsi, ña cua cuvi quihvi ndo nu ndacá ñaha Nyoo.

*Nu tsaḥa ra Jesús cuhva tyin yñ xaan nacuhva
cuenda iin ra cuca tsi ra tsi Nyoo
(Mt. 19.16-30; Mr. 10.17-31)*

¹⁸ Tacan tan iin ra tsa cuví ityi nuu cuenda vehe ñuhu tsicá tuhun ra tsi ra Jesús, tan catyí ra:

—Maestro, ra vaha cuví un. ¿Nacaa cua javaha yu tan coo yu ñayivi tsa ña cua naa maa? —catyí ra.

19 Tacan tan catyí ra Jesús tsihin ra:

—¿Nacuenda catyí un tyin ra vaha cuví yu? Tan intuhun ñi maa Nyoo cuví ra vaha.

20 Yooho tsitó un tandihi tuhun tsa tsaha Nyoo tyin javaha yo: “Tsa ña coo inga ñaha tsi un. Ña cahñi un nyivi. Ña suhu un. Ña cahan un cuendu siqui nyivi. Tan tyaa yahvi un tsi jutu un tan sihi un” —catyí ra Jesús.

21 Tacan tan ra ican catyí ra:

—Tandihi maa yacan tan tyaá yahvi yu nda taħan luhlu yu tan nda cuanda vityin —catyí ra.

22 Tsa tsiñi ra Jesús tsa caħan ra can, tacan tan catyí ra tsihin ra:

—Maa tyin cumañi javaha un inga tsa taahán tsi javaha yo. Xico tandihi tsa iyó tsi un. Tan cuhva un xuhun can tsi nyivi ndaahvi. Tan quitsi nyicun un tsi yu. Tacan tan coo tsa cuca tsi un nda gloria —catyí ra.

23 Maa tyin tsa tsiñi ra tsa caħan ra Jesús, nducuihya xaan cuñi ra, tyin cuca xaan ra.

24 Tan tsa nyehe ra Jesús tyin nducuihya cuñi ra, tan catyí ra:

—Yii xaan tan cuví nacuhva cuenda nyivi cuca tsi ñi na cundaca ñaha Nyoo tsi ñi.

25 Yatyí xaan ca cuvi yaha iin camellu xuu iin yiqui tucu, tan ñavin ca tsa quihvi iin nyivi cuca nu ndacá ñaha Nyoo —catyí ra.

26 Tan nyivi tsa tsiñi tsa caħan ra catyí ñi:

—Tatun tacan, ¿yóo cua cuvi cacu? —catyí ñi.

²⁷ Tacan tan ra Jesús catyí ra:

—Tandihí tsa ña cuví javahá nyiví, Nyoo cuví javahá ra tandihí —catyí ra.

²⁸ Tacan tan ra Pedro catyí ra:

—Jutu Mañi yu, nyuhu tandihí maa tsa iyó tsi ndi nacoq ndi, tan nyicún ndi tsi un —catyí ra.

²⁹ Tacan tan catyí ra Jesús tsihin ra:

—Tsa nditsa catyí yu tsihin ndo, tyin tandihí nyooho tsa nacoq vehe, a ñasihí ndo, a yañi ndo, a jutu ndo, a sehe ndo tsacatyí tsa tsahá ndo tsa cundaca ñaha Nyoo tsi ndo,

³⁰ cuaha xaan tsa vaha cua ñihi ndo ñuu ñayiví ihya tan inga ñayiví tsa cua coo, cua ñihi ndo ñayiví tsa ña cua naa maa —catyí ra Jesús.

Inga tsaha jacotoq ra Jesús cuhva cua cahñi nyiví tsi ra

(Mt. 20.17-19; Mr. 10.32-34)

³¹ Tan cana sñn ra Jesús tsi tsa utsi uvi taahan ra tsicá tsihin ra, tan catyí ra tsihin ra naha:

—Vityin cahun yo nda ñuu Jerusalén. Tyin ndacan cua cundaa tyiñu Rayi tsa quee nda gloria: tandihí tyiñu tsa tyaa ra cuví ndusu yuhu Nyoo tahan tsanaha.

³² Tyin ra xaan iñi tsi yu naha ra cua nacuhva cuenda ra naha tsi yu tsi ra inga ñuu, ra tsa ñavin ra ñuu Israel cuví. Tan cua vacu nducu ra naha tsi yu. Tan cua cahan nyaa ra naha tsi yu. Tan cua tiví sñ ra naha nuu yu.

³³ Tan cua cañi ra naha tsi yu, tan cua cahñi ra naha tsi yu, maa tyin tsa tsinu uñi quiví tan cua nandoto yu inga tsaha —catyí ra Jesús.

34 Maa tyin ña cutuñí iñi ra tsicá tsihin ra tsa cahān ra, tan ndi ña tsitó ra naha náa tuhun cahān ra tsihin ra naha. Tyin ña cuví cutuñi iñi ra naha.

*Nu janduvahā ra Jesús iin ra cuaa ñuu Jericó
(Mt. 20.29-34; Mr. 10.46-52)*

35 Cuhva tsa cua tsaa ra Jesús ñuu Jericó, tan yuhu ityi ican nyaá iin ra cuaa, cayá ra.

36 Tacan tan tsiñi ra cuvaa tsa yahá cuaha nyivi. Tan tsicā tuhun ra náa cuenda ñihi xaan cuvaa.

37 Tan catyí tuhun nyivi tsihin ra tyin ra Jesús, ra ñuu Nazaret, vatsí.

38 Tacan tan quitsahā caná tsaa ra tan catyí ra:
—¡Yooho Jesús, tata ra rey David! ¡Cūndaahvi iñi tsi yu! —catyí ra.

39 Tan ra tsa cuahán ityi nuu ican naha ra, catyí ra naha tsihin ra, nacasi ra yuhu ra. Maa tyin tsaa ca canā tsaa ra, tan catyí ra:

—¡Yooho, tata ra rey David! ¡Cūndaahvi iñi tsi yu! —catyí ra.

40 Tacan tan tsicuñi ra Jesús. Tan tava tyiñu ra na cahun ra naha cuquihin ra naha tsi ra. Tan cuhva tsa tsaā ra nu nyaá ra Jesús, tan nducú tuhun ra Jesús tsi ra:

41 —¿Náa cuñí un javaha yu tsihin un?

Tacan tan ra cuaa ican nacahān ra, tan catyí ra:

—Jutu Mañi yu, cuñí yu nanyehe yu —catyí ra.

42 Tacan tan catyí ra Jesús tsihin ra:

—Nanyehe. Tsa nduvahā tinuu un tyin tsinú iñi un tsi yu —catyí ra.

43 Tan iin yaha ñi, nanyehe ra cuaa can. Tan cueta cuahán ra nyicún ra tsi ra Jesús. Tan jacahnú

ra tsi Nyoo. Tan tandihí nyívi tsa nyehe tsa cuví can, jacahnú ndihí tucu maa ñi tsi Nyoo.

19

Nu cuahán ra Jesús vehe ra Zaqueo

¹ Tacan tan quihví ra Jesús ñuu Jericó. Tan cua yaha ra tsitsi ñuu.

² Tan ñuu can iyó iin ra cuca xaan, nañí ra Zaqueo. Tan cuví ra ityi nuu tsihin ra tavá xuhun cuenda ra ndacá ñaha nda ñuu Roma.

³ Ra ihya cuñí xaan ra nacoto ra tsi ra Jesús. Tan ña cuví nyehe ra tsi ra tyin cuaha xaan nyívi cuahan tsihin ra. Tan maa ra ndiqui xaan ra.

⁴ Tacan tan tsinú xaan ra cuahán ra ityi nuu, tan ndaa ra iin nu yutun cahnu tsa nañí sicómoro tsa nyaá yuhu ityi nu cua yaha ra Jesús, tan cuví nyehe ra tsi ra Jesús.

⁵ Tan cuhva tsa quitá ra Jesús nu nyaá yutun can, nanyehe ndaa ra ityi siqui tan nyehe ra tsi ra Zaqueo. Tan catyí ra tsihin ra:

—Zaqueo, janumi nuu un nu yutun juvin. Tyin vityin cuñí tsi tsa cahun yu yuvehe un —catyí ra tsihin ra.

⁶ Tacan tan numi xaan nuu ra Zaqueo. Tan sii xaan cuñí ra. Tan quihín ra tsi ra Jesús cuahán tsihin ra yuvehe ra.

⁷ Tan tsa nyehe nyívi tsa tacan cuví, tandihí ñi quitsaha caahán nyaa ñi tsi ra Jesús. Tan catyí ñi tyin ndoó ra vehe iin ra iyó cuatyí.

⁸ Tan nu nyecú ra naha tsitsi vehe, ra Zaqueo tsinyaá nyityí ra. Tan catyí ra tsihin ra Jesús:

—Jutu Mañi yu, yuhu cua cuhva yu sava tsa iyó tsi yu tsi nyívi ndaahvi. Tan tatun jandaví ñaha yu

tsi nyiví tan suhú yu tsa tsii ñi, vityin cua nacuhva cuenda yu cumi taahan ca tsaha tsi ñi —catyí ra tsihin ra.

⁹ Tacan tan catyí ra Jesús:

—Vityin cacú un, tan nyiví ra Abraham cuví tsi un. [Tyin nacuhvā cuenda un tsi un tsi Nyoo tumaa nacuhvā cuenda ra Abraham tsi ra tsi Nyoo.]

¹⁰ Tyin yuhu, Rayí tsa quee nda gloria, vatsí yu vatsí nanducu yu tan vatsí jacacu yu tsi nyiví tsa cuanaa maa —catyí ra Jesús.

Nu jacuahā ra Jesús tsi yo na jaha tyiñu yo tsihin tsa tsahā Nyoo tsi yo

(Mt. 25.14-30)

¹¹ Tan tsitsi tsa tsiñí nyiví tsa caahán ra Jesús, tan quitsahā tsahá cuenda ra inga cuhva ihya tsi ñi. Tyin tsa cuñí tsa ra ñuu Jerusalén. Tan nyiví cuñí maa ñi tyin tsa cua quitsaha cundaca ñaha ra ndacan.

¹² Tacan tan catyí ra:

—Tsicoo iin ra cuca tan tsa cuñí cahun ra iin ñuu cañi. Tyin ndacan cua quihin cuenda ra tyiñu tsa cuvi ra rey, tyin tacan tan cua quitsi nuhu nyico ra ñuu ra.

¹³ Tsa ndi cumañi ca cahun ra, canā ra utsi taahan musu ra. Tan tsahā cuenda ra iin xuhun tsi iin iin ra naha. Tan catyí ra tsihin ra naha: “Jaha tyiñu ndo tsihin xuhun ihya nda cuanda quitsi nyico yu”, catyí ra.

¹⁴ Maa tyin nyiví ñuu ra, ndasi cuñí ñi nyehé ñi tsi ra tan ña cuñí ñi tsa cundaca ñaha ra tsi ñi. Tan jacuhun ñi tsi ra cahun cunyicun tsi ra, tyin cahan ra naha tyin ña cuñí ñi tsa cundaca ñaha ra tsi ñi.

15 Maa tyin ra ican cuvī maa ra rey. Tacan tan tsaā nyico ra nda ñuu ra. Tan quivī tsa tsaā ra, cana ra tsi musu ra, ra tsa nacoō ra xuhun tsihin. Tyin cuñi ra coto ra nácaa xuhun jahā canaa xuhun ra tsa nacoō ra.

16 Tan tsaā iin ra ican. Tan catyí ra: “Yooho taa, jahā canaa yu utsi taahan ca siqui xuhun tsa nacoō un tsi yu”, catyí ra.

17 Tacan tan catyí ra rey can tsihin ra: “Vaha xaan. Yooho cuvī musu vaha. Tyin javahā un ndihī tyiñu tsa tava yu tsi un. Tan vityin cua cundaca ñaha un utsi taahan ñuu”, catyí ra rey can tsihin ra.

18 Tacan tan tsaā tucu inga ra tsa tsahā ra xuhun. Tan catyí ra: “Juhun xuhun ihya. Jahā canaa yu uhun taahan ca siqui xuhun tsa nacoō un tsi yu”, catyí ra.

19 Tacan tan catyí ra rey tsihin ra: “Yooho cua cundaca ñaha un uhun taahan ñuu”, catyí ra.

20 Tacan tan tsaā tucu inga ra can. Tan catyí ra: “Juhun xuhun tsa tsahā un tsi yu. Yuhu naquihin vaha yu itsi tsitsi pañitu.

21 Tyin yuuhví xaan yu tsi un, tyin yooho xaan xaan un. Tyin tuhvá un naquihin tsa ñavin tsa tatsi un. Tan naquihín un ndaha tyiñu quita nu jahā tyiñu inga nyivi”, catyí ra can.

22 Tacan tan ra rey ican catyí ra tsihin ra: “Yooho musu ña vaha cuvī un. Vityin juvin ñi tsihin tsa cahan un tsi yu, cua cahan yu tsi un. Tatun tsitó un tyin yuhu xaan yu, tan tsitó un tyin naquihín yu tsa ña tatsi yu, tan naquihín yu ndaha tyiñu inga nyivi,

23 ¿nacuvi tyin ña tsityihī un xuhun yu banco tyin

tsaa yu maa tyin tsa nandaa xuhun yu?” catyí ra rey can.

²⁴ Tan catyí ra tsihin ra nyecú ican: “Quinyaa ndo xuhun tsa tsaha yu tsi ra ihya, tan cuhva ndo tsi ra tsa jahā canaa utsi taahan ca siqui tsa tsaha yu tsi ra”, catyí ra.

²⁵ Tacan tan catyí ra naha tsihin ra rey can: “Maa tyin ra ican, tsa iyó utsi taahan tsi ra”, catyí ra naha.

²⁶ Tacan tan ra rey ican catyí ra: “Maa tyin catyí yu tsihin ndo tyin ra tsa vaha ca jahā tyiñu tsihin tsa tsaha yu tsi ra, cuaha ca cua cuhva yu tsi ra. Tan ra tsa tsaha yu luxu ñi, tan ña cuñí ra jahá tyiñu ra tsihin tsi, cua quinyaa yu tandihí can tsi ra.

²⁷ Tan tandihí nyivi xaan iñi tsi yu, ñi tsa ña cuñí tsa cundaca ñaha yu tsi ñi, ndaca ndo tsi ñi nyehe, tan cahñi ndo tsi ñi nuu yu ihya”, catyí ra rey can —catyí ra Jesús.

Nu tsaa ra Jesús ñuu Jerusalén

(Mt. 21.1-11; Mr. 11.1-11; Jn. 12.12-19)

²⁸ Tsa yahā cahan ra Jesús yacan, tan jañihí ra cuahán ra ñuu Jerusalén.

²⁹ Tacan tan tsa cuñí tsaa ra ñuu Betfagé tsihin ñuu Betania, yatyin ñi iin yucu tsa nañí Olivo, [tyin maa ñi maa yutun olivo iyó ican]. Tava tyiñu ra tsi uvi taahan ra tsicá tsihin ra.

³⁰ Tan catyí ra tsihin ra naha:

—Cuaahan ndo ñuu tsa canyí yatyin ñi ihya. Ican cua nañihi ndo iin burru luhlu, quiti tsa ñaha ca quihí tyayu. Nuuhñí ti. Ndatsi ndo tsi ti. Tan quitsi ndaca ndo tsi ti tsi yu.

³¹ Tatun yóo tsicá tuhun tsi ndo: “¿Nacuenda ndatsí ndo tsi ti?” catyi ndo tsihin ñi: “Ndatsí ndi tsi ti tyin tsiñí ñuhu ti tsi ra ndacá ñaha.”

³² Tacan tan ra tsicá tsihin ra, cuahán ra naha. Tan nañihí ra naha tsi ti tumaa tsa cahān maa ra tsihin ra naha.

³³ Tan cuhva tsa ndatsí ra naha tsi ti, tsaā tsitoho ti. Tan nducū tuhun ra can naha ra tsi ra naha tan catyí ra:

—¿Nacuenda ndatsí ndo burru ihya? —catyí ra naha.

³⁴ Tacan tan nacaḥān ra can naha ra:

—Ndatsí ndi tsi ti tyin tsiñí ñuhu ti tsi ra ndacá ñaha —catyí ra naha.

³⁵ Tacan tan quihīn ra naha tsi ti. Tan tsindacā ra naha tsi ti nu nyíí ra Jesús. Tan tyiso ra naha jahma ra naha tsata ti. Tacan tan jandaā ra naha tsi ra Jesús tsata ti.

³⁶ Tacan tan cuahán ra Jesús. Tan cuaha xaan nyivi cuahán tsihin ra tsaquín ñi jahma ñi nu ñuhu ityi nu cua yaha ra, yosó ra burru ican.

³⁷ Tsa tsa cua cuyatyin tandihí nyivi tan ra Jesús nu iñi nuu yucu Olivo, quitsahā caná tsa tandihí ñi tsinú iñi tsi ra tsihin tsa sīi cuñí ñi. Tan jacahnú ñi tsi Nyoo tyin cuaha xaan tsa iyo javahā ra nyehe ñi.

³⁸ Tan catyí ñi:

—¡Na jacahnu yo tsi ra Rey ihya tyin vatsí ra tsihin sívi Nyoo Jutu yo! ¡Tan na coo tsa taxin andivi! ¡Tan na jacahnu yo tsi Nyoo! —catyí ñi.

³⁹ Tacan tan juhva ra fariseo tsa cuahán tsihin ñi, catyí ra naha:

—Maestro, jacutaxin tsi nyiví ihya —catyí ra naha.

⁴⁰ Tan nacahan ra Jesús tan catyí ra:

—Tatun nyiví ihya tan cutaxin ñi, yuu cua cana tsaa, tan cua jacahnu tsi tsi yu —catyí ra Jesús.

⁴¹ Tacan tan tsa tsaꝯ ra Jesús yatyin ñi yuhu ñuu Jerusalén, nanyehꝯ ra ñuu can tan quitsahꝯ tsacú ra tsa cuiihya cuñí ra.

⁴² Tan catyí ra:

—Vaha xaan tun tsatyin cuvi coto ndo tan cutuñí iñi ndo nácaa ñihi ndo tsa taxin coo añima ndo vityin ihya. Maa tyin xeehe xaan yihí tsa vaha can, tan ña cuví nañihi ndo can.

⁴³ Coo quiví cua nyehe ndo tundoho jaha nu xaan iñi tsi ndo cua tyihi cutu nahnu tsi ndo. Tandihí ityi cua quitsi nahnu. Tan cañi tahan nahnu tsihin ndo.

⁴⁴ Tan cua caquin nahnu tsi ndo nu ñuhu tan cua cahñi nahnu tsi ndo. Tan ndi intuhun ca yuu tsa yosó toto tan ña cua naco ca nahnu. Tacan cua cuvi tyin maa ndo ña cuñí ndo nacoto ndo tyin tsa vatsí Nyoo, vatsí jacacu ra tsi ndo.

Nu tavaꝯ ra Jesús tsi nu xicó tsitsi vehe ñuhu cahnu nahnu

(Mt. 21.12-17; Mr. 11.15-19; Jn. 2.13-22)

⁴⁵ Tacan tan quihvı ra Jesús tsitsi cora vehe ñuhu cahnu. Tan quitsahꝯ tavaꝯ ra tandihí nyiví xicó tan nyiví jatá tsa yucú nu quehe.

⁴⁶ Tan catyí ra tsihin nahnu:

—Nu tutu Nyoo catyí tyin vehe Nyoo, nu tsicán tahvi yo tsi ra cuví tsi. Tan nyooho jananduvı ndo itsi vehe ñasuhu —catyi ra Jesús.

⁴⁷ Tan tandihí quiví tsaahán ra Jesús tsijacuahá ra tsi nyiví tsitsi vehe ñuhu cahnu can. Maa tyin ra jutu tsa cuví ityi nuu naha ra, tan ra maestro cuenda ley vehe ñuhu naha ra, tan ra cuví mandoñi ñuu Jerusalén can, nducú ra naha cuhva cahñi ra naha tsi ra.

⁴⁸ Maa tyin ña ñihí maa ra naha nácaa javaha ra naha tyin tandihí nyiví tan vaha tyaá soho ñi tsa caahán ra Jesús.

20

Nu tsicá tuhun ra cumi tyiñu vehe ñuhu naha ra tsi ra Jesús yóo tava tyiñu tsi ra tsa cahan ra tsihin nyiví

(Mt. 21.23-27; Mr. 11.27-33)

¹ Iin quiví jacuahá ra Jesús tsi nyiví tsitsi vehe ñuhu cahnu, tan caahán ra nácaa jacacú Nyoo tsi ñi. Tan tsaá ra jutu tsa cuví ityi nuu naha ra tsihin ra maestro cuenda ley vehe ñuhu naha ra, tan tsihin tucu ra cuví mandoñi naha ra.

² Tan catyí ra naha tsihin ra Jesús:

—Catyi tuhun tsihin ndi ¿yóo tava tyiñu tsi un javaha un tyiñu ihya? —catyí ra naha.

³ Tacan tan ra Jesús catyí ra tsihin ra naha:

—Yuhu cuñí tucu yu nducu tuhun yu tsi ndo.

⁴ ¿Yóo jaquitsi tsi ra Juan tyin jacoondutya ra tsi nyiví? ¿A Nyoo jaquitsi tsi ra, a nyiví?

⁵ Tacan tan ra ican naha ra quitsahá caahán yuhu tahan ra naha tan catyí ra naha:

—Tun catyí yo tyin Nyoo jaquitsi tsi ra Juan, cua catyi ra tsihin yo nacuenda ña tsinu ñi yo tsa cahan ra Juan.

⁶ Tun catyí tucu yo tyin nyívi jaquitsi tsi ra, tandihí nyívi cua cahñi ñi tsi yo tsihin yuu. Tyin tandihí ñi, tan cuñí ñi tyin ndusu yuhu Nyoo cuvi ra Juan —catyí ra naha.

⁷ Tacan tan nacahan ra naha tsihin ra Jesús tyin ña tsitó ra naha yóo tava tyiñu tsi ra Juan jacoondutya ra tsi nyívi.

⁸ Tacan tan ra Jesús catyí ra tsihin ra naha:

—Ndi yuhu, tan ña cua catyi tuhun yu tsihin ndo yóo tava tyiñu tsi yu tsa javaha yu tyiñu ihya.

Nu jacuahá ra Jesús tyin tumaa cuví juhva ra caquiñi naha ra, tacan cuví ra tsa cua cahñi tsi ra (Mt. 21.33-44; Mr. 12.1-11)

⁹ Tacan tan tsahá cuenda ra Jesús iin cuhva ihya tsi nyívi:

—Iin ra, tatsi cuaha ra nu ñuhu ra yoho tsiti yucu tsa cua cuvi vinu. Yahá can tan tsahá nuu ra ñuhu can tsi juhva ra jahá tyiñu. Tacan tan naha cuahán ra inga ñuu.

¹⁰ Tan quivi tsa iñi tsiti nu yoho can, tacan tan jacuhun ra iin musu tyin naquihin ra juhva tsiti tsa taahán tsi tsi maa ra. Maa tyin cañi xaan ra jahá tyiñu ican naha ra tsi musu can. Tan nundii ra jacunuhu ra naha tsi ra.

¹¹ Tacan tan tsitoho yoho can jacuhun ra inga musu. Juvín ñi cañi xaan ra can naha ra tsi ra. Tan cahán nyaa ra naha tsi ra. Tan jacunuhu ra naha tsi ra. Tan juvín ñi nduve tsa tsahá ra naha cuiso ra cunuhu ra.

¹² Tacan tan ra cuví tsitoho yoho can jacuhun nyico ra inga ra. Maa tyin juvín ñi tacan javaha

nyico ra naha tsihin ra can. Tan jañicuehe ra naha tsi ra. Tan tava ra naha tsi ra.

¹³ Yaha can tan catyí tsitoho ñuhu ican: “¿Naca cua javaha yu vityin? Vaha ca cua jacuhun yu sehe yu, ra tsa cuñi xaan yu. Vasiqui cua tyaa yahvi ra naha tsi ra, tyin sehe yu cuví tsi ra”, catyí ra.

¹⁴ Maa tyin tsa nyehe ra jahá tyiñu can naha ra tsi ra sehe ra, natuhún tahan ra naha: “Juvín ra ihya cua ndoo tsihin ñuhu ihya tatun cúu jutu ra. Vaha ca na cahñi yo tsi ra. Tacan tan ndoo maa yo tsihin ñuhu ihya”, catyí ra naha.

¹⁵ Tacan tan tava ra naha tsi sehe tsitoho ñuhu ican ityi tsata cora, tan tsahñi ra naha tsi ra —catyí ra Jesús.

Tacan tan catyí ra Jesús tsihin nyivi nyecú ican:

—¿Náa cua javaha tsitoho ñuhu ican tsihin ra can naha ra tyin tsahñi ra naha sehe ra?

¹⁶ Catyí yu tsihin ndo tyin cua quitsi ra tan cua cahñi ra tsi ra jahá tyiñu ican naha ra. Tan cua cuhva ra ñuhu ican tsi inga ra naha —catyí ra Jesús.

Tan tsa tsiñi nyivi tsa caahán ra, nayuhvi xaan ñi cuví. Tan catyí ñi:

—¡Ña cuñi Nyoo tahan yo tacan! —catyí ñi.

¹⁷ Maa tyin ra Jesús nanyehe ra nuu ñi tan catyí ra:

—Tun tacan tsicá iñi ndo ¿náa cuñi tsi catyi tsa nyaá nu tutu Nyoo? Tyin catyí tsi tyehen:

Yuu tsa ña cuñi ra javaha vehe cuatyíñu ra, yacan cuví yuu tsa tsiñi ñuhu ca.

¹⁸ Yóo nyivi cua canacava tsata yuu can, cua tahnú cuatyí ñi. Tan tatun maa yuu can canacava tsata ñi cua taxin nyihi ñi —catyí ra Jesús.

19 Tan ra jutu tsa cuví ityi nuu naha ra tan ra maestro cuenda ley vehe ñuhu naha ra, tuví ñi ra naha tyin tsa cah̄an ra Jesús tacan, tsi maa ra naha nañi can. Tan cuñí ra naha t̄in ra naha tsi ra tyin cah̄ni ra naha tsi ra. Maa tyin ña tsitó maa ra naha nácaa javaha ra naha, tyin nayuhv̄i ra naha tsi nyiv̄i.

Nu jacuah̄a ra Jesús tsa cuenda tsa tyahvi nyiv̄i xuhun tsi ra ndacá ñaha ñuu Roma (Mt. 22.15-22; Mr. 12.13-17)

20 Tacan tan jacuhun ra naha tsi juhva ra nducu cuhva tsi ra Jesús. Tan jah̄a ra naha tyin ra vaha cuví ra naha. Tyin tacan tan coto ra naha náa tsa ña vaha cua cahan ra Jesús tan cuví t̄in ra naha tsi ra. Tan cuhva cuenda ra naha tsi ra tsi ra ndacá ñaha.

21 Yacan tsic̄a tuhun ra naha tsi ra Jesús:

—Maestro, tsitó ndi tyin vaha tsa caahán un. Tan jacuahá un tsa vaha tsi nyiv̄i. Tan ñavin cuhva iyó ñi nyehé un maa tyin nyehé un cuhva iyó ña ñi. Tan maa ñi maa tsa nditsa tyin ityi Nyoo janahá un.

22 Catyi tsihin ndi ¿a vaha tsa tyahvi yo tsa tsicán ra ndacá ñaha nda ñuu Roma tsi yo, a ña vaha? —catyí ra naha.

23 Tan ra Jesús tuví ñi ra tyin nducu cuhva ra naha tsi ra. Tan catyí ra tsihin ra naha:

—¿Nacuenda cuñí ndo nducu cuhva ndo tsi yu?

24 Janaha jihna ndo iin xuhun tsi yu, na nyehe yu. ¿Yóo nuu nyaá xuhun can tan yóo siv̄i nyaá can? —catyí ra.

Tacan tan nacah̄an ra naha:

—Nuu ra ndacá ñaha, ra cuví rey cahnu, nyaá can tan juvin ñi siví ra nyaá can —catyí ra naha.

²⁵ Tacan tan catyí ra Jesús:

—Tun tacan, cuhva ndo xuhun can tsi ra ndacá ñaha tyin tsii maa ra cuví tsi. Tan cuhva ndo tsi Nyoo tsa taahán tsi tsi ra —catyí ra Jesús tsihin ra naha.

²⁶ Tan ña cuví maa jandavi ñaha ra naha tsi ra Jesús tsihin tsa caahán ra tacan tsihin nyívi. Tan iyo xaan cuñí ra naha tsa nacahan ra. Tan taxin ña cuví ra naha.

Nu cuñí ra cuví saduceo naha ra jandavi ñaha ra naha tsi ra Jesús

(Mt. 22.23-33; Mr. 12.18-27)

²⁷ Tsa yaha can tan tsaá juhva ra cuví saduceo nu nyíi ra Jesús. Maa ra naha cuví ra tsa catyí tyin ña nandoto nyívi tun tsa tsihí ñi.

²⁸ Tacan tan catyí ra naha tsihin ra Jesús:

—Maestro, jandoo ra Moisés tyiñu ihya tyin tatun iin ra tsihí tan nandoo ñasihi ra, tatun nduve sehe ra tsicoo tsihin ña, taahán tsi tsa tindaha ra cuví yañi ra tsihin ña, tan coo sehe ra tsihin ña tsa cuenda ra yañi ra.

²⁹ Maa tyin cuñí ndi coto ndi nácaa, tyin tsicoo iin ra tan tsicoo utsa sehe ra. Tan ra tsa ñihi ca tsicoo ñasihi ra, maa tyin nduve sehe ñi tsicoo, tan tsihí ra.

³⁰ Tacan tan naquihin ra tsa tsinu uvi tsi ña can. Tan nduve tucu sehe ñi tsicoo. Tan tsihí tucu ra can.

³¹ Tan juvin ñi tacan javaha ra tsinu uñi. Tandihí tsa utsa ra naha javaha tacan. Ndi intuhun ra tan ña tsicoo sehe ra tsihin ña.

32 Tan nu ndih̄i tuhun tsih̄i ndih̄i maa ña.

33 Tan cuñí ndi coto ndi yóo ra cua cuvi ȳi ña tsitsi tsa tandih̄i tsa utsa taahan ra naha quiv̄i cua nandoto nyiv̄i —catyí ra saduceo naha ra.

34 Tacan tan nacahan ra Jesús, tan catyí ra:

—Ihya nu ñuhu ñayiv̄i, raȳi tan ñaha tindahá ñi.

35 Maa tyin nyiv̄i tsa nacatsi Nyoo tyin nandoto ñi tan coo ñi nu ndacá ñaha ra, ña tindaha ca ñi tan ndi ña cua cuhva ca ñi sehe ñi tindaha.

36 Tan nduve tuhun tsih̄i iyó ndacan tyin cua cuvi ñi tumaa ángel. Tan cua cuvi ñi sehe Nyoo tyin nandoto ñi.

37 Tan tsa cuenda tuhun tsa nandotó ndiyi. Tsa nditsa cuví tsi tyin yacan jacoto ra Moisés nu nacatyí tuhun ra nácaa cayú taca iñu can. Tsihin can jacoto ra tsi yo tyin nyiv̄i tsih̄i cua nandoto ñi. Tyin catyí ra: “Jutu yo Nyoo cuenda ra Abraham, tan cuenda ra Isaac, tan cuenda ra Jacob”, catyí ra Moisés.

38 Tacan catyí ra tyin Nyoo, ñavin Nyoo cuenda nyiv̄i tsih̄i cuví ra. Nyoo cuenda nyiv̄i nyito cuví ra. Tyin tsa cuenda Nyoo tandih̄i yo tan nyito añima yo vasu tsa tsih̄i cuñu ñuhu yo —catyí ra Jesús.

39 Tacan tan juhva ra maestro cuenda ley vehe ñuhu naha ra catyí ra naha:

—Vaha xaan nacahan un, Maestro —catyí ra naha.

40 Tacan tan ña caná ca maa iñi ra naha nducu tuhun ra naha náa inga ca nducu tuhun ra naha tsi ra.

Ra Cristo cuví ra tata ra David, tan juvin ñi cuví tucu ra Sehe Nyoo

(Mt. 22.41-46; Mr. 12.35-37)

⁴¹ Tacan tan tsicá tuhun ra Jesús tsi ra naha:

—¿Nacuenda catyí yo tyin ra Cristo tata ra David cuví tsi ra?

⁴²⁻⁴³ Tyin juvin ñi maa ra David catyí ra nu libru Salmo:

Caahán Nyoo Jutu yu tsihin Jutu Mañi yu, ra Cristo, tan catyí ra tsihin ra:

“Cunya xa xiin cuaha yu nda cuanda cuhva yu tsi nu xaan iñi tsi un tyin cuhvi tsaha un tsi nahnu”, catyí Nyoo tsa tsatyíñu ra yuhu ra David tahañ tsanaha.

⁴⁴ ¿Nacaa tsa tata ra David cuví tucu ra Cristo, tan juvin ñi maa ra David catyí tyin Jutu Mañi ra cuví tsi ra Cristo? —catyí ra Jesús.

Nu cahan ra Jesús tyin cuaha xaan cuatyí ra maestro cuenda ley vehe ñuhu iyó

(Mt. 23.1-36; Mr. 12.38-40, Lc. 11.37-54)

⁴⁵ Tandihí nyívi tsiñi ñi tsa cahan ra Jesús tsihin ra tsicá tsihin ra nu cahan ra tyehen:

⁴⁶ —Jaha ndo cuenda tsi ndo tsihin ra maestro cuenda ley vehe ñuhu naha ra. Tyin taahán xaan iñi ra naha cunditsi ra naha jahma nañi. Tan cuahan ra naha nuyahvi, cuñi ra naha tsa cuhva nyívi yucú nuyahvi nacumi tsi ra naha tsihin tsa jaha ñi tsa ñayívi tsi ra naha. Tan nanducú ra naha tyayu vaha cunyecú ra naha tsitsi vehe ñuhu, tan nu cuahán ra naha vico.

⁴⁷ Tan naha tsicán tahvi ra naha tsi Nyoo nu tuví, tsa cuñi ra naha tsa nyehe nyívi tan catyí ñi tyin vaha xaan nyívi cuví ra naha. Maa tyin juvin ñi

maa ra naha cuví ra quinyaá vehe ñi ndaahvi tsa tsihi̇ y#̇ tyin ña cuví tyahvi ñi xuhun tsa tavá ra naha tsi ñi. Yacan ñihi xaan cua tatsi tuñi Nyoo tsi ra naha —catyí ra Jesús.

21

Tsa jamañi̇ iin ñaha ndaahvi tsa tsihi̇ y#̇
(Mr. 12.41-44)

¹ Tan nyehė ra Jesús tyin cuaha xaan nyivi̇ cuca tyihí ñi xuhun tsitsi caja tsa nyíi̇ tsitsi vehe ñuhu cahnu.

² Tan nyehė tucu ra tsi iin ñaha ndaahvi tsa tsihi̇ y#̇. Tan tyihí̇ ña uvi taahan ñi xuhun nyihi.

³ Tan catyí ra:

—Tsa nditsa catyí yu tsihin ndo tyin nuu Nyoo cuaha ca xuhun tyihí̇ ñaha ndaahvi ihya tan ñavin ca tandihí̇ ñi cuca can.

⁴ Tyin tsa ndoȯ ña tyihí̇ ñi. Tan ñaha ihya tyihí̇ ña tandihí̇ tsa iyó tsi ña —catyí ra.

Nu cahan ra Jesús tyin cua tani̇ vehe ñuhu cahnu
(Mt. 24.1-2; Mr. 13.1-2)

⁵ Tacan tan juhva nyivi̇ natuhún ñi tuhun cuenda vehe ñuhu cahnu ícan. Tan catyí ñi tyin sii̇ xaan caá yuu. Tan sii̇ xaan caá tsa jamañi̇ nyivi̇. Tacan tan catyí ra Jesús:

⁶ —Coo quivi̇ tan cua tani̇ tandihí̇ tsa nyehé ndo ihya. Tan ndi intuhun ca yuu tan ña cua coso ca siqui̇ inga tsi. Ndihi̇ tsi cua cani̇ nu xaan iñi tsi ndo.

Tsa cua cuvi̇ tsa ndi̇ cumañi̇ ca naa ñuhu ñayivi̇
(Mt. 24.3-28; Mr. 13.3-23)

⁷ Tacan tan nducú tuhun nyivi̇ tsi ra Jesús, tan catyí ñi:

—Maestro, ¿ama cua cuvi tandihí tsa caahán un ihya? ¿Nacaa tan coto ndi tatun tsa cuyatyin tsa naa ñuhu ñayivi? —catyí ñi.

⁸ Tacan tan catyí ra Jesús:

—Jaha vaha ndo cuenda, coto jandavi ñaha nyivi tsi ndo. Tyin cuaha xaan ra cua quitsi, tan cua cuatyíñu ra naha sivi yu, tan cua catyi ra naha: “Yuhu cuví Cristo, ra tsa jaquitsi Nyoo. Tyin tsa cuñí naa ñuu ñayivi”, cua catyi ra. Maa tyin ña cunyicun ndo tsi ra naha.

⁹ Tan quivi cua ñihi tuhun ndo tyin tsa iyó cuatyí tan ñihi cañí tahan nyivi, ña nayuhvi ndo. Tyin tandihí can taahán tsi cuvi tsa jihna ñi. Maa tyin cumañi ca tsaa quivi tsa cua naa ñuhu ñayivi.

¹⁰ Tan catyí tucu ra:

—Nyivi iyó iin ñuu cua cañi tahan ñi tsihin nyivi inga ñuu. Tan cua coo cuatyí.

¹¹ Tan ñihi xaan cua taan. Tan cua coo tama. Tan cua coo cuehe tandihí ñi ityi. Tan cua nyehe nyivi tsa yuuhvi ityi andivi. Tan cuaha xaan tsa iyo nahnu tsa ña tuhvá nyivi nyehe tan cua nyehe ñi.

¹² Maa tyin tsa ndi cumañi ca cuvi yacan, cua cuxaan iñi nyivi tsi ndo. Tan cua ndacan ñi cuatyí tsaha ndo. Tyin cua cutuñi ndo tan cua cuhva cuenda ñi tsi ndo tsi ra jutu. Tan cua tyihi ñi tsi ndo tsitsi vehe caa. Tan cua cundaca ñi tsi ndo nuu rey tan nuu ra ndacá ñaha tsacatyí sivi yuhu.

¹³ Tacan tan cuví cahan ndo tuhun yu tsihin ñi.

¹⁴ Maa tyin jaha ndo cuenda tan ña cua caca iñi ndo náa tuhun cua nacahan ndo tsihin ra ndacá ñaha ícan.

¹⁵ Tyin yuhu cua cuhva yu tuhun cua cahan ndo. Tan cua cuhva yu tsa nyityi jiñi ndo nu cua cahan

ndo. Ndi intuhun nu xaan iñi tsi ndo tan ña cuvi jaha nahnu tsi ndo.

¹⁶ Maa tyin nyivi cua cuhva cuenda ñi tsi ndo tsi nu xaan iñi tsi ndo. Nda cuanda jutu ndo tan sihi ndo, ra cuví yañi ndo, nyivi ndo, tan ra vaha iñi tsi ndo cua cuhva cuenda ra naha tsi ndo tsi nu xaan iñi tsi ndo. Tan yihí nyooho cua cahñi nyivi tsi ndo.

¹⁷ Tandihí nyivi tan ndasi cua cuñi ñi nyehe ñi tsi ndo tsacatyí yuhu.

¹⁸ Maa tyin ndi intuhun ixi jiñi ndo tan ña cua cunaa.

¹⁹ Tatun ña ndu uvi iñi ndo tsa nyicun ndo tsi yu, cua cacu ndo.

²⁰ 'Quivi cua nyehe ndo tyin nñi canduvi yuhu ñuu Jerusalén ihya nyecú andaru, coto ndo tyin tsa cuñi naa ñuu ihya.

²¹ Tan nyivi iyó ñuu tsa cayucú Judea, cua cunu ñi tan cuhun xeehe ñi ityi yucu. Tan nyivi iyó ñuu Jerusalén ihya, cua quita ñi. Tan nyivi iyó tsitsi cuhu, ña cua quitsi nuhu ñi ñuu ihya.

²² Tyin yacan cuví quivi tsa cua tatsi tuñi Nyoo tsi nyivi ñuu ihya. Tyin tsa cua cuvi tandihí cuhva catyí nu tutu Nyoo.

²³ Tan ndahvi ñiñaha tsa ñuhú sehe quivi can. Tan ndahvi ñi tsa iyó sehe lee tsa ndi tyaxín. Tyin cuaha xaan tundoho cua nyehe ñi tan tandihí nyivi. Tyin cahnu xaan tsa uhvi cua nyehe nyivi ñuu Jerusalén ihya cua jaha Nyoo.

²⁴ Andaru cua cahñi ra naha tsi juhva nyivi tsihin mityi. Tan cua tñin ra naha juhva ñi tan cundaca ra naha tsi ñi ñuu nahnu. Tan nyivi tsa ñavin nyivi Israel cuví, cua cuyucu ñi ñuu Jerusalén ihya nda cuanda quivi tsa catyí maa Nyoo.

Nacaa cua quitsi Ray# tsa quee nda gloria inga tsaha

(Mt. 24.29-35, 42-44; Mr. 13.24-37)

²⁵ Tacan tan cuaha tsa iyo cua nyehe nyivi nu ñicanyii, tan nu yoo, tan nu tiñuu. Tan ihya nu ñuhu ñayivi cua nayuhvi ñi tsihin tsa iyo cua nacatyin ndutya ñuhu.

²⁶ Tan cua cúu naaha ñi tsihin tsa yuuuvi ñi tsa tsicá iñi ñi náa ndihi tsa cua cuvi ihya nu ñuhu ñayivi. Tyin nda cuanda tsa iyó andivi cua nacanda tan taan.

²⁷ Tacan tan cua nyehe ñi tsi yuhu, Ray# tsa quee nda gloria, vatsí nuu yu tsitsi vico tsihin tunyee iñi Nyoo, tan tsihin tsa cahnu cuví ra.

²⁸ Tan cuhva tsa cua quitsaha yacan tan jandu iin ndo iñi ndo tan cus# iñi ndo tyin numi xaan cua cacu ndo —catyí ra.

²⁹ Tacan tan tsaha cuenda ra Jesús iin cuhva ihya, tan catyí ra:

—Jaha ndo cuenda yutun higuera, tsihin tandihi ca yutun.

³⁰ Tatun tsa nduyutyá numa tun tsa cuyatyin cuun savi.

³¹ Tan tacan tucu nyooho, tatun tsa nyehe ndo tyin tsa quitsaha cuví tandihi tsa cahan yu tsihin ndo, coto ndo tyin tsa nyanaá quivi tsa cundaca ñaha Nyoo nu ñuhu ñayivi ihya.

³² Maa tyin tsa nditsa catyí yu tsihin ndo tyin yacan cua cuvi jihna tsa ndi cumañi ca cúu nyivi tsa iyó nu ñuhu ñayivi.

³³ Coo quivi cua naa andivi tan ñuhu ñayivi, maa tyin tuhun caahán yu, ña cua cundihi tsi.

³⁴ Tan jaha ndo cuenda tsi ndo coto ndundava iñi ndo tsihin tsa cua javaha ndo tsa caquiñi, a tsa coho ndo nyixi, a tsa caca xaan iñi ndo tundoho ñayivi ihya. Jaha ndo cuenda coto ndundava iñi ndo tsihin yacan. Tan coto sana iñi ndo tan quita quivi cua quitsi yu tan cua quitsi tundoho cua nyehe ndo.

³⁵ Tyin tacan cua cuvi, tandihi nyivi iyó nu ñuhu ñayivi, sana iñi ñi tan tumaa iin tsa cua nacasi Nyoo nu yucú ñi tan ña cua cuvi quita ñi.

³⁶ Maa tyin nyooho c̄atu ndo. N̄acan tahvi ndo tsi Nyoo tandihi quivi, na jacacu ra tsi ndo. Tan ña nyehe ndo tandihi tundoho tsa cua coo. N̄acan tahvi ndo, tacan tan cua cuvi tsaa ndo nu nyaá yuhu, Rayi tsa quee nda gloria —catyí ra Jesús.

³⁷ Tan tandihi quivi jacuahá ra Jesús tsi tandihi nyivi tsitsi vehe ñuhu cahnu. Tan tsa tsacuaa tsicá ra yucu Olivo.

³⁸ Tan tandihi nyivi tsaá ñi tsitsi vehe ñuhu cahnu ndihi tsa tuvi, tyin tyaa soho ñi tsa caahán ra.

22

Nu cua xico ra Judas Iscariote tsi ra Jesús

Mt. 26.1-5, 14-16; Mr. 14.1-2, 10-11; Jn. 11.45-53)

¹ Tan tsa nyanaá yatyin quivi tsa cua coo vico pascua, vico nu tuhvá nyivi tsatsí paan tsa nduve yutsan iya yihí.

² Tan ra jutu tsa cuví ityi nuu naha ra tsihin ra maestro cuenda ley vehe ñuhu naha ra, nducú xaan ra naha cuhva cahñi ra naha tsi ra Jesús. Maa tyin yuuhví ra naha tsi nyivi.

³ Tacan tan quihv̄i nu ña vaha tsi nu Judas Iscariote. Tan nu ihya cuví iin tsa utsi uvi taahan ra tsa nacats̄i ra Jesús.

⁴ Tan nu ihya, tsahan nu tsicahan nu tsihin jutu tsa cuví ityi nuu tan tsihin ra yihí ndaha tsi ra jahá cuenda vehe ñuhu cahnu naha ra. Tan natuhun tahan ra naha nácaa cua cuhva cuenda nu Judas tsi ra Jesús tsi ra naha.

⁵ Tan ra ican naha ra sī xaan cuñí ra naha. Tan tyih̄i ra naha cuhva tyin cuhva ra naha xuhun tsi ra Judas.

⁶ Tan ra Judas ndoo ra vaha. Tan quitsaha nducú ra cuhva ama cua nacuhva cuenda ra tsi ra Jesús tsi ra can naha ra, cuhva tsa nduve nyiv̄i yucú tsihin ra Jesús.

Nu cuxiñi ra Jesús tsihin ra tsicá tsihin ra

(Mt. 26.17-29; Mr. 14.12-25; Jn. 13.21-30; I Co. 11.23-26)

⁷ Tan tsā quiv̄i tsa cuví vico tsa tsatsí nyiv̄i paan tsa nduve yutsan iya yihí. Tan juvin ñi quiv̄i ican tuhvá ñi tsahñí iin mbee luhlu tsa vico pascua can. Tyin catsi ñi tsi ti.

⁸ Tan ra Jesús jacuhun ra tsi ra Pedro tsihin ra Juan, tan catyí ra tsihin ra naha:

—Cuaahan ndo cujanduvaha ndo mbee tsa cua cuxiñi yo cuenda vico pascua —catyí ra.

⁹ Tacan tan nducú tuhun ra naha tsi ra:

—¿Numaa cuñí un javaha ndi tsa cuxiñi yo? —catyí ra naha.

¹⁰ Tacan tan catyí ra Jesús tsihin ra naha:

—Cuaahan ndo tsitsi ñuu. Ican cua nañihi ndo tsi iin ra nyisó iin quiyi ndutya. Cuaahan ndo tsata ra tan quihvi ndo vehe nu quihvi ra.

¹¹ Tan catyi ndo tsihin tsitoho vehe can: “Ra cuví Maestro, cuñí ra coto ra numaa nyaá cuarto nu cua cuxiñi ra tsihin ra tsicá tsihin ra, tyin jacahnu ra vico pascua.” Tacan catyi ndo tsihin ra.

¹² Tacan tan cua janaha ra iin cuarto cahnu ityi siqui, nu tsinu uvi pisu tsi ndo. Tan tsa nduvaha maa tsi. Tan ndacan cua javaha ndo tsa cuxiñi yo —catyí ra tsihin ra naha.

¹³ Tacan tan cuahán ra naha. Tan nañihi ra naha tandihi tumaa tsa cahán ra Jesús. Tacan tan na icá vaha ra naha tsa cuxiñi ra naha cuenda vico pascua.

¹⁴ Tacan tan tsa tahañ tsi cuhva tsa cuxiñi ra Jesús tsihin tandihi ra tava tyiñu ra, tsinyecu ra naha yuhu mesa.

¹⁵ Tacan tan catyí ra Jesús:

—Cuñí xaan yu cuxiñi yu tsihin ndo cuenda vico pascua ihya tsa ndi cumañi ca nyehe yu tundoho tan cúu yu.

¹⁶ Tan catyí yu tsihin ndo tyin ña cua catsi ca yu inga tsaha tsa cuenda vico ihya, nda cuanda tahan tsi inga tsaha nda nu ndacá ñaha Nyoo —catyí ra.

¹⁷ Tacan tan quihin ra iin vasu vinu. Nacuhva ra tyahvi nyoo tsi Nyoo. Yaha can tan catyí ra tsihin ra nyecú tsihin ra:

—Quihin ndo tsehe. Tan coho ndo luxu luxu.

¹⁸ Tyin catyí yu tsihin ndo tyin ña cua coho ca yu vinu nda cuanda quitsi Nyoo tan quitsaha cundaca ñaha ra nu ñuhu ñayivi ihya —catyí ra.

19 Yahā can tan quih̄in ra paan, tan tsahā ra tyahvi nyoo tsi Nyoo, tan tsahnya sava ra can. Tsahan tsahā ra can tsi ra naha. Tan catyí ra tsihin ra naha:

—Paan ihya cuví tumaa cuñu ñuhu yu. Tyin cua cuhva cuenda yu tsi yu tan cúu yu tsa cuenda tsa vaha tsi maa ndo. Tacan cuñí tsi nducuhun iñi ndo tsi yu tan cuxiñi ndo tyehen —catyí ra.

20 Tan tsa yahā cuxiñi ra naha, tacan tan quih̄in ra vasu vinu, tan catyí ra:

—Tsihin vinu ihya ndoó Nyoo tyiñu tsihin ndo vityin. Tyin vinu tsa yihí tsitsi vasu ihya, tumaa niñi yu cuví tsi. Tan tsa vaha tsi nyooho tan cua cati niñi yu. Tan cua cúu yu.

21 'Maa tyin vityin, ra tsa cua nacuhva cuenda tsi yu tsi ra xaan iñi tsi yu, iin ñi nu yosó ndaha ra tsihin ndaha yu nu mesa ihya.

22 Tyin yuhu, Rayi tsa quee nda gloria, cua tahan yu tumaa tsa nyaá maa tsa cua tahan yu. Maa tyin jndahvi ra tsa cua nacuhva cuenda tsi yu! —catyí ra Jesús.

23 Tacan tan ra tsicá tsihin ra Jesús quitsahā nducú tuhun tahan ra naha, ndáa ra cua nacuhva cuenda tsi ra Jesús tsi ra xaan iñi tsi ra.

Nu cahān yuhu tahan ra tsicá tsihin ra Jesús, yóo ra cahnu ca cuví

24 Yahā can tan quitsahā caahán yuhu tahan ra tsicá tsihin ra Jesús, ndáa ra cahnu ca cuví.

25 Tan ra Jesús catyí ra:

—Tsitó nyooho tyin ra ndacá ñaha tsi nyivi iyó nu ñuhu ñayivi, ñihi xaan ndacá ñaha ra naha tsi ñi.

Tan cuñí ra naha tyin catyi nyiví tyin jatyinyeé ra naha tsi ñi.

²⁶ Maa tyin nyooho ña taahán tsi javaha ndo tumaa javahá ra ican naha ra. Tyin tatun cuñí ndo cuví ndo ra cuví ityi nuu, taahán tsi janduluhlu ndo tsi ndo. Tan tatun cuñí ndo cundaca ñaha ndo, cuñí tsi tsa cuví ndo musu tandihí ndo.

²⁷ Tyin nu ñuhu ñayiví ihya, ra cuví ityi nuu cuví ra tsa ña jahá tyiñu. Tan nyaá ra yuhu mesa tan musu ra tsahá tsa catsi ra. Maa tyin yuhu, ra cuví ityi nuu cuví yu, tan cuví yu musu ndo.

²⁸ 'Tan nyooho cuví ndo tsa nyecú tsihin yu tandihí nu nyehe yu tundoho.

²⁹ Yacan cuenda, yuhu tsahá yu iin nu cua cundaca ñaha ndo tumaa tsa tsahá Jutu yu tsa cundaca ñaha yu.

³⁰ Tyin cua catsi ndo tan cua coho ndo nu mesa tsihin yu nda nu ndacá ñaha yu. Tan ndacan cua cunyecu ndo cundaca ñaha ndo nyiví cuví tata tsa utsi uvi sehe ra Israel.

Nu caahán ra Jesús tyin cua catyi ra Pedro tyin ña nacoto ra tsi ra

(Mt. 26.31-35; Mr. 14.27-31; Jn. 13.36-38)

³¹ Tacan tan catyí ra Jesús tsihin ra Pedro:

—Nyehé vaha un, yooho Simón. Tyin nu ña vaha tsa tsicān ndatu nu tsi Nyoo tsa nducu cuhva nu tsi ndo tyin cuñí nu tsa ndu uvi iñi ndo tsa tsinú iñi ndo tsi Nyoo.

³² Maa tyin tsicān tahvi xaan yu tsi ra tsa cuenda un, na ña jandihí un tsa tsinú iñi un tsi yu. Tan tsa ndu uvi iñi un cuatyi un, tan natsinu vaha nyico iñi un tsi yu, cua jatyinyee un tsi ra yañi un naha

ra tsa ña cua jandihî ra naha tsa tsinú ñî ra naha tsi yu —catyí ra Jesús tsihin ra Simón.

³³ Tan ra Simón catyí ra tsihin ra:

—Jutu Mañi yu, tsa ndu iin vaha ñî yu tsa cuhun yu tsihin un vasu vehe caa, vasu cúu yu tsihin un —catyí ra.

³⁴ Tacan tan catyí ra Jesús tsihin ra:

—Pedro, catyí yu tsihin un tyin vityin tsa ndi cumañi ca vacu tsitooho, yooho cua catyi un uñi tsaha tyin ña nacoto un tsi yu —catyí ra Jesús tsihin ra.

Nu tsa cuñi tsaq cuhva tsa cua nacuhva cuenda ra Judas tsi ra Jesús

³⁵ Tacan tan tsicá tuhun ra Jesús tsi ra tsicá tsihin ra tan catyí ra tsihin ra naha:

—Nducuhun ñî ndo quivî tsa jacuhun yu tsi ndo tsa cahān ndo tsihin nyivî, tan nduve tsa tsindaha ndo, ndi marali, ndi xuhun, ndi inga pari nditsan ndo. ¿A cumañi tsa cumañi tsi ndo quivî can? —catyí ra Jesús.

—Nduve —catyí ra naha.

³⁶ Tacan tan catyí ra Jesús tsihin ra naha:

—Maa tyin vityin, tatun iyó marali ndo, cundaha ndo. Tan tatun iyó xuhun ndo, cundaha ndo. Tatun nduve mityi ndo, xico ndo iin jahma ndo tan jata ndo mityi ndo.

³⁷ Tyin catyí yu tsihin ndo, tyin tandihî tuhun yu tsa nyaá nu tutu Nyoo cua cundaa tsi, tyehen catyí tsi: “Cua tatsi tuñi nyivî tsi ra tumaa tsa cuvî ra iin ra caquiñi.” Tacan catyí tuhun yu nu tutu Nyoo. Tan tandihî tsa catyí tsi tsa cuenda yu cua cundaa tsi —catyí ra.

³⁸ Tacan tan catyí ra tsicá tsihin ra:

—Ihya nyecú uvi taahan mityi —catyí ra naha.
 —Tsa iyó vaha ñi —catyí ra Jesús.

*Nu tsican tahvi ra Jesús tsi Nyoo nda Getsemaní
 (Mt. 26.36-46; Mr. 14.32-42)*

³⁹ Tacan tan quitā ra Jesús vehe nu nyií ra. Tan cuahán ra yucu Olivo, cuhva tuhvá maa ra tsicá. Tan ra tsicá tsihin ra cuahán ra naha nyicún ra naha tsi ra.

⁴⁰ Tan tsa tsaā ra naha ndacan, catyí ra tsihin ra naha:

—Ndācan tahvi ndo tsi Nyoo tyin tacan tan ña cuvi jaha canaa nu ña vaha tsi ndo.

⁴¹ Tacan tan cuahán ra Jesús tsa cañi luxu ca, tumaa tsa cañi tsaá iin yuu tun cañi yo can. Tacan tan tsicuiñi tsi ra. Tan quitsaha caahán ra tsihin Nyoo,

⁴² tan catyí ra:

—Tyatya Jutu yu, tun yooho tan cuñi un, jatsiyo tundoho tsa cua nyehe yu ihya. Maa tyin na ña cuvi cuhva cuñi maa yu. Na cuvi cuhva cuñi maa un —catyí ra Jesús.

⁴³ Tacan tan quituvi iin ángel Nyoo, tyin cuhva ra tunyee iñi tsi ra Jesús.

⁴⁴ Tan tsitsi tsa nyehé xaan ra Jesús tundoho tsa cuihya xaan cuñi ra, tan ñihi ca tsican tahvi ra tsi Nyoo. Tan cuaha xaan tyeen ra quitá tan tsatí tsi nu ñuhu, tan caá tsi tumaa caá ñiñi.

⁴⁵ Tacan tan nduvitā ra tsa ndihī cahan ra tsihin Nyoo. Tan cuahán nyico ra nu yucú ra tsicá tsihin ra. Tan nyehe ra tyin quixí ra naha, tsa cuenda tsa cuihya xaan cuñi ra naha, ña cunyeē iñi ra naha ñumaahna tan quixi ra naha.

⁴⁶ Tacan tan catyí ra Jesús tsihin ra naha:

—¿Nacuenda quixí ndo? Nduvita ndo. Tan ndacan tahvi ndo tsi Nyoo, tyin tacan tan ña cuví jaha canaa nu ña vaha tsi ndo.

Nu tsaha cuenda ra Judas tsi ra Jesús tsi nu xaan ñi tsi ra

(Mt. 26.47-56; Mr. 14.43-50; Jn. 18.2-11)

⁴⁷ Ndi caahán ca ra Jesús yacan, tan tsaá cuaha ra catsaá. Tan ityi nuu, vatsí nu Judas, iin ra tsicá tsihin ra Jesús. Tan natuhvā nu nu nyaá ra Jesús tyin tyayuhu nu tsi ra.

⁴⁸ Tacan tan cahān ra Jesús tsihin nu:

—Yooho Judas, ¿a tsihin tsa cua tyayuhu un tsi yu, tan cua nacuhva cuenda un tsi yuhu Rayi tsa quee nda gloria tsi nu xaan ñi tsi yu nahnu? —catyí ra Jesús.

⁴⁹ Tan ra nyecú tsihin ra Jesús quitsaha nducú tuhun ra naha tsi ra:

—Jutu Mañi ndi ¿a vaha cahnya ndi tsi ra naha tsihin mityi? —catyí ra naha.

⁵⁰ Tacan tan iin ra can, tsahnya ra soho tsiyo cuaha iin ra tsa cuví musu ra jutu tsaahnu tsa cuví ityi nuu.

⁵¹ Maa tyin ra Jesús catyí ra tsihin ra:

—Jaña ndo. Vaha ñi —catyí ra.

Tacan tan tñn ra Jesús soho ra ican tan janduvaha ra itsi.

⁵² Tan ra jutu tsa cuví ityi nuu naha ra tsihin ra yihí ndaha tsi ra jahá cuenda vehe ñuhu naha ra, tan ra cuví mandoñi naha ra, juvin ra naha cuví ra tsahan tsitñn tsi ra Jesús. Tan catyí ra Jesús tsihin ra naha:

—¿A vatsí t̄in ndo tsi yu tumaa t̄in ndo iin ñasuhu? tyin ndaha ndo mityi tan yutun.

⁵³ Ndihi quiv̄i tsinyij̄ yu tsitsi vehe ñuhu cahnu, tan ña t̄in ndo tsi yu ndacan. Maa tyin vityin tsaā cuhva tsa ndunaā tyin nu ña vaha ndacá ñaha. Yacan cuenda vatsí t̄in ndo tsi yu.

*Nu cahan ra Pedro tyin ña nacotó ra tsi ra Jesús
(Mt. 26.57-58, 69-75; Mr. 14.53-54, 66-72; Jn.
18.12-18, 25-27)*

⁵⁴ Tacan tan t̄in ra naha tsi ra Jesús. Tan tsindaca ra naha tsi ra nda vehe ra jutu tsaahnu tsa cuví ityi nuu. Tan ra Pedro ndasava ñi cuahán ra nyicún ra.

⁵⁵ Tan tsa tsaā ra naha vehe ra jutu tsaahnu tsa cuví ityi nuu, jatahan ra tsa cuví musu naha ra ñuhu nuquehe. Tan tsinyecu ra naha tani canduvi nu cayú ñuhu can. Tan tsinyaā ndihi ra Pedro tyañu ra naha.

⁵⁶ Tan tsa ndunditsín tsa cayú ñuhu ican, tacan tan iin ñaha tsa cuví musu jutu can, nyehe ña tsi ra Pedro. Tan catyí ña:

—Ra ihya tsicá tucu ra tsihin ra can —catyí ña.

⁵⁷ Maa tyin ra Pedro catyí ra:

—Yuhu ña nacotó yu tsi ra can.

⁵⁸ Tañi ñi tan nyehe tucu inga nyiv̄i tsi ra Pedro, tan catyí ñi tsihin ra:

—Yooho, cuenda ra ican cuví un —catyí ra.

Tan ra Pedro catyí ra:

—Ña nditsa

⁵⁹ Tan tsa yahā iin hora, tan nyehe tucu inga ra tsi ra Pedro tan catyí ra tsihin ra:

—Tsa nditsa tyin juvin ra ihya cuví iin ra tsa tsicá tsihin ra can. Tyin juvin ra Galilea cuví ra —catyí ra.

⁶⁰ Tacan tan catyí ra Pedro:

—Ña tsitó yu náa caahán un —catyí ra.

Tan juvin ñi cuhva can, tsitsi tsa ndi caahán ca ra Pedro tan navacu ñi iin tsitooho.

⁶¹ Tacan tan ra Jesús nanyehe ra nuu ra Pedro. Tan ra Pedro nducuhun iñi ra tsa cahan ra Jesús tsihin ra: “Tsa ndi cumañi ca navacu tsitooho, yooho tsa cahan un uñi tsaha tyin ña nacotó un tsi yu.”

⁶² Tacan tan quitá ra Pedro ityi tsata vehe. Tan tsacu xaan ra tsa cuihya cuñí ra.

Nu tsacu nducu nyaa ra naha tsi ra Jesús tan cañi ra naha tsi ra

(Mt. 26.67-68; Mr. 14.65)

⁶³ Tacan tan ra jahá cuenda tsi ra Jesús, quitsaha tsacú nducu ra naha tsi ra. Tan cañi ra naha tsi ra.

⁶⁴ Tsañi ra naha jahma nuu ra, tan quitsaha cañi ra naha nuu ra. Tan catyí ra naha tsihin ra:

—Nacoto yóo ra cañi tsi un —catyí ra naha tsihin ra.

⁶⁵ Tan cuaha xaan ca maa tsa cahan nyaa ra naha tsi ra.

Nu tsicá tuhun mandoñi naha ra tsi ra Jesús tatun Sehe Nyoo cuví tsi ra

(Mt. 26.59-66; Mr. 14.55-64; Jn. 18.19-24)

⁶⁶ Tan tsa cunditsin inga quivi, tan ndu iin ra cuví mandoñi tsahnu ñuu can tsihin ra jutu tsa cuví ityi nuu naha ra, tan tsihin ra maestro cuenda ley vehe ñuhu naha ra. Tan quihin ra naha tsi

ra Jesús, cuahán tsihin ra nda nu cua coo Junta Cahnu. Tan nducu tuhun ra naha tsi ra Jesús:

⁶⁷ —Catyí tuhun tsihin ndi tun juvin ra Cristo cuví un —catyí ra naha tsihin ra.

Tan ra Jesús nacahan ra tan catyí ra:

—Tatun catyí yu tsihin ndo tyin juvin yu cuví, ña cua tsinu iñi ndo tsa cahan yu.

⁶⁸ Tan tatun nducu tuhun tucu maa yu tsi ndo, ña cua nacahan ndo, tan ndi ña cua jaña ndo tsi yu.

⁶⁹ Maa tyin vityin tan ityi nuu ca, Rayi tsa quee nda gloria cua cunyaa ra xiin cuaha Nyoo, ra tsa iyó tandihí tunyee iñi —catyí ra Jesús.

⁷⁰ Tacan tan tandihí ra naha tsica tuhun ra naha tsi ra:

—Tun tacan, Sehe Nyoo cuví tsi un —catyí ra naha.

Tacan tan nacahan ra Jesús tan catyí ra:

—Juvín, sehe Nyoo tsi yu tumaa catyí maa ndo.

⁷¹ Tacan tan natuhun tahan ra naha:

—Tsiñí ndo tsa caahán ra. Ña cuñí ca tsi tsandaa. Tyin tsa tsiñi maa yo tsa cahan ra —catyí ra naha.

23

*Nu nyehé ra Pilato tyin nduve cuatyí ra Jesús
(Mt. 27.1-2, 11-14; Mr. 15.1-5; Jn. 18.28-38)*

¹ Tacan tan nduvita tandihí ra naha. Tan tsindaca ra naha tsi ra Jesús nda nu nyaá ra Pilato, [ra ndaca ñaha quee nda ñuu Roma].

² Tacan tan quitsaha tyaá ra naha cuatyí tsi ra Jesús nuu ra Pilato tan catyí ra naha tsihin ra:

—Ra ihya, jativí ra tsi nyivi tsihin tsa caahán ra tsihin ñi, tyin caahán ra tyin ña vaha tsa tyahvi ndi xuhun tsi ra ndaca ñaha nda ñuu Roma. Tan

caahán tucu ra tyin cuví ra Cristo, ra tsa jaquitsi Nyoo tyin cuvi ra rey —catyí ra naha tsihin ra Pilato.

³ Tacan tan ra Pilato tsica tuhun ra tsi ra Jesús:

—¿A yooho cuví Rey cuenda nyivi Israel? —catyí ra.

Tan nacahan ra Jesús tan catyí ra:

—Juvín, tumaa catyí maa un.

⁴ Tacan tan catyí ra Pilato tsihin ra jutu tsa cuví ityi nuu naha ra, tan tsihin nyivi:

—Nduve cuatyí ra ihya —catyí ra tsihin ñi.

⁵ Maa tyin jañihí ca ñi caahán ñi. Tan catyí nyico ñi:

—Cahnu xaan cuatyí ra. Tyin cuaha xaan tsihi tshahá ra, tyin jacuahá ra tsi nyivi. Tsa jihna ñi quitsaha caahán ra tsihin nyivi iyó ñuu tsa cayucú Galilea. Tan nani ityi vatsí ra, jacuahá ra tsi nyivi. Tan vityin tsa tsaá ra Judea ihya tan juvín ñi yacan javahá ra —catyí ñi.

Nu jacuhun ra Pilato tsi ra Jesús nu nyaá ra Herodes, ra cuví rey nyivi iyó Galilea

⁶ Cuhva tsa tsiñi ra Pilato yacan, tan nducu tuhun ra tatun ra Galilea cuví ra Jesús.

⁷ Tan catyí nyivi tsihin ra tyin juvín. Tacan tan jacuhun ra Pilato tsi ra nda nu nyaá ra Herodes. Tyin ra Herodes cuví ra ndacá ñaha Galilea can. Tan quivi can nyii ra ñuu Jerusalén.

⁸ Tan kuhva tsa nyehe ra Herodes tsi ra Jesús, sii xaan cuñí ra. Tyin tsanaha xaan cuñí ra nyehe ra tsi ra. Tyin ñihí tuhun ra tyin cuaha xaan tsa iyo javahá ra. Tan cuñí xaan ra nyehe ra iin tsa iyo tsa cua javaha ra Jesús.

⁹ Tan cuaha xaan tsa nducu tuhun ra Herodes tsi ra Jesús. Maa tyin ra Jesús ña nacahan maa ra.

¹⁰ Ican nyecú ndihi tucu ra jutu tsa cuví ityi nuu naha ra, tan ra maestro cuenda ley vehe ñuhu naha ra. Tan tyaa xaan ra naha cuatyí tsi ra Jesús.

¹¹ Tacan tan ra Herodes tsihin andaru cuenda ra, tsacu nducu ra naha tsi ra. Tan jacunditsi nuu ra naha iin jahma yahvi tan sii caá tsi ra Jesús, tumaa caá tsa tuhvá rey tsinditsí. Tacan tan jacuhun nyico ra Herodes tsi ra nda nu nyaá ra Pilato.

¹² Tan quivi can ra Pilato tsihin ra Herodes nduvaha iyó ra naha. Tyin nu quitsi quivi, ña cuvi nyehé tahan ra naha tsi ra naha.

*Nu cutuñi ra Jesús tyin cua cúu ra
(Mt. 27.15-26; Mr. 15.6-15; Jn. 18.39-19.16)*

¹³ Tacan tan ra Pilato jandu iin ra tsi ra jutu tsa cuví ityi nuu naha ra, tan ra cumí tyiñu vehe ñuhu naha ra, tan tsihin tandihi nyivi.

¹⁴ Tan catyí ra tsihin ñi:

—Nyooho quitsi ndaca ndo tsi ra ihya nu nyaá yu. Tan catyí ndo tyin jativí ra tsi nyivi. Maa tyin yuhu tsa jacutuñi yu tsi ra nuu ndo. Tan nduve cuatyí ra tumaa cuhva cahan ndo can nañihi yu.

¹⁵ Tan ndi ra Herodes tan ña nañihi ra ndi in-tuhun cuatyí ra. Yacan jaquitsi nyico ra tsi ra inga tsaha nu nyaá yu. Nyehé ndo tyin nduve cuatyí ra. Tan yacan ña taahan tsi tsa cúu ra.

¹⁶ Yacan cuenda cua tatsi tuñi yu tsi ra. Yaha can tan cua jaña yu tsi ra —catyí ra Pilato.

17 Tacan catyí ra Pilato tyin tsitsi vico ican, taahán tsi tsa jaña ra iin ra yucú vehe caa, tumaa tuhvá maa ra icá.

18 Maa tyin tandihí nyívi iin caa ñi cana tsa ñi tan catyí ñi:

—Cahñi tsi ra Jesús. Tan jaña tsi ra Barrabás —catyí ñi.

19 Tan ra Barrabás can nyíi ra vehe caa tsa cuenda tsa cañi tahan ra tsihin ra cumí tyiñu ñuu can. Tan inga tuhun tyin tsahñi ra nyívi.

20 Tan ra Pilato cuñi ra jaña ra tsi ra Jesús. Tan quitsaha caahán ra tsihin nyívi can inga tsaha tyin cua jaña ra tsi ra.

21 Maa tyin nyívi tsa ca cana tsa ñi:

—¡Tyaa tsi ra nu cruu. Na cúu ra nu cruu!

22 —¿Náa tsa ña vaha javaha ra ihya? Tan nyehé yu tyin ña taahán tsi tsa cúu ra. Cua tatsi tuñi ñi yu tsi ra, tan cua jaña yu tsi ra —catyí ra Pilato.

23 Maa tyin nyívi cana tsa ca ñi, tan catyí ñi tyin nacahñi ra tsi ra Jesús nu cruu. Tan maa ñi tan tsihin ra jutu tsa cuví ityi nuu naha ra, ñihí ñi tsa cuñi ñi tyin cana tsa xaan ñi.

24 Tacan tan javaha ra Pilato cuhva cahan ñi.

25 Tan jaña ra tsi ra Barrabás, ra tsa nyíi vehe caa tsa cuenda tsa cañi tahan ra tsihin ra cumí tyiñu tan tsa cuenda tsa tsahñi ra nyívi. Tan nacuhva cuenda ra Pilato tsi ra Jesús tsi ñi cuhva cuñi maa ñi.

Nu tyaa ra naha tsi ra Jesús nu cruu

(Mt. 27.32-44; Mr. 15.21-32; Jn. 19.17-27)

26 Tacan tan quihin andaru tsi ra Jesús. Tan cuahán ra tsihin ra naha. Tan tin tucu ra naha

tsi iin ra ñuu Cirene nañí Simón. Ra ican ndi vatsí nuhu ra quee ra cuhu. Tan jañiñi ra naha tsi ra tsa cuiso ra cruu ra Jesús. Tan cuhun ra ityi tsata ra.

27 Tan cuaha xaan nyivi cuahán ityi tsata ra Jesús. Tan cuaha xaan ñiñaha tsacú xaan ñi tsa cuihya cuñi ñi tsacaty tundo ho taħan ra.

28 Maa tyin ra Jesús nanyehē ra nuu ñi. Tan catyí ra tsihin ñi:

—Tandihí nyoo ho, ñiñaha ñuu Jerusalén ihya, ña vacu ndo tsacatyí yuhu. Vacu ndo, tsacatyí maa ndo tan tsacatyí sehe ndo.

29 Tyin cua quitsi quivi cua nyehe xaan ndo tundo ho. Tan cua cahan nyivi tsi tandihí ndo tsa cuví ndo ñaha tsa ña cuví coo sehe. Tan cua cahan ñi tsihin ndo: “Vaha xaan tyin nduve sehe ndo tsicoo tyin cuaha xaan tundo ho nyehé yo vityin”, cua catyí ñi tsihin ndo.

30 Tyin quivi can cua cuñi ñi nduva yucu tsata ñi tan quihvi xeehe ñi.

31 Tyin tatun tyehen icá nyivi tsihin iin yutun vaha, yaha ca cuhva cua ica ñi tsihin yutun ityi —catyí ra Jesús tsihin ñiñaha ñuu Jerusalén can.

32 Tan quihin tucu andaru can naha ra tsi uvi taahan ra iyó cuatyí, tyin cahni ndihí ra naha tsi ra naha iin caa ñi tsihin ra Jesús.

33 Tacan tan tsaā ra naha iin nu nañí Yiqui Jiñi Ndiyí. Tan ican tyaa ra naha tsi ra Jesús nu cruu. Tan tacan tyaa ndihí tucu ra naha tsi nduvi taahan ra iyó cuatyí can naha ra. Iin ra tyaa ra naha nuu cruu xiin cuaha ra Jesús. Tan inga ra can tyaa ra naha nuu cruu xiin satyin ra.

34 Tan cuhva tsa nyaá ra Jesús nu cruu can, tan catyí ra:

—Tyatya, Jutu yu, jaha tucahnu iñi tsi ra naha. Tyin ña tsitó ra naha náa javahá ra naha tsihin yu —catyí ra.

Tacan tan andaru can naha ra tava ra naha suerte tsihin jahma ra Jesús, tyin nyehe ra naha ndáa ra cua jaha canaa jahma can.

³⁵ Tan nyivi nyecú ñi nyehé ñi. Tan ra cumí tyiñu vehe ñuhu naha ra, tsacú nducu ra naha nyehé ra naha tsi ra Jesús. Tan catyí ra naha:

—Jacacu ra tsi inga nyivi. Na jacacu ndihi tucu maa ra tsi ra vityin, tun nditsa tsa ra Cristo, ra tsa jaquitsi Nyoo, cuví ra —catyí ra naha.

³⁶ Tan juvin ñi cahan nyaá ra andaru can naha ra tsi ra. Tan natuhva ra naha nu ticaá ra. Tan tsaha ra naha vinu iya tsihi ra.

³⁷ Tan catyí ra naha tsihin ra:

—Tatun rey cuenda nyivi Israel cuví un, jacacu tsi un —catyí ra naha.

³⁸ Tan jiñi cruu nu nyaá ra Jesús nyaá iin tsa tyaa ra Pilato tsihin sahan griego, sahan latín, tan sahan hebreo. Tyehen caahán letra can: “Juvín ra ihya cuví Rey cuenda nyivi ñuu Israel” —catyí letra can.

³⁹ Tan iin ra tsa iyó cuatyí tsa nyaá nu cruu xiin ra Jesús, quitsaha caahán nyaa ra tsi ra:

—Tatun nditsa tyin ra Cristo cuví un, jacacu tsi un. Tan jacacu ndihi tsi nyuhu —catyí ra can.

⁴⁰ Maa tyin inga ra can catyí ra tsihin ra:

—¿A ña yuuhví un tsi Nyoo? Tyin juvin ñi tundo ho tsa taahán ra ihya, tan taahán un vityin.

⁴¹ Maa yo nyehé yo tundo ho maa tyin iyó cuatyí yo. Tan ra ihya nduve cuatyí ra iyó —catyí ra can.

⁴² Tacan tan catyí ra can tsihin ra Jesús:

—Yooho Jesús, nducuhun iñi tsi yu quivi cundaca ñaha un —catyí ra.

⁴³ Tacan tan ra Jesús nacahan ra tsihin ra tan catyí ra:

—Tsa nditsa caahan yu tsihin un tyin juvin ñi vityin tan cua cunyaa un tsihin yu nda paraíso [nu yucú añima nyivi tsinú iñi tsi Nyoo] —catyí ra Jesús tsihin ra.

Nu tsihi ra Jesús

(Mt. 27.45-56; Mr. 15.33-41; Jn. 19.28-30)

⁴⁴ Tacan tan cuhva ora quitsaha ndunaá nu ñuhu ñayivi, nda cuanda caa uñi tsa tseñi.

⁴⁵ Tyin ndunaá ñicanyii. Tan jahma tsa ticaá tsitsi vehe ñuhu cahnu, ndata sava tsi.

⁴⁶ Tacan tan cana tsa ra Jesús tan catyí ra:

—Tyatya, Jutu yu, tyaa cuenda yu añima yu ndaha un —catyí ra.

Tan cuhva tsa cahan ra tacan, tan tsihi ra.

⁴⁷ Tan ra cuví capitán cuenda andaru can naha ra, nyehe ra tandihi tsa cuví. Tan jacahnu ra tsi Nyoo, tan catyí ra:

—Nduve tsa cuii cuatyí ra ihya tsicoo —catyí ra.

⁴⁸ Tan tandihi nyivi tsa nyecú ican, nyehe ñi tsa cuví. Tan cuahan ñi tan quitsaha cañí ndaha ñi yiqui nyica ñi. Tyin tsitó ñi tyin ña vaha tsa javaha ñi tsihin ra Jesús.

⁴⁹ Tan tandihi nyivi tsa nacotó tsi ra Jesús, tan ñiñaha tsa tsinyicun tsi ra nda Galilea, nyecú ñi ndasava. Tan nyehe ñi tandihi tsa cuví can.

Nu cua cutsi ra naha tsi ra Jesús

(Mt. 27.57-61; Mr. 15.42-47; Jn. 19.38-42)

50 Tan iyó iin ra vaha, nañí ra José. ra ñuu Arimatea tsa canyíi Judea. Tan cuví ra iin ra cuví ityi nuu cuenda Junta Cahnu nyívi Israel.

51 Tan ra José can ndatú ra quívi tsa cua cundaca ñaha Nyoo. Tan ña ndoo ra vaha tsihin tsa javaha ra cutahán tsihin ra, ra cuví jutu tsa cuví ityi nuu naha ra.

52 Tacan tan tsahan ra José can tsindacān ra cuñu ñuhu ra Jesús tsi ra Pilato.

53 Tan yaha tsa januu ra José can cuñu ñuhu ra Jesús nu cruu, cava nuu ra iin jahma tsi ra. Tan cuahán ra cua cutsi ra tsi ra tsitsi iin ñaña tsa tsa cuví yavi yuu tsa javaha nyívi tan ñaha ca quihvi ndiyi tsitsi can.

54 Tan viernes cuví can, quívi tsa janduvahá nyívi tsa catsi ñi tsa sabaru, quívi quitatú ñi. Tan tsa cua tahan tsi quívi can.

55 Tan tandihí ñiñaha tsa quee tsihin ra Jesús Galilea, cuahán ñi cua nyehe ñi tsitsi yavi yuu can. Tan nyehe ñi kuhva canyíi cuñu ñuhu ra.

56 Tan cuanuhu ñi nda yuvehe ñi. Tan janduvaha ñi ndutya tami tyin cua tyihi ñi cuñu ñuhu ra Jesús. Tacan tan quitatú ñi inga quívi can tumaa catyí maa tuhun tsa saha cuenda Nyoo tsi yo.

24

Nu nandotq ra Jesús

(Mt. 28.1-10; Mr. 16.1-8; Jn. 20.1-10)

1 Tsa tuví tumingu quívi nu quitsahá vitya, cuahán ñiñaha can nu ñaña ra Jesús. Tan nyisó ñi ndutya tami tsa janduvaha ñi.

² Tan cuhva tsa tsaá ñi, nyehe ñi tyin tsa cuatsiyō yuu tsa ndasí yuhu ñaña can.

³ Tan quihvī ñi tsitsi ñaña can, maa tyin ña nañihī ñi cuñu ñuhu Jutu Mañi yo Jesús.

⁴ Tan yucú ñi tsihin tsa yuuhví ñi. Tan ña tsitó ñi náa cua javaha ñi. Tan sana iñi ñi quituvī uvi taahan rayi nuu ñi. Tan xiñu xaan jahma nditsí ra naha.

⁵ Tan tsihin tsa yuuhví ñi, tan tsaquñ ñi jiñi ñi nda nu ñuhu. Tacan tan catyí ra can naha ra tsihin ñi:

—¿Nacuenta nanducú ndo tsi ra nyito nu yucú ndiyí?

⁶ Nduve ca ra nyí ihya, tyin tsa nandoto ra. Nducuhun iñi ndo tsa cañan ra tsihin ndo quiví tsica ra Galilea.

⁷ Catyí ra tyin taahán tsi nacuhva cuenda nyiví tsi ra ndaha ra iyó cuatyí naha ra. Tyin cuví ra Rayi tsa quee nda gloria. Tan taahán tsi tyin cahñi ra can naha ra tsi ra nu cruu. Maa tyin tsa tsinu uñi quiví cua nandoto ra. Tacan catyí ra tsihin ndo —catyí ángel can naha ra tsihin ñi.

⁸ Tacan tan nducuhun iñi ñi tsa cañan ra Jesús quiví can.

⁹ Tan cuanuhu ñi. Tan nacatyí tuhun ñi tsihin tsa utsi iin ra tsa tava tyiñu ra Jesús tan tsihin tandihí ca nyiví tsa tsinyicun tsi ra.

¹⁰ Tan ñiñaha tsa tsicatyí tuhun tsihin ra naha cuví ñi: ña María Magdalena, ñaha quee Magdala, tan ña Juana, tsihin ña María sibi ra Jacobo, tan tsihin juhva ca ñiñaha.

¹¹ Maa tyin ra tava tyiñu ra Jesús cuñí maa ra naha tyin caahán ñi maa ñi. Tan ña tsinú iñi ra

naha tsa caahán ñi.

¹² Maa tyin ra Pedro nduvita ra tan tsinú xaan ra cuahán ra cua nyehe ra tsitsi ñaña nu tinyii ra naha ra Jesús tatun nditsa. Tan nyehe ra tsitsi yavi yuu can tyin jahma tsa tsindasi ña ra canyií nda sava. Tacan tan cuanuhu ra yuvehe nu yucú tandihí ca ra naha. Tan iyo xaan cuñí ra tsa cuvi.

*Tsa cuvi ityi cuahán ñuu Emaús
(Mr. 16.12-13)*

¹³ Juvín ñi maa quivi can, uvi taahan ra tsinyicun tsi ra Jesús cuahán ra naha ñuu Emaús, tumaa utsi iin kilómetro tsa queé yo ñuu Jerusalén.

¹⁴ Tan cuahán ra naha tan natuhún tahan ra naha náa ndihí tsa cuvi.

¹⁵ Tan tsitsi tsa natuhún ra naha, tan ra Jesús tahan ra tsi ra naha ityi cuahán ra naha.

¹⁶ Maa tyin vasu nyehé ra naha tsi ra Jesús, maa tyin ña nacotó ra naha tsi ra. Tyin tumaa iin tsa tyasí tsi nuu ra naha, tan ña cuví nacoto ra naha tsi ra Jesús.

¹⁷ Tacan tan nducu tuhun ra Jesús tsi ra naha:

—¿Náa natuhún xaan ndo? ¿Nacuenda cuiihya xaan cuñí ndo? —catyí ra tsihin ra naha.

¹⁸ Tan iin ra tsa nañí Cleofas nacahan ra tan catyí ra:

—Tandihí nyivi tsitó tsa cuvi ñuu Jerusalén. ¿A ra inga ñuu cuví yooho tyin ña tsitó un tsa cuvi? —catyí ra.

¹⁹ Tacan tan catyí ra Jesús tsihin ra naha:

—¿Náa cuvi?

Tan nacatyí tuhun ra naha tsihin ra:

—Tuhun ra Jesús ra ñuu Nazaret. Tyin cuv_i ra iin ra cuv_i ndusu yuhu Nyoo. Tan tsihin tunyee iñi cahnu Nyoo javah_a ra tsa cahnu tan cah_an ra tsa vaha nuu Nyoo tan nuu tandih_i nyiv_i.

²⁰ Maa tyin ra jutu tsa cuv_i ityi nuu naha ra tan ra cumí tyiñu cuenda vehe ñuhu, tsah_a cuenda ra naha tsi ra tsi ra ndacá ñaha cuenda ñuu Roma. Tan tsahñ_i ra naha tsi ra. Tan tsih_i ra nu cruu.

²¹ Tan vityin tsa quita uñi quiv_i tsa cuv_i yacan. Tan nyuhu cuñí maa ndi tyin juvin ra cua jacacu tsi yo tsa cuv_i yo nyiv_i Israel.

²² Maa tyin vityin iyo xaan cuñí ndi tsa nacaty_i juhva ñiñaha tsihin ndi. Tyin maa ñi tsahan ñi nu ñaña ra tsa tuv_i.

²³ Tan nduve ca cuñu ñuhu ra canyí. Tan nacaty_i tuhun ndih_i ñi tyin nyehe ñi uvi taahan ángel. Tan caty_i ángel can naha ra tsihin ñi tyin ra Jesús nyito ra.

²⁴ Yaha yacan tan tsahan tucu juhva ra cutahán tsihin ndi tsinyehe ra naha nu ñaña. Tan nyehe ra naha tyin tsa nditsa cuv_i tsa cah_an ñiñaha can. Maa tyin ña nyehe ra naha tsi ra Jesús —caty_i ra naha tsihin ra Jesús.

²⁵ Tacan tan caty_i ra Jesús tsihin ra naha:

—Luxu xaan cutuñí iñi ndo. Tan cuee xaan tan tsinu iñi ndo tuhun tsa cah_an ra cuv_i ndusu yuhu Nyoo taha_n tsanaha.

²⁶ ¿A ña tsitó ndo tyin taahán tsi tsa nyehe jihna ra Cristo tundoho? Yaha can tan tahan tsi cua ñihi ra tyiñu tsa cua cundaca ñaha ra —caty_i ra Jesús tsihin ra naha.

²⁷ Tacan tan quitsah_a tsahá cuenda ra nácaa cuahán tuhun maa ra nu tutu Nyoo. Tan quitsah_a caahán ra tuhun tsa tya_a ra Moisés taha_n tsanaha.

Tan yaha can tan cahan ra tuhun tandihî libru tsa tyaa ra cuvî ndusu yuhu Nyoo.

²⁸ Tan cuhva tsa tsaã ra naha nda ñuu Emaús, nu cuahán ra naha, tan jahá ra Jesús tyin cañi ca cuahán ra.

²⁹ Tacan tan catyí ra naha tsihin ra na ndoo ra tsihin ra naha. Tan catyí ra naha:

—Ndoo tsihin ndi tyin tsa cua cuiso ñicanyii —catyí ra naha.

Tacan tan cuahán ra Jesús tsihin ra naha.

³⁰ Tan cuhva tsa tsinyaã ra yuhu mesa tsihin ra naha, quihî ra paan. Tan tsaã ra tyahvi nyoo tsi Nyoo. Tan tsahnũ sava ra, tan tsaã ra tsi ra naha.

³¹ Tan iin yaha ñi nuña nuu ra naha tan nacoto ra naha tsi ra Jesús. Maa tyin ra Jesús naã ihñi ñi ra.

³² Tacan tan quitsaha natuhún tahan ra naha tan catyí ra naha:

—Yacan cuenda vaha xaan cuñí aña yoo tsa vatsí ra tsihin yo, tan tsaã cuenda ra tuhun Nyoo tsa nyaá nu tutu Nyoo tsi yo —catyí ra naha.

³³ Ña ndatu ca ra naha, tan cuanuhu ra naha nda ñuu Jerusalén. Tan ñihî tahan ra naha tsihin tsa utsi iin ra tsa tava tyiñu ra Jesús, ndu iin ra naha tsihin juhva ra nyecú tsihin ra naha.

³⁴ Tacan tan tsa utsi iin ra can naha ra nacatyî tuhun ra naha tsihin ra tsa ndi tsaã can naha ra:

—Nditsa tyin Jutu Mañi yo nandoto ra. Tyin ra Simón nyehẽ ra tsi ra —catyí ra naha.

³⁵ Tacan tan ra tsa ndi tsaã can nacatyî tuhun ndihî ra naha nácaa natuhun ra Jesús tsihin ra naha ityi cuahán ra naha ñuu Emaús, tan nácaa nacoto ra naha tsi ra nu tsahnũ sava ra paan.

*Nu quituvĭ ra Jesús nu yucú ra tsicá tsihin ra
(Mt. 28.16-20; Mr. 16.14-18; Jn. 20. 19-23)*

³⁶ Ndi natuhún ca ra naha yacan tan quituvĭ ra Jesús tyañu ra naha. Tan tsaha ra nacumi tsi ra naha, tan catyí ra:

—Na coo tsa vaha ańima ndo.

³⁷ Tacan tan nayuhvĭ xaan ra naha. Tan cuńí ra naha tyin tatyí ndiyĭ cuvĭ can.

³⁸ Tacan tan catyí ra Jesús tsihin ra naha:

—¿Nacuenda yuuhví xaan ndo? ¿Tan nacuenda tsicá xaan ińi ndo?

³⁹ Nyehē ndo ndaha yu. Tan nyehē ndo tsaha yu. Tyin juvin ñi maa yu cuvĭ. Tĭn ndo tsi yu tan coto ndo. Tyin tatyí ndiyĭ nduve cuńu ñuhu can iyó. Tan nduve yiqui can tumaa tsa nyehé ndo tsi yuhu —catyí ra Jesús.

⁴⁰ Tan cuhva tsa cahan ra yacan, tan janaha ra ndaha ra tsihin tsaha ra tsi ra naha.

⁴¹ Maa tyin maa ra naha, tsa cuenda tsa iyo cuńí ra naha tan si cuńí ra naha, nda cuanda ña cuvĭ ca tsinú vaha ińi ra naha. Yacan nacahan ra Jesús tsihin ra naha:

—¿A iyó tsa catsi yo? —catyí ra.

⁴² Tacan tan tsaha ra naha luxu tyaca tyihyo tsihin ndutya ñuńu tsi ra.

⁴³ Tan quihĭn ra. Tan quitsaha tsatsí ra nu nyecú ra naha.

⁴⁴ Tan catyí ra tsihin ra naha:

—Tandihĭ tsa tahan yu, yacan cuvĭ tsa catyĭ yu tsihin ndo quivĭ can. Tan catyĭ yu tsihin ndo tyin tacan cua cuvĭ, tumaa cuhva nyaá tuhun tsa tyaa ra Moisés tan ra cuvĭ ndusu yuhu Nyoo tan tsihin tsa nyaá nu libru salmo —catyí ra tsihin ra naha.

⁴⁵ Tacan tan tsaha cuenda ra Jesús cuhva catyí nu tutu Nyoo. Tan cutuñi iñi tandihí ra naha jaha ra.

⁴⁶ Tacan tan catyí ra Jesús tsihin ra naha tyin tacan nyaá nu tutu Nyoo tyin taahán tsi tsa cúu ra Cristo. Tan tsa tsinu uñi quivi cua nandoto ra.

⁴⁷ Tan taahán tsi coto nyivi tuhun ra Cristo, tyin tatun ndu uvi iñi ñi cuatyí ñi, cua coo tucahnu iñi tsi ñi. Tan jihna ñi cua cahan ra naha tsihin sivi ra Cristo ñuu Jerusalén, yaha can tan tandihí ca ñuu tanií cahnu nu ñuhu ñayivi.

⁴⁸ Tan catyí tucu ra Jesús tsihin ra naha:

—Tan nyooho cuví tsandaa tsa cuenda tandihí tsehe.

⁴⁹ Tan cua jaquitsi maa yu Tatyí Ii Nyoo siqui ndo tumaa tsa catyí Jutu yu tyin cuhva ra tsi ndo. Maa tyin ndoo ndo Jerusalén ihya. Tan ña quita ndo nda cuanda tsa ñihi ndo tunyee iñi Nyoo tsa cua quitsi tsi ndo —catyí ra Jesús.

Nu cuanuhu ra Jesús gloria

(Mr. 16.19-20)

⁵⁰ Tacan tan ra Jesús cuahán ra tsihin tandihí ra tsicá tsihin ra nda ñuu Betania. Tan cañihí ra ndaha ra. Tan nasoco ra tsi ra naha.

⁵¹ Tan tsitsi tsa nasocó ra tsi ra naha, nandaá ra andivi.

⁵² Tacan tan tandihí ra naha quitsaha jacahnú ra naha tsi ra. Tan sií xaan cuñí ra naha, cuanuhu ra naha nda ñuu Jerusalén.

⁵³ Tan tandihí quivi tsiyucu ra naha tsitsi vehe ñuhu cahnu, jacahnú xaan ra naha tsi Nyoo.

Tan na cuví tsi tacan ñi.

**Tuhun tsaá tsa nacoó jutu mañi yo Jesucristo
tsi yo
New Testament in Mixtec, San Juan Colorado
(MX:mjc:Mixtec, San Juan Colorado)**

copyright © 1994 Wycliffe Bible Translators, Inc.

Language: Mixtec, San Juan Colorado

Translation by: Wycliffe Bible Translators, Inc.

Mixteco, San Juan Colorado [mjc], Mexico

Copyright Information

© 1994, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, San Juan Colorado

© 1994, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

c270ec54-172a-541f-83e6-7760f619c744